

# Suão Sesus soho wasaniha ziwatahaka

Suão Sesus tuk zinymyrykya. Taparaka Tsiaku iziky tazo tuk iwatsa piknutsa tahatôhõryk humo ziknasizokonaha, iwaze ustsa kytsa piknutsa nisbykyknaha. Sesus ziaakzoze tazo zerekik ituk niukuru. Sesus tazo bo ziksizoze Deus hyrikoso ituk niapykyryk iwatahi papeu humo Sesus soho ziwatahaka iwatsahi katsa kino niwatihi tanymyryky.

---

## Suão Sesus wasaniha soho ziwatahaka.

**1** <sup>1</sup>Tapara mybarawy isuknihibyize Sesus Kiristu my. Atahi koikny baktatu Deus. Inaro kino ana zuba — Deus harere baba zuba — hỹ. Tapara bijoikpe wytyk nizukni — Deus harere baba zuba — nikara. Atahi Deus tihi nikara. Deus koikny baktatu nikara. Iwa tapara nikara. <sup>2</sup>Iwa tapara Deus koikny baktatu. Atahi — Deus harere baba zuba — niwatihi. Deus tuk atatu nikara hỹ. <sup>3</sup>Deus nanabyi nizukni ihumo hi. Nanabyi nizukninaha ituk tu nikara. <sup>4</sup>Tazikwy humo tsizubarêna mykara. Tazikwy humo myzubaha myspitu tsimykaranaha. Myzubaha nisihyrinymyryky. Wasaniha ty hi sibo ziwatawyky. Hawa myzubaha amypubyriha bo iktsa mykaranaha iwa Sesus myzubaha nisihyrinymyryky. Sihyrinymyrêtsa moziknaha. Atahi rika wata niy.

<sup>5</sup>Rika miwa haeze pok maha zeka amypubyri mozik. Iwaha hi — Deus harere baba zuba — myzubaha bo nisihyrinymyryky iwatsahi ihumo sispirikporêtsa moziknaha. Iwatsahi wasania ty nimyhyrinymyryknaha rika ty hopok my tawa. Myzubaha simysopyksapybyitsa nikaranaha. Asahi wasani haty batu ziknakaranaha. Wasaniha ty — Deus harere baba zuba — nisihyrinymyryky, atahi rika ty pok maha tawata.

<sup>6</sup>Aiba Deus maku myzubaha bo zipeha. Suão inarokota niy. <sup>7</sup>Deus sohotsa zumuze Sesus mybo ziwatawy. Sesus — Deus harere baba zubata — hỹ niy. Iwaze Sesus amypubyriha hyritywa kytsa bo ziwatawyky iwatsahi kytsa Deus harere bo hỹ mykaranaha. <sup>8</sup>Suão byitatu — Deus harere baba zuba. — Isoho tsahotsazubata nitsasoko. Ata soho hi ziwatawyky. Myzubaha pe nikara: <sup>9</sup>— Deus harere baba zubata hi mozumuze pahahyrinymyry. Mybarawy bo

mynasikze myzubaha Deus harere ty mysihyrinomyry iharere amypubyriha hyritywa my — Suão niy.

<sup>10</sup>Iwaze mybarawy bo inasik. Myzubaha bo zumu. Tapara mybarawy nizukni. Ata hi izumu. Iwaze mybarawy ezektsa ihumo batu sispirikpo. Tsimysapyrêta tu mybarawy ezektsa ihumo batu sispirikpo. <sup>11</sup>Tatukytsa bo izumu. Sudeja ezektsa tatukytsa bo izumu. Asa kino niwatihi ihumo sispirikpo byitsa nikaranaha.

<sup>12</sup>Wastuhu ihumo sispirikporêtsa. Iwatahi ispe niy:

— O ikiahatsa Deus tuktsa tsimoziknaha. Kahumo tsimyspirikponahaze Deus tyryktsa tsimoziknaha. Deus hyrytsa tsimoziknaha — niy. <sup>13</sup>Deus hyrytsa niyziknaha. Aparakbaha wytykyryk ikny nipupurukuknaha. Kytsa wytykyryk niwatihi isty tyrykzuwy naha humo nipupurukuknaha. Kytsa aba ziknakaranaha iwatsahi sihyrytsa nipupurukuknaha. Deus hyrytsa meky watu. Deus ispe:

— O ikiahatsa kahyrytsa tsimoziknaha. Ikiahatsa Sesus harere bo hyỹ tsimykarannahaze ihumo ahaspirikporêtsa iwatsahi kahyrytsa tsimoziknaha — my. Iwa Deus tahyrytsa soho motsasoko.

<sup>14</sup>— Deus harere baba zuba — mywata niyzik. Sesus Kiristu maku babata niyzik. Ata zuba Deus tse. Atahi mybo inasik. Mytuk zikzuruku niy. Kytsa tuk ziknapykyryk. Sesus Kiristu sihumo tsimpokzitsiarêta ziknakara, nisitsumuêhĩ tsihikik tsimyzihikrêta wasania ty nisihyrinomyryky. Deus harere ty nisihyrinomyryky. Isoho tsimaha:

— O atahi imysapyrênikita ipunihikrênikita — tsimaha.

<sup>15</sup>Suão Batista Sesus soho ziwatawyky iwatahi myzubaha bo hua nikara. Atahi:

— O Sesus imysapyrênikita. Utakta batu. Atahi tazikwy tsizubarêna my. Utakta batu. Kazikwy tsikaeni zuba. Uta kapurukbyizetu atakta koikny baktatu mykara. Tawahi koikny baktatu my.

<sup>16</sup>Katsakta mysopyksapybyitsa tsimykarannahaze. Sesus myzibiyituhukutu mymysapywyky. Katsakta mysopyksapybyitsa tsimykarannahaze atahi myhumo tsimpokzitsiarêta my, iwatahi myzibiyituhukutu mymysapywyky hyỹ. <sup>17</sup>Tubabatu Moises Deus harere ziwatahaka. Ana harere humo hyỹ tsimykarannahaze, wasani tsimaha, Moises niy. Sesusta mype niy:

— O ikiahatsa humo kamypokzitsiarêta. Ahasopyksapybyitsa tsikykarannahaze iwaha humotu Deus ahahumo tsimpokzitsiukrêta.

Deus harere ty nisihyrinomyryky.

<sup>18</sup>Ba aty tohi Deus iny. Ikatahi itse zuba ziny. Ata Deus ihumo tsimpokzitsiarêta. Atahi mybo inasikze, mytuk zikzuruku iwatahi Deus mybo ziwatawy — niy.

### Suão Batista isoho nitsaso.

<sup>19</sup>Iwaze kytsa Sudeja ezektsa taparaktsa ziknapamykysokonahatsa sistsumuêhĩtsa iwatsa Suão Batista bo kytsa nisipeha. Aty skaraba ikia Suão Batista pe taha. Iwaze Suão Batista bo zumunahaze asahi:

— Aty skaraba ikia. Tozeka ja ikia Deus zapehata. Tozeka ja usta ja. Katsa batu myhyrinymyry — nikaranaha. <sup>20</sup>Iwaze Suão tihi:

— O batu. Utakta Deus humo kapehabyita atahi kytsa mymyokhyrykta — niy. Iwa nitsasoko.

<sup>21</sup>Iwaze kytsa ipe niahazo:

— Aty skaraba ikia. Ikia hi sa Erias — niaha.

— Erias byitatu — niy.

— Ikia hi sa Deus sohokotsa — niaha. — Tubabatu Moises nitsaso Deus sohokotsa mozumu. Ikia hi sa isohokotsa — niaha.

Batu niy.

<sup>22</sup>— Iwaze Suão pe niaha mypetykta aty skaraba ikia. Katsa mybo tytsasokta iwaze taparaktsa bo tsimaha. Hawa ikia soho mytsaty tsimykaranaha. Tsinymyry tsihikiknaha — nikaranaha.

<sup>23</sup>Suão tihi:

— Utakta jerukbara eze hua mykara niy. Opykani motsasoko. Hawa Isaijas Deus sohokotsa tubabatu ziwatahaka atsatu mynakara. Deus harere tsiwabyziukunahaktsa. Iharere bo hyÿ tynakaranahaktsa kytsa mykara — niy. Iwa Suão niy.

<sup>24-25</sup>Kytsa zumukunahatsa Suão pehatsitsa, Pariseutsa maha. Ipe niaha:

— Ikia Kiristu byitatu Erias byitatu. Deus sohokotsa byitatu tsiky. Iwatatu sa kytsa pihik ty tsimysiharasusuku — niaha.

<sup>26-27</sup>Suão ispe niy:

— Utakta pihik ty kytsa mysiharasusuku. Usta ahatuk mykarata. Aba ikiahatsa batu ahany hÿ. Utakta Deus harere ty pahahyrinymyry. Abahi ata kino niwatihi pahahyrinymyry. Izikwyrënikita. Utakta tsikaeni zuba kahyrinymyrytatu. Atahi tsihyrinymyrëta hÿ utakta batu. Iwaze utakta ihumo kasikpybyrëta. Ipyryksuktsa mysibokik zeka kasikpybyrëta mozik utakta iwabyita tu my. Atahi imysapyrënikita iwatahi utakta kasikpybyrëta — niy.

<sup>28</sup>Iwa Suão nitsasoko. Kytsa asahi ibo izumukunaha iwa nitsasoko. Betanija eze nisiharasusuku. Betanija koiknykta sak eze buburu Sorodão inarokoha.

### **Deus hozipyrykza wata izumu.**

<sup>29</sup>Byi izokorozoze iwaze Suão Sesus bo nikoze jokeryk inaukuru. Iwaze Suão kytsa pe niy:

— Iktsaziutahaktsa kytsa. Ta maku bo iktsaziutahaktsa. Atahi Deus izipehata. Ziknapamykysokonahatsa hozipyrykzatsa ziknasibakanaha kytsa sisopyksapybyitsa ziknakaranaha, sisapyzeken hozipyrykzatsa ziknasibakanaha. Iwaze Deus sisopyksapybyitsa nikaranaha nisiokzohik. Nawa ata kino mysapyzeken mohyrikosokda. Mysopyksapybyitsa tsimykaranaha atahi mysapyzeken mohyrikosokda. Hozipyrykzatsa

watsa — Suão niy. Sesus soho iwa nitsasoko. <sup>30</sup>Tapara isoho iktsasoko. Ahape icy: — Atahi izikwyrēnikita ana hi iwaby niy. Uta batu. Kazikwy tsikaeni zuba. Utakta kapurukbyize atakta niwata tu atahi koikny baktatu. Tawahi mynapykyryk — icy. <sup>31-33</sup>— Sesus tsimysapyrēta izikwy tisapyrēna. Taparaka batu kahyrinymyry. Aba kahyrinymyrēta. Tapara Sesus zikwy ty batu tyny. Jatu tu Deus zikpeha:

“Myzubaha tysihasusu” niy ana humo hi zikpeha. Myzubaha pihik eze iksiharasusuku.

Deus zikpehaze tihi: “Atahi tsimysapyrēta izikwy tsizubarēna tsipiny” niy. Iwa tsipiny.

“Utakta kahyrikoso myzipeha. Kahyrikoso mynasik amytudu wata mynasikze maku papyry bete inazok. Ata kino tsimysapyrēta izikwy tisapyrēna tsipiny. Atahi pahatsumuēhī. Atahi kahyrikoso pipehaze ahatur mynapykyry hỹ” niy. Iwa Deus kabo nitsasoko. Zikpehaze iharere bo hyỹ icy — Suão niy. Kyze Suão nitsasokozo.

<sup>34</sup>— Iwaze jobo iktsa icy. Deus tahyrikoso amytudu wata inasikze iktsa icy. Amytudu Sesus papyry bete inazoze ikozo. Sesus Deus zipehata kahyrinymyrēta. Iwatahi ahabo: “Sesus Deus tse babata tsimysapyrēta izikwy tsizubarēna”. Iwa ikiahatsa bo mykara — niy.

#### Tapara babatsa Sesus tuktsa.

<sup>35</sup>Iwaze Suão Batista Sesus bo nikozozo. Suão zinymyrykynahatsa petoktsa tuk niriktohoko. <sup>36</sup>Iwaze Sesus ziharamuze.

— Iktsaziu tahaktsa — Suão niy. — Atahi Deus zipehata. Hozipyrykzatsa wata myzubaha pibezena. Sisopyksapybyitsa sapyzeka mohyrikosokda — niy.

<sup>37</sup>Niahatsahi Suão zinymyrykynahatsa iharere ziwabynahaze zerekiknaha. Sesus hapik niukurunaha. <sup>38</sup>Sesus tasukpe bo uwok nize sibo iktsa niy. Ispe niy:

— Amo sa kapik tsinakurunaha. Amy sa tsipiberikinaha — niy.

— O myhyrinymyrytsa haneze sa awanu sapy — petoktsa iapik niukurunahatsa nikaranaha.

<sup>39</sup>— Pany! Katuk tyzinyre — niy.

Iwaze Sesus hapik niukurunaha. Iwanu sapy bo zumukunaha. Tyk boze niy. Ibaze nidyhydyhykynaha. Ituk nipamykysokonaha. Ibaze tu zunubaiknaha.

<sup>40</sup>Ādere inarokota. Atahi Simaõ tsy niy. Suão ziwabyze Sesus hapik niukuru.

<sup>41</sup>Kyze zokorobyi tu atsoko taziky bo niukuru. Zihobykze ipe niy:

— O kaziky Deus zipehata Kiristu tsynynaha. Atahi Deus bo mymyoktyhyrykta my — niy.

<sup>42</sup>Iwaze taziky Sesus bo zioқтыhyryk. Izumuze Sesus ibo iktsaziu niy. Ipe niy:

— O ikia hi Simaõ Suã tse. Abaka mekytu anaro myzik. Sepas ty pinaroko. Sepas Peduru atsatu maha. Petok inarohota atsatu piwatawyky. Atahi harahare wata — mykara.

### Sesus Piripi Natanieu iwa ahatsa nisipeha.

<sup>43</sup>Iwaze izokoroze Sesus:

— Utakta Karireja bo moparak — niy.

<sup>44</sup>Tapara jubyi tu Piripi ziberiki ipe niy:

— Aidykta katuk — niy. Piripi Betesaida ezekta niy. Anaeze ãdere Simaõ ahatsa zikzurukunaha Betesaida ezektsa niaha. Sesus Piripi zihobykze ipe:

— O katukta — niy.

Piripi hyĩ niy. <sup>45</sup>Kyze Piripi Natanieu iberiki zihobykze. Ipe niy:

— O Natanieu katsaktsa Deus zipehata tsinynaha. Tubabatu Moises isoho ziwatahakata. Tapara Deus sohotsitsa niwatihi isoho ziwatahakanahatsa. Abaka tsinynaha. Sesus inarokota. Soksetse. Nasare ezekta — niy.

<sup>46</sup>Niytahi Natanieu ipe niy:

— Anahi batu kanyhy niy. Tyzeka ja amy Nasare eze ja tisapyrēna — niy.

— Pany katuk iktsa tsimy! — Piripi niy.

<sup>47</sup>Iwaze Sesus Natanieu bo nikoze. Izumuzze Sesus kytsa pe niy:

— Iktsataha. Atahi mozumuku Isareu ezekta. Maku mospihikbatabyikita tsimysapyrēta — niy. Iwa Sesus Natanieu soho nitsaso.

<sup>48</sup>Iwaze Natanieu Sesus pe niy:

— Haneze sa sikny — niy.

— O tapara Piripi zaberiki, uta botu any, ikia umaha pukezi tsikdyhykyze anaeze any — Sesus niy.

<sup>49</sup>Natanieu ipe niy:

— O ikia Deus tse babata. Ikia Isareu ezekta tu abazubata tsimy — niy.

<sup>50</sup>— O ikia kahumo tsaspirikporēta. Tapara umaha pukezi tsikdyhykyze any tawy iwatahi kahumo tsaspirikporēta. Kazikwy hi abazuba bo iktsa tsimy. <sup>51</sup>Utakta maku babata iknasikta ahawata ikyzik, ikiahatsa bijoikpe zoksapare naha bo iktsa tsimy. Kyze tsipinynaha bijoikpe iknyktsa Deus tsumuēhītsitsa kabo nasik nasikiknaha. Iwaze neduk nedukunaha. Ana hi tsipinynaha — Sesus niy.

### Sesus mysukzawy bo niukuru.

**2** <sup>1-2</sup>Kyze petok zuruze Sesus mysukzawy bo niukuru. Mywanu horokwy myikaha Kanaã eze. Kanaã Karireja eze niy. Sesus je imyikaha bo niukuru. Sesus tuk zinymyrykynahatsa kino niwatihi imyikaha bo niukurunaha. Tapara zihitsa ispe niy:

— Pany! Kamyikaha bo tynaha — niy.

Yhỹ niaha. Iwaze simyikaha bo niaha. <sup>3</sup>Kyze duabohotsa tsik zikukunaha. Iwaze duabohotsa tsik nipykze Sesus je tihit tase pe niy:

— Katse duabohotsa tsik nepykba — niy.

<sup>4</sup>— Kaje amykzo byihuktsa. Abaka Deus zikwy piwatawy zeka batu wasani ziky — niy.

<sup>5</sup>Niytatsahi zihitsa tsumuẽhĩtsa pe niy:

— O kytsa katse ahape my zeka hyỹ tsimaha — niy.

<sup>6</sup>Bytykareze tu pihik suk niapykyryk. Napetok napetok napetok pihik suk niy. Pihik suk morosuk ibuzoinikia zuba tsipomobyitsa. Sudeutsa tapara tahadisahakanaha tahatsyhyrypikiknaha. Bykyze tahatsyhyrypikikzonaha simypewytsa niwatihi nisiokipikiknaha. Siwahoro eze pihiksuk tsizubarẽna. <sup>7</sup>Iwaze Sesus zihitsa tsumuẽhĩtsa pe niy:

— Pihik ty susutaha! Pihiksuk tyzihareknahaktsa! — niy.

Hyỹ niaha.

— Pihik ty zak bo tu tyharektaha.

<sup>8</sup>Iwaze pihik ty zihitsa bo nyny tsimaha — ispe niy.

Hyỹ niaha. Iwaze pihiksuk ty okok maraksu maraksu nikaranahaze iwaze zihitsa bo wabehyryk niy. <sup>9</sup>Pihik tu duabohotsa tsik niyzik. Zihitsa ziakpy. Zihitsa batu inyhy. Aty sa pihik duabohotsa tsik nizuknihik anahi batu inyhy. Sitsumuẽhĩtsa zuba zinymyrykynaha. Niytahi zihitsa tasukzakata pe niy:

<sup>10</sup>— Taparaka kytsa bo duabohotsa tsik tisapyrẽna situaktsa bo nyny ziknakaranaha. Bykyze tahasoroknahaze zuba duabohotsa tsik isapybara ty situaktsa bo nyny ziknakaranaha. Ikiakta batu. Aba zuba ikia duabohotsa tsik tisapyrẽna tsipokzitsarẽna mybo nyny tsiky — niy.

<sup>11</sup>Iwaze Sesus zinymyrynahatsa ihumo sispirikporẽtsa.

— O atahi Deus zikwy ziwatawy — nikaranaha. Tapara Deus zikwy Kanaã ezektsa bo ziwatawyky. Kanaã Karireja eze niy. Anaeze hi Deus zikwy Sesus tuk niapykyryk niy.

<sup>12</sup>Niahatsahi Kaparanaũ hudikhudikwy bo niaha. Sesus, taje, tatukytsa, zinymyrykynahatsa ahatsa Kaparanaũ bo zumukunaha. Anaeze niapykyryksyknaha.

### Sesus Deus wahoro zubata bo zumu.

<sup>13</sup>Kyze Sesus zinymyrykynahatsa tuk Serusarẽhe bo niukuru. Sudeutsa myikaha bo pororo ziknakaranaha. Tubabatu Deus taparaktsa Esito ekze mekybotu nisioktyhyryk ana bo hi mytsaty ziknakaranaha. Myikaha paskoa inarokoha niy. <sup>14</sup>Deus wahoro zubata isturupeze bo zumuze nitsuk. Anaeze kytsa sizubarẽtsa bo nikoze. Wastuhutsa pikuzatsa ty, hozipyrykzatsa ty, amytudutsa ty iwatsa ty nisihuakaknaha. Utsa kytsa

okyrysaro humo harape bo zihuakaknaha. Anaeze nidyhydyhykynaha. Kytsa inapupunahaze siokyrysaro ty zihuakzonaha. <sup>15</sup>Sihumo Sesus taokaniki. Pikuzatsa hwyk tsaziki ty tsizezerēna ty wabe niy. Kytsa ipokso zipobaiknaha. Aidy nitururuknaha. Kytsa tahapybyspyk niwakbaiknaha. Hwibihitsa nisitsihipetotokbaik. Okyrysaro tsizubarēna zitōbaik. <sup>16</sup>Sesus opykani huahua niy:

— Ahanamy ty ka wabehyryktaha! Ikiahatsa kazo wahoro zubata eze ahanamy zozowy tsizukninaha ba zikaha. Niwazubaktsa. Nabo pāotaha — niy.

<sup>17</sup>Iwaze zinymyrykynahatsa ibo iktsa nikaranahaze mytsaty nikaranaha. Tubabatu Deus harere papeu humo ziwatahaka ana bo hi mytsaty nikaranaha.

— O Deus awahoro zubata kytsa ataeze hi simysapybyikitsa mykaranaha. Iwatahi taokaniki — niy. Iharere bo mytsaty nikaranaha.

<sup>18</sup>Iwaze Sudeutsa taparaktsa Sesus pe niaha:

— Aty sa ape niy: “Kytsa Deus wahoro zubata eze tysiksiwyhiktsa!” Aty sa anaharere ape niaha. Deus zikwy ty mybo tsiwatawykta! Deus zikwy mybo tsiwatawy zeka wasani — niaha.

<sup>19</sup>Sesus ispe niy:

— Ikiahatsa Deus wahoro zubata tsipitsehepetotokbaiknaha zeka usta wahoro mektatu mozoknizo. Mektatu ezytyk mozoknizo. Harakykbyihi puru nahatuk tu pikymy h̄y — niy.

<sup>20</sup>— Batu ba niaha. Harakykbyihi puru nahatuk tu Deus wahoro zubata mektatu ba zikukni mybarapetu tsimykara — niaha. — Mytukytsa



(Suão 2.15)

tubabatu tawahoro nizuknikinaha, kuarêta seis niytyk tseheze zikymynaha. Paze harakykbyihi puru nahatukta zuba mektatu ba zikzuknizo — niaha.

<sup>21</sup>Sesus harere humo batu sihyrinymyry. Iharere tsihokdaharêna. Nitsasokoze wahoro tanury humo ziwatawyky. Inury wahoro wata niy. Mohyrikosokdaze petok puruze mynahyrikiziko mykara. Anahi ziwabykynahatsa batu sihyrinymyry. <sup>22</sup>Sesus nahyrikizikoze anaharere bo mytsaty nikaranaha. Iharere ty zinymyrykynahatsa mytsaty nikaranaha. — Deus harere wasani my, hawa ha ty Sesus nitsasoko inury soho atsatu niy — nikaranaha. Iwaze iharere bo hyÿ nikaranaha ihumo sispirikporêtsa niyziknaha.

### Sesus mywatu nimynyba.

<sup>23</sup>Sesus Serusarêhe eze tuze kytsa sizubarêtsa ihumo sispirikporêtsa moziknaha. Paskoa myikaha myze sizubarêtsa ihumo sispirikporêtsa moziknaha. Deus zikwy ty ituk iktsa nikaranahaze iwatsahi iharere bo hyÿ nikaranaha ihumo sispirikporêtsa niyziknaha. <sup>24</sup>Sesus sibo tasoho ty batu watawy sihumo tsimytsatyharêta nikara. <sup>25</sup>Kytsa mytsaty mykaranaha ana humo hi Sesus tsihyrinymyrêta. Sesus batu tyso:

— Hawa takta sa mytsaty my — my. Iwa batu tyso. Amy ty kytsa mytsaty mykaranaha humo tsihyrinymyrêta hÿ.

### Nikodemus Sesus bo nikozore.

**3** <sup>1-2</sup>Unata eze Nikodemus inarokota Sesus bo zumu. Taparakta Pariseutsa Sudeutsa niy. Atahi unata wahoro hara bo nidoko. Atahi: — O myhyrinymyrytsa! Ikia mopyktsa babata tsihyrinymyrêta. Deus zikwy ty kytsa bo tsipiwatawyky. Ikia zuba Deus harere bo hyÿ tsihyrinymyrêta. Deus zikwy ty mybo tsipiwatawyky. Iwaze katsa tsihyrinymyrêta Deus ikia zapehaka tsihyrinymyrêta — niy.

<sup>3</sup>Sesus ipe niy:

— Tsiwabytotokta! Hawa haja motsasoko wasani my. Ikia kyripuruzo ahahabyizeka batu Deus tyryk zikyzyk. Deus tyryk tsihyrinymyrêta zeka tsihyrinymyrêta — niy.

<sup>4</sup>Iwaze Nikodemus hi:

— Hawa sa maku tapykta tu mopurukzo. Taje harakoke bo ba ziktsukzo — niy.

<sup>5</sup>Niytahi Sesus ipezo niy:

— Hawa motsasoko wasani my. Maku pihik ikny nipurukze niy. Maku mopurukzoze Deus hyrikoso ituk mynapykyryk iwaze Deus tyryk mozik. Iwa mopurukzo zeka Deus tyryk mozik. <sup>6</sup>Tsikpuruknahaze myje ikny katsa myzotsa hyrytsa zuba tsimaha. Katsa tsihyrinymyrêta Deus hyrikoso humo iwatsahi katsa Deus tyryk tsihyrinymyrêta. <sup>7</sup>Iwatahi ape my:

“Tsimypupurukzonahakta” my. Iwaze ikia batu apyby Deus tyryk tsimozikta iwa abo motsasokoze mytsaty mytsaty byity tsimy. <sup>8</sup>Zopoktsa nabybykynahaze hana ikny ja batu myhyrinomyry siakpyri zuba piwabynaha. Hana bo mokurunaha batu myhyrinomyry. Ba nabo myku zikaha. Atsawatu hawa Deus tyryk tsimozik batu ahyrinomyry, Deus hyrikoso kino zopoktsa waha nabybykyk my. Hana ikny ja batu myhyrinomyry. Hana bo ja batu myhyrinomyry. Katsa Deus hyrikoso humo ityryk tsimoziknaha iwa ahahyrinomyrëtsa zuba — niy.

<sup>9</sup>Iwaze Nikodemus ipe niy:

— Hawa sa my. Aharere humo batu kahyrinomyry — niy.

<sup>10</sup>Sesus niy:

— Ikiakta Isareu ezekta sihyrinomyrykytsa iwata tu sa batu ahyrinomyry. <sup>11</sup>Amy ty inyomyryky hi anahi motsasoko. Amy ty botu iwaby anahi zuba motsasoko. Tanyhyhi motsasoko. Ikiachatsa kaharere batu ahakparawy — niy. <sup>12</sup>— Ikiachatsa Deus tyryktsa tsimoziknaha ana soho hi motsasoko. Anahi motsasokoze kaharere humo batu yhỹ tsimaha. Kaharere bo hỹ tsimaha zeka hawa Deus tuk ahawahi tsimynapykyknaha anatyhi yhỹ tsimaha — my.

— Kaharere Deus tuk ahawahi tsimynapykyryknaha soho anatyhi hỹ tsimaha. Batu ahahyrinomyry mytsaty my. <sup>13</sup>Uta zuba bijoikpe ikny iknasik. Iwatahi kytsa bo motsasoko. Zikynaha tahi kytsa bo motsasoko. Utakta Deus zikpehata ahawata ikzyik niy.

<sup>14</sup>Tubabatu Moises pyryhyk hyrikoso barõse nizukni. Na pyryhyk hyrikoso hwi humo typu niy. Kytsa simyitsapyrëtsa pyryhyk hyrikoso bo iktsa nikaranahaze nizororokonaha. Atawahi utakta Deus zikpehata kytsa wata ikzyik iwaze kytsa iharapatawyhyta humo pikyryziknaha. <sup>15</sup>Kytsa kaharere bo hỹ mykaranaha zeka kahumo sispirikporëtsa maha. Kytsa kahumo mospirikponaha zeka Deus tuk tahawahi mynapykyryknaha. Kahumo sispirikporëtsa Deus tuk tahawahi mynapyrykyknaha h̃ỹ <sup>16</sup>Yh̃ỹ, Deus mybarawy ezektsa humo tsimypokzitsiarëta. Nawatsa humo tsimypokzitsiarëta babata. Iwatahi tatse zipaha. Estuba zuba itse babata. Asaktsa kahumo mospirikponaha zeka Deus tuk mynapykyryknaha, ituk tahawahi mozurukunaha. Deus tuk mynapykyryknaha ba zikykbazonaha. <sup>17</sup>Deus tatse izipehaze myhumo iakyri byita. Ba kaeze ëryk zikahasapynaha. Iwatahi uta mozumuze kazo bo pahaoktyhyryk niy iwaze mybarawy ezektsa humo batu iakyri.

<sup>18</sup>Aty Deus tse babata humo ispirikpo zeka Deus bo mymyoktyhyryk. Deus ihumo ba ziktaokani. Aty kaharere bo hỹ ahabyi zeka atahi Deus bo ba zikmyoktyhyryk Deus ihumo tsiakyriukrëta. <sup>19</sup>Deus tatse zuba zipaha. Sizubarëtsa sisopyksapybyitsa tu nikaranaha nisiwatawyky. Wasani mykara nisiwatawyky. Atahi okoroze ky wa. Myzubatsa ihumo batu siakparawy. Sisopyksapybyitsa nikaranaha iwatsahi ihumo batu

siakparawy. Asahi miwa ha nizihikiknaha. Iwatsahi batu ihumo sispirikpo.

<sup>20</sup>Sizubarêtsa sisopyksapybyitsa tu nikaranaha ana humo hi kaharere bo batu yhȳ zikaha. Sisikpybyrêtsa ustsá kytsa humo. Asahi kytsa papatu nikaranaha, asaktsa sibo iktsa mykaranaha zeka sisikpybyrêtsa. Miwa ezektsa watsa ustsá ba ziksinyaha. Iwa humo hi sisikpybyrêtsa.

<sup>21</sup>Ustsá kytsa kaharere bo hȳ mykaranaha simysapyrêtsa, kahumo sispirikporêtsa iwatsahi tisapyrêna ty mykaranaha. Ihumo wasani mykaranaha ana humo hi kytsa sihyrinymyrêtsa. Iwororoha ezektsa watsa ustsá mysinyaha batu sisikpyby — niy. Iwa Sesus Nikodemus tuk nipamyksoko.

### Sesus Suão ahatsa.

<sup>22</sup>Kyze Sesus tuk zinymyrykynahatsa ituk Sudeja bo niukurunaha. Anaeze niapykyryksykyk naha kytsa nisiharasusuku. <sup>23</sup>Suão Batista niwatahi myzubaha nisiharasusuku. Eno eze. Eno Sarí paúk baze niy. Pihik tsizubarêna eze hi nisiharasusuku. <sup>24</sup>Suão ihurukuhubyzetu myzubaha nisiharasusuku. Aiba tohi zuba kytsa sakyriukanikitsa hurukwy bo nitsahuruknaha.

<sup>25</sup>Suão Batista tuk zinymyrykynahatsa Sudeu zipehakanaha. Asahi: — Aty sa wasanita nikaranaha Suão nisiharasusukuze ja nikaranaha. Sesus nisiharasusukuze ja. Aty sa wasani — nikaranaha. <sup>26</sup>Iwatsahi Suão pe niaha: — O myhyrinymyrytsa! Botua ikia amakta taba buburu tsiky. Mytuk maku nipykyryksykyk. Botua isoho ty mybo tsiktsasoko, Sesus my. Atahi myzubaha nisiharasusuku. Sizubarêtsa iapik mokurunaha. Ikia hapik ba ziktururuknaha — niaha.

<sup>27</sup>Iwaze Suão ispe niy:

— Ana humo hi kakurêta my. Deus zuba tazikwy ty myzubaha bo nyny my. Asaktsa Deus humo Sesus harere piwabytotokonaha asa bo hi izikwy ty sibo nyny my — niy. <sup>28</sup>Botua ahabo iktsasoko.

— Utakta Kiristu byita atakta Deus zipehata my. Taharaze zuba zikpeha — niy. Iwaze isoho motsasoko.

<sup>29</sup>— Maku tasukzata tsakurêta my. Itukta kino niwatihi ihumo tsakurêta. Tasukzata mokoze itukta ihumo tsakurêta. Utakta itukta wata my. Myzubaha Sesus tuk mokurunaha, ana bo hi mokoze kakurêta. Isukzata tukta wata my. <sup>30</sup>Sesus zinymyrykynahatsitsa sizubarêtsa. Katuk zinymyrykynahatsa batu sizuba. Wasani my iwatahi kakurêta — my. Iwa Suão zinymyrykynahatsa pe niy.

### Atahi bijoikpe iknykta inasik tsimysapyrêta.

<sup>31</sup>Atahi bijoikpe iknykta tsimysapyrêta my. Ata zuba tispirikporêta. Mybarawy ezektsa batu. Aparakbahatsa tsikaeni zuba sihyrinymyrêtsa

maha. Mybarawy soho eziky ty zuba mopamykysokonaha. <sup>32</sup>Atakta bjoikpe iknykta ihyrinymyrēnikita hỹ. Ata kino nikozo naha zuba motsasoko. Ziwbaby naha zuba motsasoko. Batu sizuba iharere bo hyỹ mykaranaha. <sup>33</sup>Kytsa iharere bo hyỹ mykaranahaze asahi — Deus tsimysapyrēta wasape mykara — mykaranaha <sup>34-35</sup>Deus tihi:

— Utakta katse Sesus pipehaka. Ihumo kamypokzitsiarēta. Kahyrikoso ituk tawahi mynapykyryk. Kahyrikoso hi izikwy kazikwy hi atsatu my. Ata kino wasaniha zuba natsasoko. Kahyrikoso humo zikwy tsizubarēna — niy.

<sup>36</sup>Iwaze aty Deus tse harere bo hyỹ mykara, atahi meky watu mozik, atahi tawahi Deus tuk mynapykyryk. Aty Deus tse harere bo yhỹ ahabyi zeka, atahi Deus tuk ba zikykykyryk. Deus ihumo takyri, iharere bo yhỹ ahahabyizeka iwatahi ihumo Deus takyri. Atahi Deus tuk batu tawahi mynapykyk niy, sinini ykarawy bo myzipeha.

#### Sesus Samarija ezektatsa tuk nipamykysoko.

**4** <sup>1</sup>Kyze Sesus niukuru Sudeja bo Pariseutsa pokso niparak. Tapara kytsa Pariseutsa pe niaha:

— O kytsa Sesus hapik sizubarētsa. Atahi kytsa sizubarētsa nisiharasusuku. Suão Batista tuk zinymyrynahatsa batu sizuba maha — mybarapetu nikaranaha.

<sup>2</sup>Sesus kytsa batu isty harasusu. Zinymyrykynahatsa zuba kytsa nisiharasusuku naha. <sup>3</sup>Anahi Sesus ziwabyze Sudeja ikny niparak. Karireja bo ziksizo. Zinymyrykynahatsa ituk niukurunaha.

4— Samarija bo koiknyktsa kytsa! — Sesus niy.

Yhỹ nikaranaha.

<sup>5</sup>Niahatsahi Sikare myzubaha bo zumunaha. Tubabatu taparakta Sako nihyrikosokdaze tahudikhudikwy Sose bo nyny niy itse ziaксе. Sose nihyrikosokdaze niwatihi itsekokatsa tahudikhudikwy ziaксenaha. Sikare myzubaha baze tu nihyrikosokdata Sako hudikhudikwy niy.

<sup>6-8</sup>Iwaze Sesus pihik zokowy bo izumu. Tapara Sako tykoke nizukninaha. Tokbaha niyzikikze Sesus iakubyrizumu tahi pihik zokowy baze nidyhyky. Zinymyrykynahatsa myzubaha bo niaha. Tahadisahawy bo nitururuknaha.

Iwaze wytyk Samarija ezektatsa nabo izumu. Pihik zotsata niparaktatsa Sesus zihobyk iwaze ipe niy:

— O kaboktsa pihik ty uta piku — niy.

9— Batu ikiakta Sudeja ezekta hỹ. Ikza Samarija ezektatsa. Iwaze amo sa “Kabo pihik ty maraktyktsa” tsimykara — niy. Sudeutsaktsa ba Samarija ezektsa opowysuk eze ka ba zikunaha iwatatsahi hỹbyi nikara.

<sup>10</sup>Sesus:

— O amy tisapyrēna zuba Deus abo nyny my hỹ. Ana humo hi ja tsahyrinymyrētatsa “Kaboktsa pihik ty” botu ape iky — niy. Amy tsa

ty hỹ zeka iwatahi Sesus niy. — Ikia batu kabo nyny tsimy. Tsikny zeka ikia kino “kabo ky pihik ty” tsimyze. Yhỹ my. Utakta Deus pihik baba ty abo nyny my. Ana tsipikuze mekywa tu tsimozik. Tsimyhyrikosokdaze tsinahyrikpoze, Deus baze awahi tsimynapykyryk — Sesus niy.

<sup>11</sup>Niytatsahi:

— O ikia sa batu apihikzowyky pihik zowy tsiokitsihizezerēna batu izowyky. Hawa sa pihik ty marak tsimy — niy. <sup>12</sup>— Tubabatu mydiri nihyrikosokdata Sako tykoke ziuku. Iwatahi pihik atsaeye ky zikzikuku. Ihyrytsa niwatihi pihik zikzikukunaha. Siraratsa kino niwatihi pihik zikzikukunaha. Niytahi pihik hoke itsekokatsa ziaksenaha. Mybo nizapikso. Sako harere kytsa ziwabyziunaha. Maku abazubata niy, pihik zikuku. Hawa skaraba ikia hi ja abazubata — niy.

<sup>13</sup>Niytahi Sesus ipe niy:

— Aty na pihik piku zeka tsiarupukrētazo. <sup>14</sup>Uta pihik ty abo nyny maha tsipiku zeka ba iarapuruk zikzumuzo. Pihik mekywaha ty abo nyny my. Hawa pihik pupuputsa watsa pihik batu zepyk pihik ty abo nyny my zeka awahi tsimynapykyk iwatastahi ba iarapuruk zikzumuzo. Ba ziktsehezo pupuputsa watsa iwaze mekywa tu tsimyzuruku. Tsimyhyrikosokdaze tsimynahyrikpo iwaze awahi Deus tuk tsimynapykyryk — niy.

<sup>15</sup>Ana ziwaby tatsahi:

— Ana pihik ty kabo nynyty ky niy. Iwaze ba karapuruk ziyk. Ana pihik ty kabo nyny tsimyzeka pihik ba zikzizozo — niy.

<sup>16</sup>Niytahi:

— Abarikta kabo tyzioktyhyktsa! — niy.

<sup>17</sup>— Batu ba. Ikza ba kabarikta ka — niy.

— Ikia wasape tsiky niy. Tsiktasazoze “Ikza batu kabarikta ka” wasape tsiky. <sup>18</sup>Ikia kytsa katsyhyrytsa watsa tu tsiksiakse. Abakta abariktabyitatu aktaba haĩ niy. Deus okzeka batu amysapy iwaze kape tsikyze:

“Ikza batu kabarikta ka” wasape tsiky — niy.

<sup>19</sup>Iwaze ipe niy:

— Ikia Deus sohokotsa babata tsimy. <sup>20</sup>Katsa tsimypamykysokonaha anaeze hara bete Deus pe “O ikia tsamysapyrēta” tsimykaranaha. Iwa mydiritsa nihyrikosokdanahatsa nimyhyrinymyrykynaha. Ikiahatsa Sudeutsa tsimypamykysokonaha, nabo Serusarēhe eze zuba Deus pe. “O ikia tsamysapyrēta” tsimykaranaha. Aty sa wasani mykara — niy. Iwa atatsa Sesus pe niy.

<sup>21</sup>Niytahi:

— Aibani hara bete Deus bo batu tyso “O Deus myzo ikia zuba tsamysapyrēta” tsimaha. Serusarēhe eze Deus bo batu tyso.

“O Deus myzo ikia zuba tsamysapyrēta” tsimaha — niy. <sup>22</sup>— Ikiahatsa Samarija ezektsa tsimaha. Deus soho humo ahahyrynomyry byitsa tu ikiahatsa tihi:

“O Deus ikia tsamysapyrêta” tsimykaranaha. Ikiyahatsa batu ihumo ahaspirikpo. Katsaktsa Sudeutsa tu. Ihumo myspirikporêtsa. Deus Sudeutsa nisinyky. Deus bo mymoktyhykta niyzik. <sup>23</sup>Kyze abaka ikiahatsa Deus tyryktsa tsimoziknaha. Iharere bo hyÿ tsimykaranaha. Amy motsasoko anaty hi tsimykaranaha. Wasani tsimaha. Iwaze Deus ahahumo tsakurêta. Iwa tsimyzurukunaha zeka tsakurêta — Sesus niy. <sup>24</sup>— Deus inurybyita ihyrikoso zuba my. Batu zinynaha. Kytsa Deus humo sakurêtsa maha zeka wasani mozurukunaha. Hawa wasani zuba motsasokonaha. “O Deus ikia zuba tsamysapyrêta mykaranaha” — niy.

<sup>25</sup>Kyze atatsa ipe niy:

— Deus myzipehata mywata mybarawy bo mynasik. Kiristu mozumuze ihumo myspirikporêtsa tsimoziknaha, atahi Deus bo mymyoktyhyryk niy. Ana humo hi kahyrinymyrêtatsa — niy.

<sup>26</sup>— Uta hiba Deus zikpehata. Utakta abo mopamykysoko Deus zikpehata my — niy.

<sup>27</sup>Iwaze babatu zinymyrykynahatsa sidisahawy tuk ziksikizonaha. Sesus atatsa tuk iktsa niahaze paikpa mytsaty nikaranaha. Batu tyso niaha — O Sesus amo sa ituk tsikpamykysoko. Hawa sa ituk tsiky kara — iwa batu tyso nikaranaha.

<sup>28</sup>Niytatsahi taopowysuk zerekik atsoko myzubaha bo niy. <sup>29</sup>Myzubaha ezektsa pe niy:

— Pany. Maku bo ky niy. Atahi pihik zowy baze nidyhyky. Hawa ha ty ziknakara naha ty kabo nitsasoko. Kiristu Deus zipehata ja iky. Pany ibo ky — niy.

<sup>30</sup>Yhÿ nikaranaha. Iwatsahi myzubaha ezektsa Sesus bo zumukunaha.

<sup>31</sup>Iwaze batu sibo zukbyize zinymyrykynahatsa hi:

— O myhyrinymyrytsa amy ty haukykta — nikaranaha.

<sup>32</sup>— O batu ba. Uta kino meky watu kadisahawy. Ahanyhybara — niy.

<sup>33</sup>Zinymyrykynahatsa asa zuba nipamykysokonaha:

— Aty kok idisahawy ibo zibykare nikaranaha. Mypapatu kok idisahawy ty ibo nyny niy — nikaranaha.

<sup>34</sup>Sesus ispe niy:

— Pikdisaha zeka kakurêta my — niy. — Atsawatu kazo harere bo yhÿ my zeka kakurêta babata mykara. Kazo zikpehatawy iharere humo yhÿ ikykaraze kakurêta. Iharere nihawatu my zeka kakurêta mykara kasoroktawa mokuru. <sup>35</sup>Ikiyahatsa hi: “Napetok napetok nawaze byzoje morahaze kyze arostsas moakuknahaze. Mydisahawytas mokymynahaze arostsas tahazyzyknaha!” tsimaha. Iwa tsimytsasokonaha. Utakta ahape my: “O batu. Abatu nikymy”. Atsawatu mytsaty tsimykaranaha “O kytsa batu sizuba Sesus humo sispirikporêtsa maha” tsimaha. Ahape my. Iktsa tsimahaktsa! my. Kytsa asahi kaharere bo hyÿ mykaranaha kahumo sispirikporêtsa sibo iktsa tsimahaktsa! Abatu kahumo sispirikporêtsa

maha. Ba byri hu tsimaha. Arotsa moakuknahaze tsa watsa abatu kytsa kaharere bo hỹ mykaranaha kahumo sispirikporêtsa maha — niy.

<sup>36</sup>— Maku siriktsa nisiparikik niy. Mektatu arotsa nisizyzykyk niy. Kytsa petoktsa arotsa humo sakurêtsa. Atsawatu maku kasoho motsasoko, mektatu kasoho humo mysihyrinymyry iwatsahi kytsa kahumo sispirikporêtsa, ana humo hi kytsa petoktsahatsa sakurêtsa. Iwatsahi kytsa kahumo sispirikporêtsa sakurêtsa h̃y. Asahi nahyrikponahaze katuk tahawahi mynapykyryknaha ana humo hi sakurêtsa h̃y — Sesus niy.

<sup>37</sup>— Estuba maku atazuba mysiparik iwaze maku mektatu mysizozek mykaranaha. Wasani maha. <sup>38</sup>Atsawatu estuba maku hi kasoho kino motsasoko mekta tu kytsa kahumo mysihyrinymyryknaha. Iwatsahi kytsa sizubarêtsa kahumo sispirikporêtsa. Kaharere tsimytsasokonaha zeka ana humo hi kytsa kaharere bo hỹ mykaranaha. Kahumo sispirikporêtsa zeka mekywatsatu moziknaha. Utsa kytsa botu kasoho nitsasokonaha iwatsahi siharere humo kaharere bo hỹ mykaranaha iwaze sispirikporêtsa moziknaha iwatsahi ahakurêtsa tsimaha — niy.

<sup>39</sup>Kyze Sikare ezektsa Sesus bo zumukunaha. Ihumo sispirikporêtsa. Atatsa harere ziwabynahaze Sesus harere bo hỹ mykaranaha iwatsahi ihumo sispirikporêtsa moziknaha. Atatsa nitsasokoze:

— Hawa ha ty ziknakara naha ty kabo nitsasoko — atatsa harere ziwabynahaze. Iwatsahi Sesus humo sispirikporêtsa h̃y. <sup>40</sup>Iwaze Samarija ezektsa zumukunahaze ipe niaha:

— Pany mywahoro bo paku tyny — nikaranaha. Yh̃y niy. Anaeze situk petok zurure.

<sup>41</sup>Mektsatu ihumo sispirikporêtsa. Sibonitsasokoze myzuba ihumo sispirikporêtsa. <sup>42</sup>Asakino atatsa pe niaha:

— Tapara katsaktsa Sesus bo hỹ tsimaha ihumo mspiririkporêtsa ahare humo tsikykaranaha. Abaka katsa ihumo mspiririkporêtsa ihare humo. Atahi mybarawy ezektsa mysioktyhykta — nikaranaha. Iwa atatsa bo nipamykysokonaha.

### Sesus taparakta tse zizorowoy.

<sup>43</sup>Kyze petok zuruze Sesus Karireja bo ziksizo. Samarija ekzeka niparak Karireja bo niukuru. <sup>44</sup>Tapara Sesus ziknatsasoko — O Deus sohokotsa tahudikhudikwy ezektsa okzeka ihare bo batu waby zikaha. Utsa kytsa ihare bo piwabyziukunaha, tahudikhudikwy ezektsa batu — Sesus niy:

<sup>45</sup>Kyze Sesus bo zumuze Karireja ezektsa Sesus humo sakurêtsa nikaranaha. Asahi Serusarêhe amyikaha bo niaha. Anaeze Sesus bo nikozonaha. Deus hyrikoso ituk mynapykyryk zinyanaha. Deus zikwy ituk zinyanaha. Iwatsahi sibo zumukuze sakurêtsa nikaranaha.

<sup>46</sup>Iwaze Kanaã bo ziksizo. Pihik duabohotsa tsik nizukni nahaeze, Kanaã Karireja eze tu niy. Kyze taparakta Kaparanaũ myzubaha ezekta Kanaã eze tu niy. Atahi:

— Katse tsimyitsapyrêta. Asiba zumuzata atahi Kaparanaũ eze nihoeke, asiba nira — niy. <sup>47</sup>Iwaze kytsa taparakta pe niaha:

— Sesus izumu Sudeja iknykta. Karireja bo. Mybo izumu — niaha. Iwaze taparakta Sesus bo zumuze ipe niy:

— O Sesus tupakta kawahoro bo tsimy, katse moraka. Pany katse tyzizororowykta! — niy. <sup>48</sup>Sesus ipe niy:

— Kytsa kahumo batu sispirikpo. Tapara Deus zikwy humo piwatawyky. Anabo hi iktsa mykaranahaze iwatsahi kaharere bo hỹ maha iwaze kahumo sispirikporêta — Sesus niy.

<sup>49</sup>— O pany Sesus! Aidytykta, katse irabyitu — niy.

<sup>50</sup>— Tsiksizokta! Awahoro bo atse botu nizororo. Tsakurêta niyzik — Sesus niy.

Maku Sesus harere bo hỹ nikara ihumo tispirikporêta nikara. Iwatahi tawahoro ziksikizo. <sup>51</sup>Atazuba tawahoro bo ziksikirize ske pukteze tu itsumuêhītsitsa zihobyknaha. Ipe niaha:

— Atse nizororo. Iwatahi tsakurêta — nikara.

<sup>52</sup>— Katse sa nizororo haramwe haneze ja — niy.

— O jatu tokbaha eze atsoko jokboha niyzik. Abaka iakzobyita mopykyryk baba zizororo niy — niaha.

<sup>53</sup>Jatu kino haramwe tokbahaze Sesus tihi:

— Atse botu nizororo — niy. Iwa Sesus kape niy. Anabo hi mytsaty nikara. Iwatahi Sesus humo tispirikporêta niy. Iwahoro ezektsa kino niwatihi Sesus humo sispirikporêta niyziknaha.

<sup>54</sup>Iwahatu Sesus Deus zikwy ziwatawyky. Sizubarêta bo Deus zikwy ziwatawykyzo niy. Karireja ezektsa bo Deus zikwy ziwatawy. Sudeja ekze niparakze Deus zikwy petok ziwatawy niy.

### Sesus ityryk niakbabata zizororowy.

**5** <sup>1</sup>Iwaze Sesus Serusarêhe bo niukuru. Sudeutsa myikaha bo Serusarêhe bo zumuku. <sup>2-3</sup>Serusarêhe eze zarape waha eze niy. Zarape Betesda inarokoha Sudeu harere niy. Betesda zarape waha eze Serusarêhe hokbowytsa baze niy. Hokbowy hozipyrykzatsa ty inapupukunaha inarokota zumubahani. Iwa katsyhyry watsa iwatsa hokbowytsa iwa niaha. Anaeze kytsa sizubarêta ziknakpykyryknaha. Simyitsapyrêta niaha. Sihyryzikubyitsa, siekbyritsa, sityryktsa niakbabatsa, pãozikahabyitsa iwatsa anaeze ziknapykyryknaha. Sizubarêta ziknasisperykynaha. <sup>4</sup>Bijoikpe iknykta Deus tsumuêhītsa pihik wastuhu ziknasikik. Pihik zikziktsik pepepewyky. Pihik

zikzitsikpepepewykyze kytsa pihik bo ziknautsotsokoknaha. Aty tapara ziknahazukukze zikzizororowy ky.

<sup>5</sup>Anaeze hi Sesus zumu. Maku bo iktsa niy. Atahi tubabatu tsimyitsapyrēta sinini ziknakara niy. Tirīta oito anos niytyk tseheze sinini ziknakara. <sup>6</sup>Sesus ibo iktsa niy. Tubabatu ziknahoekek ana humo hi tsihyrinymyrēta. Iwaze ibo iktsa niyze ipe niy:

— Ikia skaraba hawa tsimy tsimyzororo tsihikik sa — niy.

<sup>7</sup>— Yhỹ niy. Myzororo ikykarazetu — niy. — Batu aty tohi katukta ziky. Batu aty tohi zikmokty pihik bo niy. Uta zuba zeka batu pihik bo ziksi. Iwatahi mektsatu katy haraze mykaranaha hỹ pihik bo. Utakta batu. Mektsatu zuba nazororoko naha — niy.

<sup>8</sup>Iwaze Sesus ipe niy:

— O kyikytkta! Awanu ty kokpuhykytkta. Tsiksikta — niy.

<sup>9</sup>Atsoko itarikto. Tawanu ty kokpuhyryk niy. Niparak niy. Tsakurēta nikara hỹ. Nawazuruze Sudeutsa byrywy zumuze hỹ nikara. <sup>10</sup>Iwatsahi Sudeutsa izororowyhyta pe niaha:

— Aba katsa Sudeutsa tsimymybyrykynaha niaha. Ikia tarabaja tsimy kara. Wasanibara tsimy. Ikia awanu tsipisik, iwatahi tarabaja tsimy kara — niaha. Myhyrinymyrywy tihi:

— Mybyrywy pumuze batu tarabaja zikaha — niy.

<sup>11</sup>Iwaze izororowyhyta ispe niy:

— Zikzororowyta tihi kape niy: “Awanu ty kokpuhyrykytkta tsiksikta” — niy.

<sup>12</sup>Niahatsahi ipe niaha:

— Aty skaraba ape. “Awanu ty kokpuhykytkta tsiksikta!” niy — niaha.

<sup>13</sup>— Batu kanyhy. Inaro batu kawabyhy — niy. Kytsa batu ity nyzo.

Kytsa sizubarētsa anaeze niy. Iwatahi Sesus niparak. Iwatahi maku naro batu iwabyhy.

<sup>14</sup>Kyze Sesus izororowyhyta. Deus wahoro zubata eze zihobyk. Ipe niy:

— Abaka ikia tsikzororo hỹ awatu ty. Tsimynamysapybyi zeka sinini tsimy kara — niy.

<sup>15</sup>Iwaze izororowyhyta Sudeutsa bo ziksizo ispe niy:

— Maku Sesus inaro atahi zikzororowy — niy. <sup>16</sup>Iwatsahi Sudeutsa Sesus nizokyrykynaha. Sesus maku zizororowy zuruze tahabyrykynaha ana humo hi tahakyrikinaha. Iwatsahi Sesus zimyijakaranaha.

<sup>17</sup>Sesus ispe niy:

— Kazo tarabaja mynakara, batu pyk ziky. Uta kino niwatihi tarabaja mynakara — niy.

<sup>18</sup>Iwaze Sudeutsa taparaktsa zibeze tsihikiknaha. Tapara maku zizororowy. Sudeutsa byrykywy eze tuze maku zizororowy. Bykyze nitsaso Deus kazo isopyk niy. Nitsasokoze Deus kazo my, tazikwy Deus zikwy atsatu my nikara. Iwatsahi ihumo tahakyrikinaha.

### Aty sa Deus tse ipehawy.

<sup>19</sup>Iwaze Sesus taparaktsa pe nitsasokozo:

— Hawa motsasoko wasi my. Deus tse babata my. Atazuba batu. Atazuba batu mykara. Hawa Deus mykara naha ty zuba mykara. Hawa Deus motsasoko naha atsatu motsaso. Kazo tsizubarēna mykara atsatu mykara pisopykzuku — niy.

<sup>20</sup>— Iwahatu Deus kahumo tsimypokzitsiarēta. Tatse humo tsimypokzitsiarēta. Iwatahi hawa mykaraze tatse bo piwatawyky. Utakta ihumo myzisopykzuku. Nawa kasoho mytsaty mykara. Jaba maku ityryk niakbabata izororowy anabo hi iktsa tsikaha. Abahi kazo tsizubarēna kabo piwatawyky. Kabo piwatawyky zeka pahawatawyky. Ikihatsa hi: “O tisapyrēna tsimaha.” Tsimypybynaha — niy.

<sup>21</sup>— Kyze Deus siakbatsa mynasihyrikpobawy. Uta kino niwatihi. Kahumo istsihita mysihyrikpowyzo. Deus tse humo mynasihyrikpoba. <sup>22</sup>Deus mybarawy Ezektsa bo batu tyso “O ikia wasani tsimykara. Usta pe batu amysapy tsimykara” my. Batu. Uta zuba mybarawy Ezektsa pe: “Ikia wasani” mykara. Usta pe: “Ikia batu amysapy” mykara — iwa Deus harere kape niy.

— Ikia zuba mybarawy Ezektsa soho tsiwatawyky. Aty ja imysapybyikita tsimytsasoko. Aty tsimysapyrēta tsimytsasoko — niy. <sup>23</sup>— Iwatsahi sizubarētsa kasoho humo maha “O ikia Deus tse babata. Aharere tsiwabyynaha. Tsimyharerewabyrēta tsimy” maha. Asa kino niwatihi Deus harere piwabykynaha. Kaharere bo yhỹ ahabyi zeka kytsa okzeka Deus harere bo niwatihi batu yhỹ maha. Iharere kino batu ziwabykynaha. Atahi zikpehahik iharere siwabyhybyitsa hi batu ma zikaha — niy.

<sup>24</sup>— Amy sa motsasoko wasani my. Aty kaharere bo hỹ mykara zeka meky watu mozik. Tawahi ispituzo Deus tuk mynapykyryk. Atahi zikpehakata humo tispirikporēta. Iwatahi tawahi ispitu mynapykyryk. Deus batu tyso ipe. “O ikia batu amysapy. Sinini ykarawy bo tsimy” my. Iwa batu tyso, batu sinini ykarawy bo ba zipaha. <sup>25</sup>Amy wasani motsasoko. Utakta Deus tse. Abaka sizubarētsa simysapybyitsa mykaranaha. Asahi kaharere piwabyziukunaha siakbatsa watsa maha. Abahi kaharere bo hỹ maha zeka meky watu moziknaha. Kahumo sisipitu tahawahi Deus tuk mynapykyryknaha. <sup>26</sup>Deus zuba mynasihyrikpoko. Kazo kape tynasihyrikpoko iwatahi uta kino niwatihi siakbatsa mynasihyrikpoko. <sup>27</sup>Utakta kytsa wata Deus zikpehata. Deus humo kytsa pe my: “Ikia Deus okzeka wasani” mykara. Utsa kytsa pe: “Ikia batu amysapy” mykara. Deus harere humo iwa motsasoko.

<sup>28</sup>Batu paikpa mytsaty tsimykaranaha. Bykyze siakbatsa kaksoho piwabyynaha. Kaksoho piwabyynahaze tahaytyk ekze myzipunaha.

<sup>29</sup>Asaktsa wasani ziknakaranaha. Nahyrizikpobanahaze tahawahi Deus tuk mynapykyryknaha. Iwaze asaktsa batu simysapy ziknakaranaha nahyrizikponaha kino niwatihi. Simysapybyitsa ziknakaranaha mybara botu tahasapynaha. Tahawahi sinini mynakaranaha. Deus bara botu zitahasapynaha Deus pokso tahawahi mynapykyryknaha. Batu siaku maha — niy.

### Aty sa Sesus zipעה.

<sup>30</sup>— Motsasoko nahaka kaharere bara tu my.

Tapara kazo harere piwaby iwaze motsaso. Tapara kazo mykara bykyze atsatu mykara iwa mozihihik. Botu zikpehata kabo nitsasoko anahi motsasoko. Iwatahi kytsa pe my: “Ikiahatsa ahamysapyrëtsa.” Utsa kytsa pe: “Ikiahatsa batu ahamysapy” mykara. Iwa motsasoze wasani mykara — niy.

<sup>31</sup>— Utatu kasoho motsaso zeka batu sapy. Iharere batu wasani tsinakaranaha. <sup>32</sup>Iwa batu tyso. Usta kasoho motsasoko. Kazo kasoho motsasokoze iharere kino tisapyrëna hÿ iharere humo wasani mykara.

<sup>33</sup>Tubabatu ahatuktsa Suão Batista bo tsipehakanaha. Ata kino kasoho nitsasoko. Hawa ha nitsasoko wasape niy. <sup>34</sup>Iwa Suão Batista kasoho ahabo nitsasoko. Utakta pahaoktyhyryk my, iwa Suão Batista kasoho nitsasoko. Iharere batu kasoho tsihikik ahabo zuba kasoho nitsasoko — Sesus niy.

<sup>35</sup>— Rika inapokze amypubryri mozik. Iwaze parakbaha mokozoneha. Haneze miwa bo mokozoneha. Suão Batista rika wata nikara. Deus harere nitsasoko. Iwaze Deus okzeka wasani ahahyrinymyrëtsa. Anahi Suão harere humo ahahyrinymyrëtsa.

<sup>36</sup>Hawa ha Suão nitsasoko tisapyrëna nikara. Hawa ha uta motsasoziuku tisapyrëna hÿ. Uta Deus zikpehata kytsa wata piwatawyky. Iwahatu kytsa kape maha:

“O azo mybo zapeha. Deus zikwy tsiwatawyky” mykaranaha. <sup>37</sup>Kazo zikpeha kino kasoho motsasoko. Ikiahatsa iharere batu ahawabyhy. Iwaze ihumo batu ahaspirikpo — niy.

<sup>38</sup>— Kazo mybarawy ezektsa bo zikpeha. Iharere bo tsikaeni zuba yhÿ tsimykaranaha. Kahumo batu ahaspirikpo tsihik iwatsahi iharere bo tsikaeni zuba yhÿ tsimykaranaha — niy. <sup>39</sup>— Deus harere botu ziwatahanaha anaty hi tsipinymyryknaha. Ana humo ja Deus tuk mywahi tsinapykyryknaha ba zikaha. Deus kasoho motsasoko. <sup>40</sup>Tsinahyrizikponahaze Deus tuk ahawahi tsimynapykyryknaha. Kahumo ahaspirikporëtsa. Iwa Deus papeu humo nitsasoko. Ikiahatsa kino kahumo batu ahaspirikpo iwatsahi tsinahyrizikponahaze Deus tuk ba ahawahi tsipahasapynaha. Ikiahatsa kaharere bo batu yhÿ tsimaha.

<sup>41</sup>Kytsa kasoho zuba motsasokonaha. Kasoho motsasokonaha zeka. “O atakta tsimysapyrëta my” maha. Mybarapetu sisopyk. Asahi

kahumo tsikaeni zuba siakparawy “O atakta tsimysapyrêta maha” zeka mybarapetu mykaranaha. <sup>42</sup>Ikiahatsa Deus humo batu ahapokzitsi ana humo hi kahyrinomyrêta — niy. <sup>43</sup>— Uta aparakbahatsa bo kazo harere humo my. Zikpeha iharere bo hyÿ ikykara. Ikiahatsa kahumo batu ahaspirikpo. Usta mozumu zeka ipehabyitatu taharere humo zuba mozumu, ikiahatsa iharere bo yhÿ tsimykaranaha.

<sup>44</sup>Deusta atababata zuba my. Batu ustaka. Ikiahatsa Deus ahape my: “O ahamysapyrêtsa tsimaha” anahi batu ahatsihik. Kytsa ahasoho motsasokonahaze “O ahamysapyrêtsa.” Anahi zuba ahakparawy. Iwatsahi kaharere bo batu yhÿ tsimykaranaha kahumo batu ahaspirikpo — niy.

<sup>45</sup>— Utakta kazo bo myze ikiahatsa soho batu tyso. “O batu simysapy maha” my. Ikiahatsa Moises nihyrikosokdata harere humo tsimyzurukunaha iwaze “O katsa wasani tsinakaranaha” tsimaha. Batu ba. <sup>46</sup>Moises nihyrikosokdata kasohe ziwatahaka. Iwaha hi ikiahatsa iharere bo hyÿ tsinakaranaha zeka kaharere bo niwatihi hyÿ tsimynakaranaha. <sup>47</sup>Iharere ziwatahaka naha bo yhÿ ahabyi zeka kaharere bo kino niwatihi ba hÿ tsimaha — niy.

Iwa Sesus Sudeutsa taparaktsa bo nitsasoko.

### Sesus sizubarêtsa nisidisahawyyky.

**6** <sup>1</sup>Kyze Sesus pihik amakta taba zitsikza. Pihikzotsabyri Karireja inarokota niy. Usa inaro Tiberias niy. <sup>2</sup>Kytsa sizubarêtsa iapik niukurunaha. — O Sesus simyitsapyrêtsa nisizororowyky. Ata bo hi iktsa tsimaha — nikaranaha. Iwatsahi iapik niukurunaha.

<sup>3</sup>Iwaze Sesus hara bo nido. Zinymyrykynahatsa tuk nidyhydyhykynaha. <sup>4</sup>Paskoa zumukunahatsa hi Sudeutsa myikaha niy. Paskoa inarokoha myikaha bo pororo ziknakaranaha. Hawa Deus taparaktsa nisitsumuêhîkî anahumo mytsaty ziknakaranaha. <sup>5</sup>Iwaze Sesus aparakbaha inazuzuknahaze sibo iktsa nikara. Êryktsa tu izumukunaha niy. Iwaze Sesus Piripi pe niy:

— Haneziky ty sa mydisahawy sizubarêtsa bo nataskyryk. Haneziky ty sa atsikara nataskyryk — niy.

<sup>6</sup>Sesus ta zuba mytsaty nikara.

— Utakta mysidisahawy. Hawa Piripi mytsaty mykara ana humo hi pinymyryky. Tozeka ja kahumo tspirikporêta nikara iwatahi Piripi pe iky. “Haneziky ty sa mydisahawy nataskyryk” — niy.

<sup>7</sup>Iwaze Piripi Sesus pe niy:

— Batu kahyrinomyry. Myokyrysaro byizeka ihuak bara ty ba zioknaha. Pibiyituhukutu mytyktseheze tarabaja my zeka batu atsikara ba zioknaha. Tarabajaziu mykara zeka ba zikpyk atsikara tsikaeni zuba aparakbaha bo nyny my — niy.

<sup>8</sup>Iwaze Ādere zinymyrykyta Simaõ Peduru tsy tihi niy:

9— O ta zito jabasta mybo izumu. Atahi mytsyhyry wa zuba atsikara, piknutsa petoktsa zuba aha niy. Myzubarêtsa mydisahawy panytu — niy.

<sup>10</sup>Sesus ispe niy:

— Ikiahatsa kytsa pe tsimaha “Tyk bo dyhy dyhy tahaktsa tsimaha” — niy. Nabo towahaditsa tisapyrêna. Kytsa sizubarêtsa tadyhydyhynaha, Sîko miutsa kytsa nidyhydyhykynaha. Wytykyryk sihyrytsa ahatsa niwatihi nidyhydyhykynaha. <sup>11</sup>Iwaze Sesus atsikara ty okok niyze Deus pe niy:

— Ikia humo ka mykurêtsa — niy. Iwaze atsikara ty zinymyrykynahatsa bo nyny niy. Nyny nikaraze tsizubarêna niyzikzik. Ibiakryrbarawa niukuru. Kytsa sizubarêtsa bo nyny nynyzo nikaranaha. Piknutsa kino niwatihi kytsa bo nyny nikaraze sibiakhyhybitsa wa niukurunaha. Nyny nikaraze tsizubarêtsa niyzikiknaha. Iwaze nyny nynyzo niy kytsa sizubarêtsa bo niy. Kyze kytsa tihi:

— O mysorokrêtsa tsikahasorokbyrynaha — niaha.

<sup>12</sup>Tahadisahanahaze Sesus tuk zinymyrykynahatsa pe niy:

— Itsatsakyha ty jerehe peryk bo tsipupunahaktsa! Tsipupunaha zeka wasani my — niy.

<sup>13</sup>Iwaze itsatsakyhy ty arehe ty peryk bo zipupukunaha. Dose mytsyhyry tsawa peryktsa mysipyk naha wa Sesus atsikara ziubara piknutsa tsizubarêtsa nisiubara aha.

<sup>14</sup>Iwaze aparakbaha izikwy bo iktsa niahaze asa zuba nipamykysokonaha:

— Aty skaraba Sesus. Atahi kok tubabatu tsisperykynaha. Atahi Deus sohokotsa babata — nikaranaha.

<sup>15</sup>Iwatsahi Sesus zioqty tsihikiknaha. Ipe maha:

— Ikia mypehatsa tsimozik — maha. Sesus hawa mytsaty nikaranaha tsihyrynymyrêta. Iwatahi atazuba niparak. Hara bo nido niy.

### **Sesus pihik tsiksukpe buruk niukuru.**

<sup>16</sup>Kyze zunubaze zinymyrykynahatsa pihikzotsabyri bo nisiknaha.

<sup>17</sup>Niahatsahi tsaraha sihezōni taeze kokorohy niaha. Kaparanaū bo pihikzotsabyri ziktsikzakanahaze, miwa buruk tu asa zuba niukurunaha. Sesus batu sibo zuk niy. <sup>18</sup>Ziturikinahatsa tu atsoko zopoktsa inabybyknaha. Pihik zopoktsa humo atsoko iheridawy waha.

<sup>19</sup>Turi turi turi nikaranaha. Nokponi turi nikaranaha. Sîko kiometro ziturikinahaze. Kyze atsoko Sesus bo iktsa niaha. Atahi sibo izumuku. Pihik tsiksukpe buruk inaukuru. Harazuk ahabyita inaukuru. Sibo izumubahanikize sipybyrêtsa nikaranaha.

— Aty skaraba — nikaranaha.

<sup>20</sup>Kyze Sesus ispe niy:

— Ahapyby byihuktsa — niy. Uta hiba Sesus ispe niy.

<sup>21</sup>Iwatsahi Sesus pokso batu sipyby. Ipe niaha:

— Pany! Tsaraha bokta! — niaha. Atsoko tsaraha amykta taba niukurunaha bybyby niaha.

### Kytsa sizubarêtsa Sesus ziberikinaha.

<sup>22</sup>Iwaze kytsa sizubarêtsa asa kino pihik amykta taba nitarenaha Sesus ziberikinaha. Asa zuba nizapykykynaha Sesus sa hana bo. Jatuka tsaraha estuba zuba hỹ niaha. Zinymyrykynahatsa tsaraha eze kokokorohyk niaha. Asa zuba koikny niukurunaha. Sesus situk batu ityny niy.

<sup>23</sup>Nipamykysokonahaze usts tsarahatsa bybyby niaha. Tsarahatsa Tiberias iknyktsa. Haneze Sesus kytsa nisidisahawyky naha bazebabatu tsarahatsa bybyby niaha. <sup>24</sup>Iwaze Sesus bo batu zuk ituk zinymyrykynahatsa kino batu niaha tsarahatsa tsihitsa kytsa pe niy:

— Sesus sa hana bo zinymyrykynahatsa kino hana bo sa — niy.

— Pihikzotsabyri botu zitsikzanaha — niaha.

— Yhỹ. Tupakta! Katsa kino siapik tatsikza — niaha. Tsarahatsa eze kokokorohyk niaha. Turi turi turi. Kaparanaũ bo bybyby niaha. Sesus ziberikinaha iwatsahi pihikzotsabyri zitsikzanaha.

### Sesus atsikara hyrity wa.

<sup>25</sup>Myzubaha iziberikinaha. Iwaze zihobyknahaze ipe niaha:

— O mypehatsa hawa eze sa tsikzumu. Katsa tsikaberikiknaha hỹ — nikaranaha.

<sup>26</sup>— Hawa motsasoko wasani my — Sesus niy.

— Ikiahatsa atsikara tsioknahatsawy tsimozikberikinaha. Ana iwatawy naha humo batu ahahyrinymyry — niy. <sup>27</sup>— Ahadisahawy bo zuba mytsaty tsinakaranaha hỹ. Ahasorokrêtsa tsikaha. Usa mydisahawy humo meky watu tsimoziknaha. Ana ty kino hauk tsimaha zeka Deus tyryktsa tsimoziknaha. Tsimyhyrikosokdanaha zeka Deus myzahahyryzikpowyzo iwaze ituk tsimynapykyryknaha. Ahawahi Deus tuk tsinapykyryknaha. Utakta inasikta ahawata ikyzik Deus hi kazo. Atahi:

“Kaharere bo hyỹ tsimykara. Iwatahi tadisahawy kino kytsa bo nyny tsimykara” niy. Ikiahatsa kino niwatihi Deus harere bo hyỹ tahaktsa — Sesus niy.

<sup>28</sup>Iwaze Sudeutsa ipe niaha:

— Hawa skaraba katsa Deus harere bo hyỹ tsimykaranaha hawa skaraba Deus mozihikik — niaha.

<sup>29-31</sup>Deus hi:

— Atahi ahabo ipehata humo tyspirikponahaktsa! — niy. — Utakta Deus zikpehata. Kahumo tsimyspirikponaha zeka Deus harere bo hyỹ tsimaha — Sesus niy. Kytsa Sesus pe niaha:

— Taparaktsa myzotsa jerukbara eze atsikara waha ty tahadisahakanaha. Deus harere papeu humo ziwatahaka “Moises bo

nipamykysokoze atsikara waha kytsa bo inatsuku. Atsikara waha bijoikpe ikny kytsa nisidisahawykynaha” — iwa Moises Deus zikwy sibo ziwatawyky.

— Ikia ja. Azikwy ty sa mybo tsipiwatawy tsimykaranaha. Iwaze zuba ahumo mysipirikporëtsa tsimoziknaha — tsimykaranaha.

<sup>32</sup>— Hawa utakta motsaso wasani my. Moises atsikara ty zuba kytsa bo nyny nikara. Ana atsikara morapa hwiwy zubaha niy. Kazo hi atsikara babata kytsa bo nyny mykara. Ana atsikara baba humo kytsa meky watu moziknaha. Deus tyryktsa moziknaha atsikara baba humo — niy. <sup>33</sup>— Deus atsikara ty mybo nyny my bijoikpe iknyky. Utakta atsikara waha, uta hi bijoikpe iknykta. Uta kino kytsa kahumo meky watu moziknaha niy. Mynahyrikponaha kahumo tahawahi Deus tuk mynapykyryknaha — niy.

<sup>34</sup>Kytsa ipe niaha:

— Anaty mybo nyny tykta! Ana hi mydisahawy mozik. Mydisahawy ty mybo nyny tynakara — nikaranaha.

<sup>35</sup>Sesus niy:

— Uta hiba atsikara baba niy. Deus myzubaha bo nyny mykara. Ikiahatsa kaharere bo hyÿ tsimykaranaha. Kahumo tsimysipirikponaha zeka ahakurëtsa tsimoziknaha iarapa byitawata tsakurëta. Ikiahatsa kahumo tsimysipirikponaha zeka aharapabyitsa watsa tsimoziknaha. Ahakurëtsa tsimykaranaha.

<sup>36</sup>Ikiahatsa kaharere bo batu yhyÿ tsimaha. Utakta kazikwy iwatawyky anabo hi tsinynaha. Iwa humo kabo batu yhyÿ zikaha. <sup>37</sup>Aparakbaha kahumo mysipirikpoko ana hi kazo mozihikik. Iwatsahi kahumo sispirikporëtsa mykaranaha. Aty skaraba kahumo tispirikporëta atahi batu tyso “O ikia kahumo batu spirikpo, iwahi ba ziktsaso” — niy.

<sup>38</sup>— Utakta bijoikpe ikny iknasikze Deus harere bo zuba hyÿ mynakara. Hawa sa mozihikik naha humo batu yhyÿ iky iwa humo batu zuk. Atahi zikpeha iwatahi iharere bo zuba hyÿ mykara. <sup>39</sup>Hawa sa Deus mozihikik. Kytsa asahi kahumo mospirikponaha mysipokzitsiki. Iwatsahi kahumo sispirikporëtsa ba ziksiere. Mybarawy mopykze kahumo sispirikporëtsa mynahyrikponahaze Deus tuk tahawahi mynapykyryknaha.

<sup>40</sup>Yhyÿ kazo harere bo mykara. Aty skaraba katse harere bo hyÿ mykaranaha asahi ituk tahawahi mynapykyryknaha. Mybarawy mopykze kahumo ituk mynahyrikponaha. Ana kino Deus harere bo my hyÿ — Sesus niy.

<sup>41</sup>Kyze Sudeutsa asa zuba isoho zisapybyrikinaha. Nitsasokoze:

— Uta hiba atsikara waha, uta hiba bijoikpe iknykta nikara — ana humo hi zisapybyrikinaha.

<sup>42</sup>— Iwatsahi nikaranaha hawa skaraba. O atahi sa Sesus zuba. Sose tse sa nikaranaha. Ije niwatihi tsinynaha. Hawaha ta sa “Utakta bijoikpe

iknykta” nikara. Atahi mybarapetu nikara — nikaranaha. Iwa asa zuba zisapybyrikinaha.

<sup>43</sup>Iwaze Sesus ispe niy:

— Awatutahaktsa ahamysapybyrihuktsa! — niy. <sup>44</sup>Kazo zikwy humo zuba kytsa kahumo sispirikporëtsa. Ata kino zikpeha iwaze kytsa kahumo mysispirikpoko. Mybarawy mopykze asahi mynasihyryzikpo iwa Deus tuk tahawahi mynapykyryknaha.

<sup>45</sup>Tubabatu Deus sohokotsa iharere papeu humo ziwatahakanaha:

— Aparakbaha Deus mysihyrynymyryky — niy. Iharere hi kasoho my. Kytsa kahumo mospirikponaha zeka ana kino Deus kazo ihyrynymyrywy. Ana humo hi mysihyrynymyryky. <sup>46</sup>Batu aty tohi Deus ityny my. Uta zuba iny atahi zikpeha.

<sup>47</sup>Motsasoko wasani my. Aty skaraba kahumo tispirikporëta atahi mynahyryzikpoze Deus tuk tawahi mynapykyryk niy. <sup>48</sup>Sesus tihi:

— Utakta atsikara baba my. Kahumo kytsa meky watu mozurukunaha. Deus tyryktsa moziknaha. Kahumo simysapyrëtsa moziknaha.

<sup>49</sup>Taparaktsa ahazotsa niakbakanahatsa jeruk bara eze atsikara waha ziokoknaha. Iwatsa tu niakbakanaha. <sup>50</sup>Aba atsikara baba soho ahabo motsasoko. Ana ty tsimymydisahanaha zeka ba zikumuzanaha ana hi bjoikpe iknykyry. Deus tuk mywahi tsimynapykyryknaha — niy.

<sup>51</sup>Utakta hi bjoikpe iknykta my. Mybarawy ezektsa bo iknasik. Myzubaha mekywatsatu ziyziknaha iky. Kytsa kahumo sispirikporëtsa mohyrikosokdanahaze Deus tuk tahawahi mynapykyryknaha. Atsikara ty sibo nyny my ana hi katsani. Katsani ty mybarawy ezektsa bo nyny my. Iwatsahi mynahyryzikponaha asahi Deus tuk tahawahi mynapykyryknaha.

<sup>52</sup>Iwaze Sudeutsa asa zuba nipamykysokonaha.

— Hawa skaraba Sesus tatsani ty mybo nyny my. Hawa skaraba inury taboro — nikaranaha.

<sup>53</sup>Sesus ispe niy:

— Hawa motsasoko wasani mykara. Utakta Deus zikpehata ahawata ikyzik. Ikiyahatsa katsani ty hauk ahabyizeka batu Deus tyryktsa zikyziknaha. Batu meky watu zikyziknaha. Ikiyahatsa kaspu ty tsõ ahahabyizeka batu Deus tyryktsa zikyziknaha. Batu meky watu zikyziknaha.

<sup>54</sup>Aty katsani pihauk zeka Deus tyryk mozik. Mekywatu mozuruku. Aty kaspu piku zeka Deus tyryk mozik. Mekywatu mozuruku. Tsimysapyrëta mozik. Mybarawy mopykze mynahyryzikpo. <sup>55</sup>Iwatahi katsani mydisahawy baba my. Kaspu mypowy baba my. <sup>56</sup>Aty katsani ty tadisaha zeka atahi katuk mynapykyryk. Aty kaspu piku zeka atahi katuk mynapykyryk. Kahyrikoso zikwy situk mozuruku. Uta kino situk niwatihi mozuruku — niy.

57— Kazo humo myspitu tsinakaranaha. Uta zikpehata kazo humo kaspitu. Kazo mozikyryzikpozo my. Atsatu kytsa asahi katsani ty tahadisahakanahaze nasihyryzikpo — Sesus niy.

58— Utahi atsikara baba bijoikpe iknykta inasik niy. Tubabatu taparaktsa niakbakanahatsa atsikara waha ty ziknatahadisahakanaha. Atsikara waha bijoikpe ikny inatsukunaha. Aparakbaha atsikara tisapyrēna ty tahadisahakanaha asahi niakbabaiknaha. Utakta atsikara wata. Uta bijoikpe iknykta iknasik. Kytsa katsani ty tahadisahakanaha zeka Deus tuk tahawahi mynapykyryknaha — niy.

59Iwa Sesus Sudeutsa zinymyrykynahatsa wahoro eze nisihyrynyryky. Kaparanaū eze nikara.

### Hawa katsa Deus tuk mywahi tsimynapykyknaha.

60Kyze kytsa Sesus tuktsa iharere ziwabykynahaze betsakze nikaranaha. Asa tihi:

— O iharere batu mykparawy. Iharere tsihokdaharēna hỹ. Batu aty tohi yhỹ my — nikaranaha.

61Upek harere ahabyitsa tu iwatahu Sesus tsihyrynyryrēta nikara. Imyspirykpowy soho humo taokanikinaha. Iwaze ispe niy:

— Kaharere tsihokdaharēna niy. Kaharere batu ahakparawy iwatsahi kaharere bo batu ma zikaha — niy. 62— Utakta iknasikta ahawata ikyzyk. Kahumo batu ahaspirykpo iwatahi kaharere tsihokdarēna. Utakta bijoikpe bo kazo bo piksizoze anabo hi iksa tsimaha ja kaharere bo yhỹ tsimaha.

63Deus hyrikoso humo aparakbaha meky watu moziknaha. Aparakbaha ihumo Deus tuk siwahi mynapykyryknaha. Kytsa zuba zeka batu Deus tuk mynapykyknaha. Batu zikaha. Iwa zeka kaharere bo hyỹ tsimaha zeka Deus hyrikoso ahatuk my. Iwaze ikiahatsa Deus tuk ahawahi tsimynapykyknaha.

64Wastuhu kaharere bo ba hỹ zikaha ana humo hi kahyrynyryrēta — niy. Iharere iakparawy byitsa soho humo botu zinymyry. Estuba sisukyrytsitsa bo ziokyhyrykta humo kino tsihyrynyryrēta. Zinymyrykynahatsa nisinaropykykze tsihyrynyryrēta.

65Iwatahi ahape icy.

— Tapara kazo yhỹ my iwaze kytsa kahumo sispirikporētsa. Asa zuba kazo harere bo hyỹ mahaze asahi kahumo sispirikporētsa moziknaha — niy.

66Iwa Sesus tuktsa sizubarētsa iharere bo batu yhỹ niaha. Batu iapik pāozo. 67Kyze Sesus tuk zinymyrykynahatsa dose tsa pe niy:

— Ikiahatsa ja. Ikiahatsa kino sa tsipikarikiknaha — niy.

68Iwaze Simaō Peduru ipe niy:

— Mypehatsa aty hapik sa tsimaha. Ikia humo mekywa tu tsimoziknaha. Hawa tsimhyrykosokdanahaze Deus tuk mywahi

tsimynapykyknaha anahi ikia zuba tsikmyhyrinymyryky. <sup>69</sup>Iwatsahi aharere humo myspirikporêtsa. Ikia zuba Deus zahapehata tsimaha. Tsamysapyrêta — niy. Iwa Simaõ Peduru niy.

<sup>70</sup>Iwaze Sesus ispe niy:

— Utakta dose mytsyhyrytsa hawa zinymyrykynahatsa iksiwatawyhik. Estuba ahatukta Satanas mozik — niy.

<sup>71</sup>Sesus Sudas soho nitsasoko. Sudas Simaõ Iskariotses tse niy. Atahi Sesus sukyrytsitsa bo pioptyhyryk niy.

### Sesus tatukytsa tuk.

**7** <sup>1</sup>Kyze Sesus Karireja bo niukuru. Sudeja bo ka batu pão. Sudeutsa taparaktsa zibeze tsihikiknaha. Iwatahi Sudeja bo batu pão. Karireja eze zuba niapykyryk. <sup>2</sup>Tapara Sudeutsa myikaha bo pororo ziknakaranaha. Taparaktsa jerukbara eze tahaparik zizikinaha naha bo hi mytsaty ziknakaranaha. Iwaze amyikaha bytykara isiparik bo niapykyryknaha. <sup>3</sup>Iwaze Sesus tukytsa ipe niaha:

— Sudeja bo ikiakta tsiksikta. Anabo tsimyzeka hawa tsimykara atuktsa iktsa maha. Azikwy bo iktsa maha. <sup>4</sup>Tsipany tsihikik zeka ba okpitsikĩ ziky. Atahi izikwy ty sizubarêtsa bo mysiwatawyky. Iwatahi Sudeja boktsa — niaha.

<sup>5</sup>Itukytsa kino ihumo sispirikpobyitsa nikaranaha iwa ipe nikaranaha.

<sup>6</sup>Sesus ispe niy:

— Uta aba amyikaha bo ba zikumu. Ikiahatsaktsa myikaha bo zeka wasani my tsimykarana. <sup>7</sup>Aparakbaha asahi Deus harere bo batu yhỹ zikaha kahumo tahakyrikinaha. Ikiahatsa humo ka batu siakyri. Uta kahumo zuba sakyrirêtsa nikaranaha. Utakta ispe my: “Ikiahatsa ahamysapybyitsa tsikykarana” my iwatsahi kaharere humo tahakyrikinaha. <sup>8</sup>Ikiahatsaktsa simyikaha boktsa! Utakta ba zikparak. Abaka ba zikumu. Bykyze zuba my — niy. Iwa Sesus tatukytsa pe niy.

<sup>9</sup>Iwaze itukytsa simyikaha bo niukurunaha. Sesus Karireja eze nitare.

### Sesus simyikaha bo.

<sup>10</sup>Kyze Sesus niwatihi simyikaha bo niy. Kytsa bo batu tyso. Ity sohabyita tu simyikaha bo niukuru. Kytsa batu sihyrinymyry. Sipapatu niparak. <sup>11-13</sup>Sudeutsa taparaktsa simyikaha bo niukurunaha. Asahi myikaha eze Sesus ziberikinaha. Asahi:

— Sesus sa hana bo — nikaranaha. Aparakbaha isoho nitsasokonahaze Sudeutsa taparaktsa batu siwaby tsihik. Iwatsahi akbyibatu zuba nipamykysokonaha. Asaktsa:

— O tahi tsimysapyrêta — nikaranaha. Utsa kytsa:

— O batu. Batu imysapy. Atahi kytsa bo nisispihikbataka — mybarapetu nikaranaha. Iwa Sesus soho nitsasokonaha.

<sup>14</sup>Iwaze Sesus zumu. Deus wahoro zubata bo nitsuk. Anaeze iziakbata kytsa nisihyrinymyryky. Simyikaha asiba nepykze nisihyrinymyryky.

<sup>15</sup>Taparaktsa Sudeutsa iharere batu siakparawy. Asa kino:

— Hawa hãta skaraba Deus papeu humo zinymyryba.

Nimhyrinymyrykynahatsitsa batu tyhyrinymyry iwatawu tsihyrinymyrëta. Batu wasani my — nikaranaha.

<sup>16</sup>Iwaze Sesus ispe niy:

— Amy ty pahahyrinymyryky kaharere bara zikpehata harere zuba pinymyryky. Iharere zuba sizubarëtsa mysihyrinymyryky — Sesus niy.

<sup>17</sup>Ikiyahatsa hi:

— O amy ty nisihyrinymyryky iharere zuba ja — tsimykaranaha.

Utakta ahape my:

— Aty sa Deus harere piwaby tsihikik anahi kaharere baba hi pihyrinymyryky. Atahi kaharere Deus kabo zinyny niy ana humo hi tsihyrinymyrëta. <sup>18</sup>Wastuhu kytsa tahaharere ty zuba nisihyrinymyrykynaha. Utsa kytsa batu. Deus harere humo zuba nisihyrinymyrykynaha. Asahi tahaharere ty zuba nisihyrinymyrykynaha. — Ziwabynahatsa sisoho:

— O siharere wasani my, myhyrizikwanitsa moziknaha — nikaranaha. Iwa kytsa sisoho motsasokonahaze anahi mozihikiknaha. Kytsa Deus harere ty zuba nisihyrinymyrykynaha. Aparakbaha hi:

— O Deus harere tisapyrëna — nikaranaha. Ana soho humo hi sakurëtsa nikaranaha. Anahi Deus harere soho piwaby tsihikiknaha. Asa zuba wasani mykaranaha. Batu mybarapetu mykaranaha.

<sup>19</sup>— Tubabatu Moises nihyrikosokdata ahadiritsa bo Deus harere ty nisihyrinymyryky. Batu aty tohi iharere bo hyÿ ziknakara. Amy humo sa ikiahatsa tsipikbeze tsihikiknaha — niy. Aparakbaha Deus wahoro zubata eze tu Sesus harere ziwabykynaha.

<sup>20</sup>— O ikia paikpa mytsaty tsimykara. Hyrikoso isapybara atuk my. Aty sa pabezetsihikik — nikaranaha. Iwa kytsa sisukmotsa nikaranaha. Serusarëhe ezektsa sihyrinymyrëtsa. Sudeutsa taparaktsa Sesus pibeze tsihikiknaha anahi sihyrinymyrëtsa.

<sup>21</sup>— Sudeutsa byrywy eze kazikwy ty pahawatawyky. Kazikwy humo nipybybaiknaha. Kazikwy bo iktsa tsimykaranahaze, “O batu amysapy my. Atahi byrywy eze tarabaja niy” tsimykaranaha — Sesus niy.

<sup>22</sup>Tubabatu Moises Deus harere ziwatahaka — Ahahyrytsa makuskyrytsa tysiapiakzyzyknaha. Siwatahawy mozik atahi Deus tyryk niyzyk ziwatawy. Ikiyahatsa ahabykyhytsa tabyrywy eze tsinasipiakzyzykyknaha.

<sup>23</sup>Tabyrywy ahaskyrywytsa tysiapiakzyzykyknaha Moises harere humo. Iharere bo yÿ tsimyzihikiknaha iwatsahi tysiapiakzyzykyknaha.

Uta maku izororo baba mybyrywy eze ana humo hi ja tsikahakyrikinaha. Amo humo ja tahakyrikinaha — niy. — O atahi

mybyrywy eze tarabaja my. Maku zizorowoyze tarabaja nikara. Batu amysapy tsimy — tsikykaranaha.

<sup>24</sup>Sizubarëtsa tsimytsasokonaha:

— Atahi batu wasani my mybarapetu tsimykaranaha niy. Hawa tohi mykara batu tyso “O atahi batu imysapy my”. Awatutaha — Sesus niy.

### **Sesus hi Deus zipehata.**

<sup>25</sup>Serusarëhe eze wastuhu kytsa nipamykysokonaha:

— Atahi sa pibeze tsihikiknaha — nikaranaha.

<sup>26</sup>— Atahi kytsa okze motsasoko. Batu aty tohi ity sohometu. Tozeka ja taparaktsa Sesus humo sispirikporëtsa. Tozeka ja Sesus Deus zipehata ana humo hi yhy mykaranaha — nikaranaha. <sup>27</sup>Iwa wastuhu Serusarëhe Ezektsa nikaranaha. — Deus zipehata mozumuze batu aty tohi hana iknykta ja zikaha. Katsa zuba ihumo myhyrinyrëtsa iwatahi batu Deus zipehata my — nikaranaha.

<sup>28</sup>Iwaze Sesus sizubarëtsa Deus wahoro zubata isturupeze nisihyrinyrky. Opykani haty nisihyrinyrky:

— Ikiahatsa batu ahanyhy. Ikiahatsa hana ikny ta ja izumu ba tsimykaranaha. Deus kazo zikpehatawy ikzumu hy. Ba ahabyizeka ba zik zumu. Atahi wasani mykara. Ikiahatsa batu ahahyrinyhy. <sup>29</sup>Uta zuba iny. Ibase iknapykry tatu my. Atahi mybarawy bo zikpehatawy — Sesus niy.

<sup>30</sup>Iwaze kytsa nizokbatsi tsihikiknaha. Sisukyrytsitsa bo itsipa humo tsioktyhyknaha nikaranaha, batu nabaze ity paik ahabyitsa. Deus — Batu yhy. Katse Sesus ba zioktynaha — niy. Iwatsahi itsipa humo batu ity oktyhyryk. <sup>31</sup>Kytsa sizubarëtsa ziwabynahaze iharere bo yhy nikaranaha ihumo sispirikporëtsa. Ziwabynahatsa hi:

— Deus zipehata zikwy tsipinyaha. Iwatsahi Deus zipehata my mytsaty tsimykaranaha — niaha.

### **Deus wahoro zubata perytsitsa Sesus piockyzykynaha.**

<sup>32</sup>Iwaze Pariseutsa parakbaha Sesus nizekerykynaha. Kytsa sizubarëtsa Sesus soho nitsasokonahaze iwatsahi ziockyhyryk tsihikiknaha. Pariseutsa parakbaha, Deus wahoro zubata eze ziknapamykysokonahatsa taparaktsa iwatsa asahi Deus wahoro perytsitsa nisipehakanaha. Sesus itsipa humo tyzioktyhyknaha nisipehakanaha.

<sup>33</sup>Iwaze Sesus niy myzubaha bo:

— Utakta ahabaze jokbohatu mopykyrykspyk. Aiba zuba kapehatsa bo piksizo. <sup>34</sup>Iwaze tsipikberinaha ba zik zikahanaha. Kazo bo piksizoze ba kapiktu zikaha — niy.

<sup>35</sup>Sudeutsa asa zuba nipamykysokonaha:

— Hana bo skaraba mykara katsa ba zik zikahanaha. Tozeka ja ustsatsa kytsa bo my. Biprytsa bo ja mykara. Sudeutsa nanabyitaba

mynapykyryk Kerekatsitsa baze mynapykyryk. Tozeka ja Kereka ezektsa mysihyrinymyryky — nikaranaha. <sup>36</sup>Tapara mype niy:

— Tspikberikinaha bazik zikaha naha. Piksizoze ba kapiktu zikaha niy. Iharere myhumo tsihokdaharēna — nikaranaha.

### **Deus hyrikoso myhumo pupuputsa hyrity wa.**

<sup>37</sup>Kyze Sesus sizubarētsa bo nipamykysokozo. Opykani haty nipamykysoko. Simyikaha nepyksomokoze nishyrinymyrykyzo. Nawa zuruze ispe niy:

— Aty tsiarapukrēta zeka pihik piku. Aty meky watu mozik tsihikik zeka kabo tyzumukta. Iwaze tspikuze hi kahumo tspirikporēta tsimysapyrēta mozik — Sesus niy. <sup>38</sup>— Pihik waha ituk mynapykyryk. Pupuputsa wa mykara. Asahi kaharere bo hyÿ mykaranaha kahumo sispirikporētsa. Hawa kytsa pihik pikuikiknaha utakta situk mynapykyryk. Iwatsahi mekywa tu moziknaha. Simsapyrētsa. Iwa Deus harere papeu humo botu iwatahaha — Sesus niy.

<sup>39</sup>Sesus iwaze nitsasoko Deus hyrikoso soho ziwatawyky. Deus hyrikoso Sesus tuktsa tuk mynapykyryk. Deus sibo myzipeha tsihikik. Tapara Deus hyrikoso myzipeha iwaze Sesus tuktsa isoho motsasoko. Mybarawy bo mynasik. Tapara Sesus Deus bo piksizoze iwaze hi Deus hyrikoso mybarawy bo atsoko mynasik. Tapara Sesus Deus bozo my. Bykyze Deus hyrikoso mybarawy bo myzipeha niy.

### **Kytsa sizubarētsa metutu nikaranaha.**

<sup>40</sup>Kytsa sizubarētsa asa zuba Sesus soho humo nipamykysokonaha. Mektsatu nitsasokonaha. Wastuhu kytsa nikaranaha:

— Atakta Deus sohokotsa babata, atahi taperyky hÿ — nikaranaha.

<sup>41</sup>Utsa nikaranaha:

— Atakta Deus zipehata Kiristu my — nikaranaha. Utsa:

— O batu, Deus zipehata Karireja ezekta ja nikaranaha. <sup>42</sup>Deus harere papeu humo Sesus soho botu iwatahaha nikaranaha. Ziwatahaka:

“Deus zipehata Dawi tsekoka my Berēhe eze mopuruk. Sudeja eze my.” Iwa Deus harere niy — nikaranaha.

<sup>43</sup>Iwaze kytsa isoho humo niharapepehakanaha. Meky watu siharere nikaranaha. <sup>44</sup>Iwaze Deus wahoro perytsitsa Sesus zioiky tsihikiknaha. Asahi batu itsipa humo ity okty.

### **Sudeutsa taparaktsa Sesus humo batu sispirikpo.**

<sup>45</sup>Kyze Deus wahoro perytsitsa. Pariseutsa bo ziksizonaha. Zumukunahaze nisipehakanahatsitsa ispe niaha:

— Amo sa Sesus ty batu tyoktyhyryk — niaha.

<sup>46</sup>Deus wahoro perytsitsa hi:

— O batu aty tohi iharere wata my. Iharere tisapyrëna hỹ. Iwatsahi itsipa humo batu tyoktyhyryk — nikaranaha.

<sup>47</sup>Pariseutsa tihi:

— Ikiahatsa kino niwatihi. Iharere humo ja zahaspirikpoko — niaha. <sup>48</sup>Sadusitsa aparakbaha taparaktsa ihumo batu sispirikpo. Batu estuba zikino ihumo batu ispirikpo. Pariseutsa niwatihi ihumo batu sispirikpo. <sup>49</sup>Kytsa sizubarëtsa Moises harere humo batu sihyrinymyry. Asa zuba ihumo sispirikporëtsa. Deus ispe niy:

— Ikiahatsa batu ahamysapy tsimaha. Sinini ykarawy bo pahapeha my — Pariseutsa niaha.

<sup>50</sup>Maku Nikodemus ituktasa niapykyryk. Tapara atahi unata Sesus bo nikozone. <sup>51</sup>Atahi tatuktasa pe niy:

— Katsakta Sesus harere batu mywabyhy. Iharere ty waby ahahabyizeka ba ibete hỹ zikaha. Batu ziktsasonaha: “Atakta batu imysapy my. Iwatahi sinini ykarawy bo Deus pipeha” niy. Iwa tubabatu nihyrikosokdata Moises mydiritsa nisihyrynymyry — niy.

<sup>52-53</sup> — O ikia niwatihi hazi nikaranaha. Ikia kino ja Karireja ezekta nikaranaha. Iwa tsimytsasokoze Deus papeu humo ihyrynymyrybyita wata — nikaranaha. Taparaktsa hi:

— Deus sohokotsa batu Karireja ikny ta my. Deus papeu humo tsinyziukukta tsimy. Iwatahi atakta Sesus batu Deus sohokotsa my — nikaranaha. Kyze tahawahoro bo ziksibanaha.

### Wytyk sizubatsa oke.

**8** <sup>1</sup>Sesus Oriwerejatsa hara bo niukuru. <sup>2</sup>Miwa botu Deus wahoro zubata bozo niy. Kytsa sizubarëtsa Deus wahoro bo niaha. Sesus ziwabykynaha iwatsahi izumukunaha. Kytsa sizubarëtsa izumunahaze isitazahaeze nidyhyky. Iwaze nisihyrynymyryky.

<sup>3</sup>Iwaze Deus harere watahatsitsa Pariseutsa niwatihi iwatsa Sesus bo zumunaha. Wytyk ibo zioqtyhyryknaha. Atatsa ipyitsakatatsa tu sizubarëtsa ziknasihewabykyryk. Pariseutsa nizokparakanahaze sibo iktsa niaha. Iwatsahi wytyk zioqtyhyryknaha. Kytsa sizubarëtsa tazahaeze atatsa Sesus bo zioqtyhyryknaha. Niritohoko.

<sup>4</sup>Iwaze Sesus pe niaha:

— O myhyrynymyrykytsa atatsa wytyk usta ibarikta byita tu zipyryrykyknahaze sibo iktsa tsikaha. Iwatsahi atatsa abo tsikzioqtyhyryknaha. <sup>5</sup>Tubabatu nihyrikosokdata Moises myzotsa bo nitsasoko. Papeu humo ziwatahaka. “Wytyk usta maku zikzipyryrykyk zeka atatsa ty ka bohitaha. Haraharetsa ty tsibezenaha” iwa Moises botu myzotsa nisihyrynymyry. Ikia ja, Hawa sa tsimy — nikaranaha.

<sup>6</sup>Ana hi nitsasokonahaze — Tahaharere tsyhyryzehe nikaranaha iwatsahi nizapykykynaha — mytsaty ahabyitsa nikaranaha. Asa zuba nipamyksokonaha:

— O iharere meky watu my. Amy ty Moises botu ziwatahaka batu yhy my iwaze batu imysapy my — iwa mytsaty nikaranaha.

Iwaze Sesus okmymy hātatu wytyk bo tatsyhyry tyty tapauk baze ziwatahaka. Atatsa bo ka batu iktsa niy. <sup>7</sup>Hawa sa tsimy ipe nikaranaha. Kyze niziktsutsuhuku tatu kyik niy sibo iktsa niy. Ispe niy:

— Ikiahatsa baze aty imysapyrēta zeka atahi harahare tapara mopapyk — niy. <sup>8</sup>Iwaze wytyk bo okmymyzo niy tatsyhyry ty ziwatahakazo.

<sup>9</sup>Kytsa Sesus harere ziwabynahaze sisikpybyrētsa nikaranaha. Iwatahi taparakta maku puke niy. Iwaze estuba estuba zuba zipokonaha. Ziharawyta iypykbyita puke niy. Sizubarētsa puke puke niaha. Iharere humo sisikpybyrētsa iwatsahi zipobaiknaha. Atatsa zuba Sesus tuk nitare, niriktohoko. <sup>10</sup>Sesus kyikzo atatsa bo iktsaziu niy. Ipe niy:

— O wytyk kytsa sa hana bo. Asahi ape “Ikia batu amysapy” nikaranaha. Asahi haraharetsa ty zabezekyzykynaha. Kytsa sa hana bo — niy.

<sup>11</sup>— O mypehatsa zipobaiknaha. Aba batu aty tohi kabo “Ikia batu amysapy” mykaranaha — niy. Sesus ipe niy:

— Uta kino niwatihi. Abo batu tyso “Ikia batu amysapy my” iwa abo batu tyso. Tsiksiktsa abaka awatu tynakara! — Sesus niy.

### **Sesus harere humo kytsa meky watu moziknaha.**

<sup>12</sup>Kyze Sesus kytsa sizubarētsa, Deus wahoro zubata eze nisihyrinymyrykzo. Ispe niy:

— Deus harere ty pahahyrinymyryky Deus harere bo hyh tsimykaranaha zeka wasani tsmoziknaha. Asahi kahumo mospirikponaha zeka imysapybara pimoewynaha Deus mysiokzo. Asa kino kahumo tisapyrēna mynakananaha, meky watu moziknaha hy — nikara. Iwahatyhi ispe niy.

<sup>13</sup>Kyze Pariseutsa tihi:

— O ikia asoho zuba tsimytsasoko. Asoho tsimytsasoko zeka batu amysapy tsipimyiki — mybarapetu nikaranaha.

<sup>14</sup>Sesus ispe niy:

— Utakta wasani mykara. Kasoho motsasoko zeka wasani my. Ikiahatsa hana ikny tsikzumunaha humo batu ahahyrinymyry. Hana bo tsimykurunaha humo batu ahahyrinymyry. Utakta kahyrinymyrēta. Hana ikny ikzumuku naha humo kahyrinymyrēta. Hana bo moparak naha humo kahyrinymyrēta. Iwatahi wasani mykara — niy.

<sup>15</sup>— Kytsa harere ty tsiwabyziu zeka ikiahatsa tihi: “O tahi batu wasani” tsimykaranaha. Iharere tsihokdaharēna humo iwa tsimykaranaha. Utakta batu ka moso. Iwata humo hi batu tyso kytsa harere zuba. <sup>16</sup>Motsaso zeka ikahatsa batu ahamysapy kaharere ahasoho ty wasani mykara. Atakta zikpeha atahi atsatu motsasoko. Uta zuba byita tu mykara. Kazo zikpeha

katsaktsa harapetok tsimykarana<sup>17</sup> Moises taparaka ziwatahakaze. Kytsa petoktsa atsatu motsasonahaze siharere piwabynahatsa siharere soho: “O wasani mykarana<sup>18</sup>” maha. Uta hi kasoho motsasoko. Kazo kino niwatihi. Atahi zikpeha kasoho motsasoko. Kasoho tsimytsasokonaha. Iwa atsatu petoktsa kasoho motsasokonaha — niy.

<sup>19</sup>Kyze ipe niaha:

— Haneze skaraba azo — niaha.

— Uta batu ahanyhy tsimykarana. Kazo kino niwatihi batu ahanyh̄. Tsiplikynaha zeka kazo kino niwatihi tsipinynaha. Iwaze katsa tsimymynynaha — niy.

<sup>20</sup>Anaharere humo kytsa sizubarẽtsa bo nitsasoko. Sesus Deus wahoro zubata eze kytsa sizubarẽtsa okryrsaro suk baze nisihyrinymyryky. Sisukyrytsitsa itsipa humo batu ity oktyhyryk. Deus sibo batu yh̄ niy iwatsahi Sesus tsipa humo batu ity oktyhyryk.

#### Aty skaraba Sesus.

<sup>21</sup>Sesus ispe niyzo:

— Uta piksi. Ikiahatsa tsipikberinaha zeka ba zikzikahanaha. Uta pahatsumuẽh̄i tsihikik. Ba zikzikahanaha. Tsimyhyrikosokdanahaze Deus ahasapybyitsa tsimykarana<sup>22</sup> ba ziksiokzohik. Ikiahatsa ba kapik pão tsimaha.

<sup>22</sup>Sudeutsa asa zuba nipamykysokonaha:

— Ata mybo nitsasoko “hana bo sa piksi batu iapik pão zikaha” nikara. Tozeka ja atatu tabeze. Tabeze zeka katsa batu iapik pão zikaha — nikarana. Iwa asazubatsa tu nikarana.

<sup>23</sup>Sesus nikarazo:

— Ikiahatsaktsa mybarawy ezektsa. Utakta Deus iknykta ikzumu. Hawa kytsa mytsaty mykarana<sup>24</sup> ikiahatsa niwatihi atsatu mytsaty tsimykarana. Utakta batu. Kazo mytsaty mykara naha ty zuba mytsaty mykara kazo wata my. Botu ababo iktsasoko. Tsimyhyrikosokdanahaze Deus ahamysapybyi ty tsikykarana<sup>25</sup> ba zahaokzo. Kahumo ahaspirikpo ahabyizeka tsimyhyrikosokdanaha katuk batu tsimynapykyryknaha. Utakta Deus zikpehata. Kawahi mynapykyryk. Kaharere bo yh̄ ahabyi zeka iwaze tsimyhyrikosokdanahaze ahamysapybyi ty tsikykarana<sup>26</sup> ba zahaokzohik — niy.

<sup>25</sup>— Aty skaraba ikia — niaha. — Uta botu ababo iktsaso — Sesus niy. <sup>26</sup>— Ahabo puẽtsik motsaso tsihikik. “Ahaharere hi batu wasani tsimaha” anahi motsaso tsihikik. Atahi zikpeha iharere zuba motsasoko. Iharere wasani my. Batu mybarapetu ziky. Anaty hi zikyrynymyryky atsatu kytsa sizubarẽtsa bo motsaso — niy.

<sup>27</sup>Nitsasokoze zikpehata tazo soho nitsasoko. Sudeutsa ana humo hi batu siwabyziuhu. Iharere sihumo tsihokdaha<sup>28</sup>rena my.

<sup>28</sup>Utakta kytsa wata Deus zikpehatawy. — Iharapatawyhyta humo tsibezenhaktsa! — tsimykaranaha. Iwa tsipikbezenaha. Bykyze tsipikbezenahaze ikiahatsa tihi:

— O ataktsa wasape mykara tawahi mynapykyryk tsimykaranaha. O atakta Deus zipehata tsimykaranaha. Atahi tazo harere zuba aparakbaha nisihyrinymyryky — tsimykaranaha. — Hawa tazo nitsasoko yhỹ niy. Taharere ty ka batu tyso. Tazo harere zuba nitsasoko anahi nisihyrinymyryky — tsimykaranaha.

<sup>29</sup>Tahi zikpeha katuk mynapykyk. Iharere bo hỹ kasopyk — atahi kapokzitsikitsa. Ba zikare — niy.

<sup>30</sup>Iwatsahi kytsa sizubarëtsa iharere bo hỹ nikaranaha ihumo sispirikporëtsa nikaranaha. Asahi ziwabykynahatsa ihumo sispirikporëtsa nikaranaha.

### **Kytsa hawa sakurëtsa moziknaha.**

<sup>31</sup>Iwaze Sesus Sudeutsa pe niyzo ihumo sispirikporëtsa asa bo hi nitsasoko ispe niy:

— Kaharere bo hỹ tsimykaranaha zeka katyryktsa tsimoziknaha. Katuk zinymyrykynahatsa babatsa tsimoziknaha. <sup>32</sup>Amy ty wasani tsipinymyrykynaha, iwatsahi meky watu tsimoziknaha. Taparaka ahapokzitsiukbyitsa tu ahamysapybyitu tsikykaranaha. Abaka mahani ahapehatsa myzahapokzitsiki iwatsahi ahapunihihrëtsa tsimoziknaha — niy.

<sup>33</sup>— O batu aty tohi mypehatsa humo mymypokzitsiubyitsa. Katsaktsa nihyrikosokdata Abarão tsekokatsa tsimaha. Amy humo sa mybo tsimy. “Kytsa mypehatsa humo mymypokzitsiubyitsa” tsimy kara. Batu — nikaranaha.

<sup>34</sup>Sesus ispe:

— Kaharere wasani my. Wabyziutaha! Hawa batu mysapy tsimykaranaha. Ahasopyksapybyitsa tsimykaranaha zeka iwatsahi ahapokzitsiukbyitsa tsikyzyknaha. Ahapehatsa Satanas mozik. Iharere bo ma tsikykaranaha iwatsahi ahasopyksapybyitsa tsimykaranaha. Ba hawa tohi zikaha. Iwatsahi ahamo ahapokzi byitsa niy. <sup>35</sup>Mypehatsa kytsa nasipokzitsizo. Asahi sipokzitsiuk byitsa itukytsa nymyhyrybyita mykaranaha. Bipyritsa zuba. Tatse batu, atahi mymypokzitsiki. Mypehatsa tse humo mymypokzitsiki.

<sup>36</sup>Utakta Deus tse my. Iwatahi kahumo tsimyspirikpokonahaze Deus tryktsa tsimoziknaha. Iharere bo zuba hỹ tsimykaranaha. Tapara Satanas ahapehatsa tserikiknaha, iharere bo ka batu yhỹ tsimaha iwatsahi ahasopyksapybyity tsikykaranaha tsmoewynaha — tsimykaranaha. — Uta ahapehatsa mozik kahumo ahapunihihrëtsa tsimoziknaha. <sup>37</sup>Ikiahatsa nihyrikosokdata Abarão tsekokatsa tsimaha ana humo hi kahyrinymyrëta.

Kaharere bo batu yhỹ tsimykarana. Amo sa tsikbeze tsihikiknaha. Iwatsa tu Abarão tsekokatsa tu tsikbeze tsihikiknaha. <sup>38</sup>Kazo zikwatawyky atsatu motsasoko. Ikiatsaktsa Satanas tyryktsa tsikyziknaha. Atahi ahazo my. Hawa mykara atsatu tsimykarana — Sesus niy.

<sup>39-40</sup>Kytsa tihi:

— O batu, katsaktsa Abarão tsekokatsa. Nihiyrikosokdata Abarão mydiri mysopyk — niaha. Sesus ispe niyzo:

— Deus harere kabo nitsasoko. Iharere humo zuba zahahyrinymyryky. Ikiatsa tsikbezekyzykynaha kaharere humo batu ahakparawy niy. Deus harere baba batu ahakparawy. Nihiyrikosokdata Abarão Deus harere bo hỹ ziknakara. Ikiatsa Abarão tsekokatsa tsimaha zeka iwata Deus harere bo hỹ tsimaha. Ikiatsa Satanas wata tsikyziknaha. <sup>41</sup>Hawa nikara atsatu tsimykarana — niy.

— O katsa batu Satanas watsa tsimaha Deus zuba myzo. Iharere bo zuba hỹ tsimykarana — mybarapetu niaha.

<sup>42</sup>Sesus:

— Deus zikpeha. Uta mybarawy bo iknasik — niy. Deus ahazo my zeka ikiatsa tihi:

— O zipehata tsimysapyrêta tsimykarana — niy.

<sup>43</sup>— Kaharere bo batu yhỹ tsimykarana. Kaharere bo batu ma zikaha. Iwatsahi batu wabyziu zikaha aha humo kaharere tsihokdaharêna my niy. <sup>44</sup>Ikiatsaktsa Satanas hyrytsa tsikyziknaha. Hawa mykara ikahatsa kino niwatihi tsimykarana. Tahi imysapybyita mynakara. Ikiatsa ahasopyksapybyitsa tsinakarana. Hawa mykara yhỹ ahasopyk. Ataharere humo hi kytsa naharapebakanaha. Deus bijoikpe mybarawy nizuknize ata harere humo hi nahapebakanaha. Aba kino niwatihi kytsa nasiakzokotu. Deus harere babata bo batu yhỹ mykara. Batu wasani ziky tsimyspíhikbatarêta. Pispíhikbatakaze hawa mozihikik atsatu mykara. Kytsa mymyspíhikbatakanahaze ihyrytsa moziknaha — Sesus niy.

<sup>45</sup>— Uta wasani motsasoko. Iwatsahi ikiatsa kahumo batu ahaspirikpo — nikara. <sup>46</sup>Ba amy tohi ziksonaha:

— O ikia tsimymysapybyriki — my. — Kaharere wasani ziky iwatsa tu kaharere bo batu yhỹ zikaha tsimykarana. <sup>47</sup>Deus tyryktsa iharere bo hỹ mykarana. Ikiatsaktsa Deus tuktsabyitsa tsimaha. Iwatsahi Deus harere bo batu yhỹ tsimynakaranaha — nikara. Iwa Sesus taparaktsa bo nitsasoko.

### Sesus iwaze Abarão.

<sup>48</sup>Sudeutsa Sesus pe niaha:

— O ikia hyrikoso sapybara humo tsimytsasoko. Batu amysapy tsimy. Paikpa mytsaty tsimykara. Samarija ezektsa wata batu amysapy tsimy — mybarapetu nikarana.

<sup>49</sup>Sesus tihi:

— Aharere batu wasani my. Hyrikoso sapybara humo batu tyso. “Kazo zuba wasani mykara”. Ikiahatsa tsiziksohometukunaha. <sup>50</sup>Batu katyso “Utakta wasani my.” Deus zuba moziksapywyky “Atakta wasani” mykara. Kytsa kasoho humo piksohometukunahaze Deus tihi: “O aharere batu ahamysapy tsimykaranaha” — niy.

<sup>51</sup>— O kaharere tsiwabytoktonahaktsa. Aty kaharere bo hyÿ mykara zeka atakta kazo tuk tawahi mynapykyryk — niy.

<sup>52</sup>Iwatsahi Sudeutsa ipe niaha:

— Abaka tanymyryky hÿ. Ikiahi hyrikoso sapybara humo tsimypamykysoko. Tubabatu taparakta Abarão nihyrikosokda. Deus sohokotsa kino niwatihi nihyrikosokdanaha. Niakbabanaha. Ikia hi motsasoko “Aty kaharere bo hyÿ mykara Deus tuk tawahi mynapykyryk. Siakbatsa ba zikakpykyknaha kaharere humo hyÿ my” tsimy — nikaranaha. <sup>53</sup>— Tubabatu Abarão mydiri nihyrikosokda. Abarão atatuze nitsasokoze kytsa iharere ziwabyziukunaha. Tubabatu siakbatsa Deus sohokotsitsa nihyrikosokdanaha. Asahi nitsasokonahaze kytsa siharere ziwabyziukunaha. Ikia ja. Tozeka ja tsimytsasokoze kytsa aharere piwabyziukunaha. Aty skaraba tsimy — nikaranaha.

<sup>54</sup>Sesus ispe niy:

— Utakta kasoho tu motsasoikik zeka “O uta zuba wasani hi mykara” Anahi mykara zeka batu aty tohi kaharere piwabytoktokoro. Kazo kasoho humo moziksapywyky. “O wasani hÿ mykara” — my. Ikiahatsa kazo soho tsimykaranaha zeka — O atakta mypehatsa my tsimykaranaha. Iwa kazo soho tsimykaranaha — niy.

<sup>55</sup>— Ikiahatsa hi batu Deus ahanyhy tsimykaranaha. Utazuba iny. Motsasoko zeka “batu kanyhy my” mybarapetu mykara. Ikiahatsa watsa mozik. Utakta iny. Iharere bo hyÿ mykara hÿ — Sesus niy. <sup>56</sup>— Ahadiri Abarão kasoho humo tsihyrinyrêta. Mybarawy bo mynasik ana humo hi tsihyrinyrêta ziknakara. Iwatahi kahumo tsakurêta — niy.

<sup>57</sup>— O ikiakta batu atsaikba. Sîkuêta anos ahabyitatu. Iwatahi ikiakta Abarão batu anyhy. Tubabatu nira iwatahi batu anyhy. Tsimymyspihikbataka — niaha.

<sup>58</sup>Sesus ispe my:

— Kaharere tsiwabytoktonahaktsa. Taparakta Abarão purukbyitu utakta nawa tatu — niy.

<sup>59</sup>Iwaze kytsa haraharetsa ty nasibyknaha. Iwaze zibeze tsihikiknaha. Sesus sipokso taokpitsî. Kytsa sizubarêtsa papatu izoihik. Batu ity nyzo. Iwaze Deus wahoro zubata isturupeze inawakik.

### Sesus ihyrizikubyritya zizororowy.

**9** <sup>1</sup>Maku ihyrizikubyritya zizororowy. Kyze Sesus niukuruze zinymyrykynahatsa tuk maku ihyrizikubyritya bo iksa niy. Atahi koikny bakta tu ihyrizikubyritya nipuruk. <sup>2</sup>Zinymyrykynahatsa tihi:

— O mypehakatsa amo sa maku ihyrizikubyrita nipuruk niaha. Tozeka ja imysapybara humo nihyrizikubyri. Tozeka ja izotsa simysopyksapybyitsa nikaranaha ana humo hi ja nihyrizikubyri — niaha.

<sup>3</sup>Sesus:

— O batu izotsa simysopyksapybyitsa nikaranaha ana humo hi nihyrizikubyri. Abaka Deus zikwy piwatawy. Iwatahi ihyrizikubyrita nipurukze my. Deus zikwy humo piwatawyky niy. <sup>4</sup>Deus zikpehaka. Abaka Deus pokzi tarabajaziu mynakara. Bykyze Deus pokzi tarabaja mykara batu zik. <sup>5</sup>Uta mybarawy eze tuze aparakbaha mysihyrinymyryky. Deus harere bo hyÿ mynakara hawa wasani my mozuruku anaty hi mysihyrinymyryky — niy.

<sup>6</sup>Kyze Sesus tasaytsik ty wytyk bo hezok niy. Tshãrõ ty tysukni iwaze ihyrizikubyita hyriziktsa bo tshãrõ ty pepetohi niy. <sup>7</sup>Ipe niy:

— Zarape Siroã inarokoha bo tyzakpikyкта tsimy — niy.

Siroã Sudeja harere zipehata motsaso. Iwaze ihyrizikubyrita zarape bo niparak. Taty hopik hopikyby niy. Atsoko nikoza. Nizororobaba. <sup>8</sup>Iwaze kytsa iotutsa pauktsitsa asa zuba nipamykysokonaha:

— Tohi sa ske eze ziknadyhykyta. Batu ty ba iktsa ziky. Kytsa ziknasiakzaikik “O kabo ja kabo ja” ziknakara. “Kadisahawy ty kabo nyny tsimy” nikara.

<sup>9</sup>Ata hi sa — Iotutsa pauktsitsa nikaranaha. Ata hiba nikaranaha. Wastuhu nikaranaha:

— O batu. Maku ihyritywata hi zuba — niaha. Iwa asa zuba nipamykysokonaha. Iwaze tapara ihyrizikubyrita sibo taso:

— Uta hiba kahyryzikubyrita niy. Tapara ske eze ziknadyhyky. Okyrysaro kadisahawy humo niwatihi kytsa bo ziknazapyikik. Uta tihi ba — niy.

<sup>10</sup>— Hawata skaraba abaka ikia iktsa asopyk — niaha.

<sup>11</sup>— Sesus inarokota kabo izumu. Atahi tshãrõ ty sukni kahyryziktsa bo tsikaeni zuba tsyk niy. Kape “Siroã zarape bo hopikty!” — niy. Yhÿ iky. Siroã zarape bo ikparak. Ikokpikze atsoko iktsa iky.

<sup>12</sup>— Haneze sa Sesus — niaha.

— Yhÿ ja. Batu kanyhy — niy.

**Pariseutsa ihyrizikubyrita pe: — Hawa skaraba  
abaka iktsa tsimykara — nikaranaha.**

<sup>13</sup>Iwaze iotutsa pauktsitsa tapara ihyrizikubyrita Pariseutsa bo zioctyhyryknaha. <sup>14</sup>Sesus Sudeutsa byrykywy eze ihyrizikubyrita zizororowy. Tshãrõ sukni ty ihyriziktsa bo pepe niyze tabyrykywy eze zizororowy. <sup>15</sup>Iwaze Pariseutsa niwatihi ipe niaha:

— Hawa ta skaraba abaka iktsa asopyk — niaha.

— Atahi tshãrõ sukni ty kahyryziktsa bo tsikaeniha zuba pepe niy. Uta kino hopik hopikyby ikytahi atsoko iktsa iky — niy.

<sup>16</sup> Pariseutsa nikaranaha:

— Atakta zizorowoy mybyrykywy eze tarabaja nikara. Aty niwa myzeka Deus iknybyita tarabaja humo — wastuhu nikaranaha. Utsa tihi:

— O batu. Hawa skaraba maku imysapybyita nikara Deus zikwy ty ziwatawy — nikaranaha. Iwaze Sesus zisohometukunaha. <sup>17</sup>Iwaze ipezo niaha:

— Ikia tsiky kara. Ahyrizikubyri humo zazororowyhik hawa isoho mytsaty tsimy — nikaranaha:

— O atahi Deus sohokotsa my hỹ — niy.

<sup>18</sup> Pariseutsa iharere humo batu sispirikpo niaha. Iharere bo batu yhỹ niaha. Iwatsahi kytsa izotsa nasioktyhyryknaha. <sup>19</sup>Zumunahaze ispe niaha:

— Hawa skaraba ahatsa hi sa. Atahi sa ihyrizikubyrita nipuruk. Ihyrizikubyrita niy zeka hawa häta skaraba abaka iktsa mykara — nikaranaha.

<sup>20</sup>— O atakta katse my izo niy. Nipurukze ihyrizikubyrita hỹ niy.

<sup>21</sup> Abaka iktsa mykara batu kanyhy izo niy. Aty sa zizorowoy batu kanyhy. Katse botu taypyk iwatsahi ituk typamykysonaha. Hawa iktsa mykara anahi ituk typamykysonaha — izo niy.

<sup>22</sup> Iwa izo Pariseutsa pokso nitsasoko. Tapara Pariseutsa tihi:

— Aty skaraba Sesus Deus zipehata my zeka atahi Sudeutsa wahoro bo ba ziktsukzo — nikaranaha. <sup>23</sup>Iwatahi izo nitsasoko:

— Katse botu taypyk. Hawa abaka iktsa mykara anatyhi ipe tsimaha — nikaranaha. Sudeutsa pokso sipybyrëtsa nikaranaha.

<sup>24</sup> Kyze Pariseutsa tapara ihyrizikubyrita ziooktyhyrykzonaha. Sibozumuzuze ipe niaha:

— Katsaktsa Deus okze tu tsimaha. Aharere wasania ty mybo tytsaso. Atahi zazororowyta batu imysapy my ana humo hi myhyrinymyrëtsa — mybarapetu nikaranaha.

<sup>25</sup>— Atahi zikzororowyta imysapybara ty mynakara zeka batu isoho kawabyhy. Uta taparaka kahyryzikubyrita abaka iktsa mykara hỹ. Ana humo hi zuba kahyrynymyrëta — niy.

<sup>26</sup> Ipezo niaha:

— Hawa sa niy. Hawa skaraba ahyriziktsa nisizorowoy — niaha.

<sup>27</sup>— Botu iktsaso. Kaharere humo batu ahaspirikpo. Hawa skaraba kaharere tsiwaby tsihikikzonaha niy. Tozeka ja ikiahatsa kino niwatihi ituktsa tsimoziknaha — niy. Iwa zizorota Pariseutsa pe niy.

<sup>28</sup>— Batu ba — nikaranaha. Sisakparëtsa nikaranaha. Zizororowyta humo tahakyrikinaha:

— Ikia hi itukta tsimy. Katsa Moises harere bo zuba hỹ tsimykarana. Katsa Moises tuktsa tsimaha. <sup>29</sup> Moises Deus harere nitsasoko ana humo hi myhyrinymyrëtsa hỹ. Azororowyta ja. Aty harere sa motsasoko. Hana iknykta sa izumu batu myhyrinymyry — niaha.

<sup>30</sup>Zizororowyta niy:

— Paze. Atahi zikzororowy. Uta kahyrizikubyrita tu zikzororowy. Ikiyahatsa hi isoho humo batu ahahyrinymyry. Hana ikny sa izumu batu ahahyrinymyry niy. <sup>31</sup>Katsa myhyrinymyrëtsa. Kytsa simysapybyitsa mykaranaha iwaze Deus bo mopamykysokonahaze batu siwabyhy nikara. Ba ziksitsumuêhĩ. Asaktsa Deus harere bo hyÿ mykaranaha asahi Deus bo mopamykysokonahaze piwabyziuku. Mysitsumuêhĩkĩ. <sup>32</sup>Batu aty tohi ihyrizikubyrita ty “tyzororowy” iwahaty batu tyso. Batu zik nikaranaha. Abaka atahi kahyriziktsa nisizororowy abaka iktsa kasopyk. <sup>33</sup>Deus harere bo hyÿ habyi zeka kahyriziktsa bazik sizororowy. Deus humo ipeha ahabyizeka kahyriziktsa ba zik isizororowy hÿ — niy.

<sup>34</sup>Kytsa ihumo tahakyrikinaha. Asahi:

— Ikia amysapybyi ty tsimy kara. Tsikpurukze ahyrizikubyrita amysapybara humo mybarapetu nikaranaha. Ikia tsimyhyrinymyry tsihikik nikaranaha. Nabo päoty. Sudeutsa wahoro bo ba ziktsukzo — niaha. Tahakyrikinaha zizororowyta humo niaha.

**Hawa kytsa Sesus humo sispirikpobyitsa ihyrizikubyrita watsa maha.**

<sup>35</sup>Kyze Sesus isoho ziwabyze. Kytsa nizukeheknaha Deus wahoro bo ba ziktsuk niaha ana hi ziwaby. Iwaze zihobykze ipe niy:

— Ikia Deus zipehata kytsa wata niyzik ihumo aspirikporëta sa — niy.

<sup>36</sup>— Aty sa Deus zipehata mywata niyzik. Ikia kabo tsiipiawatawya zeka ihumo kaspirikporëta hÿ my — niy.

<sup>37</sup>— Aba ibo tsimykozoko. Atakino abo mopamykysoko atsatu Deus zipehata ahawata ikyzik — niy.

<sup>38</sup>Iwaze zizororowyta taekaratsa humo puruk puruk niy.

— O kapehatsa abaka ahumo kaspirikporëta my — niy. Aba motsasoko — Ikia zuba tsamysapyrëta. Ikia zuba wasani tsimy kara — niy.

<sup>39</sup>Sesus tihi:

— Mybarawo bo iknasik. Iwaze kahumo kytsa meky watu moziknaha. Asahi katuktsa moziknaha. Deus sisoho “O simysapyrëtsa maha” my. Utsa batu. Kahumo batu sispirikpo. Iwaze asahi Deus tihi: “O batu simysapy mykaranaha” my. Wastuhu Deus harere soho “katsa batu myhyrinymyry. Iharere tsinymyry tsihikiknaha”. Asahi katuktsa moziknaha. Utsa tihi “O katsaktsa Deus harere botu tsinymyrybanaha” mytsaty ahabyitsa nikaranaha. Asahi kahumo batu sispirikpo — Sesus niy.

<sup>40</sup>Pariseutsa iharere ziwabykynahaze ipe niaha:

— Katsaktsa Deus harere humo myhyrinymyrëtsa. Iwa tsimytsasokonahaze tahaspikhikbatakanaha ja — nikaranaha.

<sup>41</sup>Sesus ispe niy:

— Tsimytsasokonaha zeka: “O Deus harere batu myhyrinymyry, katsa iharere bo tsinymyry tsihikiknaha” Iwa tsimytsasokonaha zeka Deus

okzeka ahamysapyrẽtsa tsimoziknaha hỹ. Ikiyahatsa hi: “O Deus harere myhyrinymyrẽtsa.” Iwatsahi Deus okzeka batu ahamysapy tsimaha — niy. Iwa Sesus Pariseutsa bo nitsasoko.

**Kytsa hozipyrykzatsa watsa soho nitsasoko.**

**10** <sup>1</sup>Sesus nisihyrinymyryky. Hozipyrykzatsa soho humo nisiwatawyky. Kytsa hozipyrykzatsa hyrity watsa nisiwatawyky. Iwa nisihyrinymyryky:

— O kytsa wabyziutaha! — niy. Aty hozipyrykzatsa okarawy hokbowybyita buruk tu mytsuk zeka isoho humo:

— O atakta tityshyryboarẽta. Atahi hozipyrykzatsa mysibykyryk iwatahi inatsuk hokbowybyita buruk tu — tsimykaranaha.

<sup>2</sup>— Atahi hozipyrykzatsa okarawy hokbowy buruk tu paku my tahi sitsihitsa babata my — tsimykaranaha. <sup>3</sup>— Hozipyrykzatsa tsihitsa mozumuze hokbowy bazekta. Atahi hokbowy ty zoksapare myraratsa bo mytsuk. Hozipyrykzatsa tsihitsa iaksoho piwaby nahaze sakurẽtsa moziknaha iwaze mysinaropykze estuba estuba zuba zipokonaha. Tahanaro piwabykynahaze ape bo mosisakpare. <sup>4</sup>Hozipyrykzatsa sizubarẽtsa ape bo pipokonahaze sitsihitsa siharaze mynaukuru. Hozipyrykzatsa iapik ziknaukurunaha. Iaksoho humo zinymyrynahatsa hi mykaranaha.

<sup>5</sup>Sitsihitsabyitsa tu zeka batu iapik zikaha. Iaksoho humo batu sihyrinymyry iwatsahi iapik batu zikaha. Tahatsihitsabyita yksoho piwabykynaha zeka paikpa mynatururukunaha. Sipybyrẽtsa moziknaha — Sesus niy.

<sup>6</sup>Kytsa Sesus harere hozipyrykzatsa soho humo batu sihyrinymyry. Amy piwatawy naha humo tsihokdaharẽna.

**Sesus hokbowy wata my.**

<sup>7</sup>Iwaze Sesus ispe niyzo:


— O kytsa wabyziutaha! Hozipyrykzatsa siokarawy eze tu zeka batu aty tohi ziksiba. Batu aty tohi ziksiakse. Anaeze batu aty tohi ba ziksiboro. Uta katuktsa mysiperyky. Katuktsa hozipyrykzatsa watsa uta hi mysipokzitsiki niy. <sup>8</sup>Hozipyrykzatsa tahatsihitsa byitsa yksoho humo batu sihyrinymyry. Katuktsa niwatihi. Asaktsa zispihikbatakanahatsitsa humo batu sispirikpo. Tapara kaharaze izumukunahatsa wasanibara ty nisihyrinymyrykynaha. Iwatsahi batu siwabyziuhu.

<sup>9</sup>Utakta hokbowy wata my iburuk mynapupunaha. Zoksapare mahaze tahadisahawy bo mynakaranaha bykyze mynapupuzonaha. Siokarawy eze batu aty tohi ba ziksiba. Asaktsa kahumo sispirikporẽtsa mysipokzitsiki. <sup>10</sup>Sitsyhyryboanikitsa mozumunahaze hozipyrykzatsa humo tahatsyhyryboanaha mysiba tsihikiknaha. Utakta meky watu my.

Ikzumuze aparakbaha kahumo sispirikporêtsa simysapyrêtsa moziknaha. Sakurêtsa moziknaha katuk mynapykyryknaha.

**Sesus hozipyrykzatsa tsihitsu wata my.**

<sup>11</sup>Katuktsa mysipokzitsiki hỹ. Hozipyryktsa tsihitsu wata my. Uta katuktsa sapyzeyke mohyrikosokda. <sup>12</sup>Aty hozipyrykzatsa tsihitsu



(Soão 10.11)

tsumuêhitsu atahi okyrysaro soho humo zuba tarabaja mykara. Batu istsihitsu babata byita tu. Sitsumuêhitsu zuba. Parini mozumuze tsipybyrêta ipokso moparakik. Hozipyryktsa myserekek. Iwaze parini mozumuze hozipyrykzatsa paikpa motururukuknaha. Nanabyitaba motururukuknaha. Parini hozipyrykzatsa mysiboro mykara tahi iwatsahi ipokso sipybyrêtsa mykaranaha. <sup>13</sup>Tsumuêhitsu niparakik. Okyrysaro humo tarabaja mykara. Iwaze hozipyrykzatsa batu sipokzitsinymyhy.

<sup>14-15</sup>Utakta hozipyrykzatsa tsihitsu wata my. Kamypokzitsiukrêta. Kazo humo kahyrinymyrêta kazo kahumo tsihyrinymyrêta. Nawatu katuktsa kahumo sihyrinymyrêtsa. Utakta katuktsa iksinyba. Katuktsa pokzi mohyrikosokda. Estuba katukta pibeze zeka sisapyzeyke mohyrikosokda — niy.

<sup>16</sup>— Nanabyitaba ustsizubarêtsa my. Usa okarawy eze mopykyryknaha. Asahi Deus bo mysioktyhyryk kaharere bo hỹ mykaranaha. Sizubarêtsa kaharere bo hỹ mykaranaha. Utakta sizubarêtsa kazo bo mysioktyhyryk hỹ.

<sup>17</sup>Katuktsa pokzi mohyrikosokda. Mohyrikosokda bykyze mynahyryzikpo. Iwaze kazo kahumo tsimypokzitsiarêta. Katuktsa pokzi mohyrikosokda kazo kahumo tsimypokzitsiarêta. <sup>18</sup>Utakta mohyrikosokda ahabyi zeka ba zikbezenaha. Tubabatu kazo tihi:

“Tsimyhyrykosokda zeka tsinahyryzikpo”. Iwatahi tsimyhyrykosokda tsihikik yhỹ tsimy. Bykyze tsimynahyryzikpo tsihikikze yhỹ tsimy kazo niy. Iwa — Sesus niy.

<sup>19</sup>Sudeutsa iharere soho niharapepehakanaha.

<sup>20</sup>Wastuhu:

— O atakta hyrikoso sapybara ituk napykyryk. Iwatahi paikpa mytsaty nikara. Amy sa tsiyawabykynaha — nikaranaha.

<sup>21</sup>Utsa Sudeutsa tihi:

— O batu. Maku hyrikoso sapybara ituk mopykyryk zeka ba ziktsaso. Maku hyrikoso sapybara ituk mynapykyryk zeka ihyrizikubyrity bazizororowy batu zik — nikaranaha.

### **Sudeutsa Sesus harere bo batu yhy ahabyitsa nikaranaha.**

<sup>22</sup>Kyze Sudeutsa Sesus bo niaha. Serusarêhe ezektsa myikaha niaha. Pororo ziknakaranaha, nawa Deus wahoro zubata nizukninahaze mytsaty ziknakaranaha. Hyritsikze imyikaha bo pororo ziknakaranaha. <sup>23</sup>Sesus Deus wahoro zubata zikarazik buruk paikpa nikaranaha. Tubabatu ispehatsa Soromao sapy zinaroko. <sup>24</sup>Anaeze Sudeutsa Sesus pauk baze niriktotohokonahaze ipe niaha:

— Ikiya hisa Deus zipehata ja Kiristu. Hawaze sa mybo asoho tsiyawawiky. Ikiya Deus zipehata tsimyzeka mybo tytsaso — niaha.

<sup>25</sup>Sesus hi:

— Botu kasoho iktsaso. Ikiyahatsa kaharere humo batu ahaspirikpo. Hawa mykara Deus zikwy humo iwaze utakta Deus zikpehata mykara ana hi piwatawyky. <sup>26</sup>Ikiyahatsa kaharere humo batu ahaspirikpo.

<sup>27</sup>Katuktsa kaharere bo hyhy mykaranaha. Asahi hozipyrykzatsa watsa mykaranaha. Hawa hozipyrykzatsa tsihitsa hapik mokurunaha. Katuktsa niwatihi kaharere bo hyhy mykaranaha. Kaksoho piwabynahaze sispirikporêtsa. Uta kino mysiny. Katuktsa mynamopykyryknaha niy.

<sup>28</sup>Kahumo simysapyrêtsa moziknaha. Batu aty tohi ziksiakse.

Batu estuba kino ba ziaksenaha. Tahawahi katuk mozurukunaha hyhy, mohyrikosokdanahaze Deus sihumo tsimypokzitsiukrêta ituk tahawahi mynapykyryknaha <sup>29</sup>Kazo atahi zikpehahik iwatsahi sizubarêtsa kahumo sispirikporêtsa. Kazokta abazuba zikwy. Ba aty tohi iekze ziksiokty. Ba aty tohi katuktsa ziksiokty — niy. <sup>30</sup>— Kazikwy kazo zikwy kino atsatu my — Sesus niy.

<sup>31</sup>Iwa Sesus niyze Sudeutsa haraharetsa ty inasikyknaha iwatsahi ity zibezezyzykynaha.

<sup>32</sup>Sesus ispe niy:

— Uta kazo zikwy humo tisapyrêna ty mykara. Amo sa haraharetsa ty tsiplikbeze tsihikiknaha. Hawa sa ikykara — niy.

<sup>33</sup>Sudeutsa:

— Amy ty isapyha ty tsimyzeka ba zabezenaha. Hawa Deus zikwy tsiyawawiy anahumo hi ba zabezenaha. Aharere batu imysapy mytsaty tsimykaranaha. Ikiakta maku zubata. Maku tuze “Kazikwy kazo zikwy

kino atsatu” tsimy. Iwatsahi haraharetsa ty tsipabeze tsihikiknaha — niaha.

<sup>34-35</sup> Sesus:

— Amy ty Moises ziwatahaka wasani niy. Deus harere ziwatahakaze wasani niy. Botu ziwatahaka Deus harere papeu humo “Ikiahatsa deustsa watsa tsimaha” botu ziwatahaka. Iwa kytsa bo asahi sinarohotsa.

<sup>36</sup> Deus hi zikpeha. Aparakbaha Deus bo mysiockyhyryk my. Utahi mymyoktyhyrykta. Amy skaraba tsimaha: “O iharere ty Deus okzeka batu imysapy my.” Mytsasokoze “Utakta Deus tse my”. O iharere ty batu imysapy mybarapetu tsimykaranaha — niy.

<sup>37</sup>— Utakta Deus zikwy humo watawy abyizeka kahumo batu ahaspirikpo wasani tsimykaranaha. Utakta Deus zikwy piwatawyky iwatsahi batu ahamysapy tsimykaranaha. <sup>38</sup> Kaharere humo ahaspirikpo ahabyizeka hawa mykara anahumo hi ahaspirikporëtsa. Tsimyspirikponaha zeka ikiahatsa:

“O Sesus zikwy izo zikwy kino atsatu my” tsimaha — niy.

<sup>39</sup> Iwatsahi Sudeutsa itsipa humo asiba ziockyhyrykzonaha. Batu zik hawa tohi zikaha Sesus niwakik.

<sup>40</sup> Iwaze Sesus buburu Sorodão inarokoha koikny zitsikzazo. Anaeze tapara Suão Batista sizubarëtsa nisiharasusuku. Anabo hi Sesus niukuru. <sup>41</sup> Sizubarëtsa ibo zumunaha. Asahi nipamykysokonaha:

— O Suão Batista Deus zikwy ty batu mybo tywatawy. Amo ata maku soho botu nitsasoko wasani nikara — nikaranaha. <sup>42</sup> Iwaze kytsa sizubarëtsa iharere bo hyÿ nikaranaha. Asahi amykta taba buburu Sorodão ezektsa ihumo sispirikporëtsa niaha.

### Rasaru nihyrikosokda naha soho.

**11** <sup>1</sup> Kyze Rasaru tsimyitsapyrëta. Sinini nikara. Tatukeykyryk tuk Betanija eze hudik ziknakaranaha. Maria inarokotatsa, ustatsa Marata inarokotatsa iwaza.

<sup>2</sup> Maria katsa Rasarutsy hi iokmorënikia tsipokzitsarëna Sesus zipyryharasusuku. Taharadi ty zipyrywiki. Maria atatsa tihi. <sup>3</sup> Iwaze wytykyryk maku Sesus bo zipegahiknaha. Sesus bo zumuze ipe niy:

— O ikia aharereziuwu tsimyitsapyrëta — niy.

<sup>4</sup> Ana ziwabyze Sesus ipe niy:

— Botu kahyrinomyrëta. Rasaru tsimyitsapyrëta hiba.

Mohyrikosokdaze niakbanahatsa tuk ba zikapykyryk. Deus zikwy humo mynahyryzikpo. Kytsa isoho motsasokonaha. Rasaru “Deus tse zikwy humo inahyryzikpo” mykaranaha — niy.

<sup>5</sup> Sesus Marata Maria Rasaru iwatsa humo tsimypokzitsiarëta ziknakara. <sup>6</sup> Sihumo tsimypokzitsiarëta tasapy eze inapykyryk iwaze petok zuruze ibo niukuru. <sup>7</sup> Kyze zinymyrykynahatsa pe niy:

— Tupaktsa kytsa! Sudeja boktsa — niy.

8— O mypehatsa Sudeutsa zabeze tshikiknaha. Botua haraharetsa ty zabeze tshikiknaha. Iwatatu sa tsipiksikirizo — niaha.

9-10— Yhÿ niy. Abaka Deus tarabaja mynakara. Okoroze kytsa haramwe humo amypubyri iktsa mykaranaha. Maku unata pitabakaze mynaraha. Batu iktsa zikaha. Maku okoroze pitabakaze wasani my. Haramwe humo ske buruk iktsa my. Aty Deus tsyhyryze tarabaja my zeka maku okoroze pitabakaze tawata. Bykyze batu zik maku unata pitabakaze tawata. Tupaktsa! Kytsa ba zikbezenaha Deus batu yhÿ mykara. Iwatsahi bazik bezenaha. Tapara Deus hyriziktsokzawy pepykba. Abaka ba zikbezenaha Deus kabete batu hÿ ziky. Aibani zuba pikbezenaha — niy.

11 Zinymyrykynahatsa pezo niy:

— Myharereziuwu Rasaru purubaka. Abahi mozipopo — niy.

12— O purubaka zeka mozororozo hÿ — nikaranaha.

13 Rasaru botu nihyrikosokda ana humo hi Sesus tsihyrinymyrÿta. Iwatatu — “Rasaru purubaka” niy iwatsahi Rasaru purubaka tu ja — mytsaty nikaranaha.

14 Iwaze Sesus mypubara ty nitsasoko. Ispe niy:

— Rasaru nihyrikosokda — niy. 15 Iwatatu ibo batu pão. — Aba Deus zikwy pahawatawyky. Kazikwy humo iktsa tsimahaze kahumo ahaspirikporÿtsa tsimoziknaha. Iwatahi kakurÿta. Nihyrikosokdata boktsa kytsa! Tupaktsa — niy.

16— O katsa ituk tsimykurunahaktsa kytsa! Sesus pibezenaha zeka katsa niwatihi ituktu tsimyhyrikosokdanaha — Tome niy. Tome beketsa petok inarohota nikara. Iwaze Sesus tuk zinymyrykynahatsa nihyrikosokdata bo zumukunaha.

### Sesus niakbanahatsa nasihyrizikpo.

17-18 Betanija bo zumunaha. Betanija Serusarÿhe bazebabatu.

Harakykbyi kirometero zuba. Nihyrikosokdata sapy bo zumunaha. Kytsa:

— O Rasaru nihyrikosokda. Harakykbyihi zuruze Rasaru harahare oke eze ziytyknaha — nikaranaha. 19 Marata itsy Maria niwatihi Rasaru pokzi nipuziukunaha. Sudeutsa kytsa situk Rasaru pokzi nipuziukunaha. 20 Iwaze Marata Sesus sukmo soho ziwabyze atatsa ibo niukuru. Sesus zihobyk. Maria wahoro eze tu niapykyryk. 21 Marata Sesus zihobykze ipe niy:

— O ikia mytuk tu zeka kaokaha ba zikumuzã. 22 Amy Deus bo tsimyzapykyky atsatu abo nyny my. Ikia Deus bo tsimypamykysoko zeka kaokaha soho amy tsimyzapykyky anahi abo nyny my — niy.

23— Aokaha mynahyrizikpo — niy.

24— Yhÿ niy. Atahi mynahyrizikpo ana humo hi kahyrinymyrÿtatsa. Deus myzo siakbatsa sizubarÿtsa nasihyrizikpoze kaokaha kino niwatihi mynahyrizikpo — niy.

<sup>25</sup>Sesus:

— Uta hiba siakbatsa hyrizikpokotsa. Kahumo nahyrizikponaha. Kytsa kahumo sispirikporêtsa asahi mohyrikosokdanahaze nahyrizikponaha asahi Deus tuk tahawahi mynapykyknaha. <sup>26</sup>Asahi kahumo sispirikporêtsa tuze niakbanahatsa tuk ba zikykykyknaha. Asahi Deus tuk mynapykyryknaha. Kaharere bo sa hyĩ tsimy — niy.

<sup>27</sup>— Yhĩ niy. Ikia hi Deus zapehata mywata tsikyzyk. Ikia hi Deus tse babata. Tahi tsipiperyknaha — niy.

### Sesus kytsa pokzi nipu.

<sup>28</sup>Iwaze Marata nitsasobaze tatsy bo ziksizo. Tatsy bo nisakzihiki tu. Utsaktsa batu siwabyhy:

— O katsy mypehatsa izumu ikia zasapykyky. Ske puk teze tu — niy.

<sup>29</sup>Iwaze Maria ziwabyze Sesus bo niparak. Aidy kyikyky niy.

<sup>30</sup>Izumubahaneze pyk niy. Marata zihobyk anaeze ibo zumu. <sup>31</sup>Sudeutsa atatsa hapik niukurunaha. Asahi Rasaru pokzi nipuziukunaha. Atatsa bo iktsa niahaze:

— O iytyk bo ja moparakak — mytsaty ahabyitsa nikaranaha. Iwatsahi iapik niukurunaha.

<sup>32</sup>Atatsa Sesus bo zumu. Ibo iktsa niyze taekaratsa humo puruk puruk niy:

— O mypehatsa ikia mytuk zeka kaokaha ba zikumuza — niy.

<sup>33</sup>Maria taokaha pokzi nipuziuku atatsa bo Sesus iktsa niy. Sudeutsa kino ituk nipuziukunaha. Sizubarêtsa nipupuziukunaha. Sisukatsihikrêtsa. Sesus sihumo tsimypokzitsiarêta. Iwatahi sihumo tisukatsihikrêta niyzyk.

<sup>34</sup>— Iytyk sa hana eze — niy.

— O mypehatsa panykta anaeze — niaha.

<sup>35</sup>Sesus sipokzi nipu.

<sup>36</sup>Iwatsahi Sudeutsa ihyritsik bo iktsa niahaze:

— O Rasaru humo tsimypokzitsiarêta — nikaranaha.

<sup>37</sup>Utsa kytsa:

— Tapara ihyrizikubyritya zizororowy. Tozeka ja Rasaru ty iwa my tawata hĩ — nikaranaha. Asa zuba nipamykysokonaha.

### Sesus Rasaru zihyrizikpowy.

<sup>38</sup>Iwaze Sesus ihumo tsimypokzitsiarêta iytyk bo zumu. Tisukatsihikrêta nikara anaeze harahare hok eze niapykyryk. Sesus Mata Maria Sudeutsa kytsa sizubarêtsa iwatsa iytyk bo zumukunaha. <sup>39</sup>Sesus ispe niy:

— Harahare tsispetunahaktsa! — niy.

— Mypehatsa ba hawa tohi zikaha! Abaka inury mobibibaka harakykybyihi zuruze anaeze nitsahok. Tsihõhõrêta — Marata niy.

<sup>40</sup>— Uta zuba botu iksaso ikia kahumo aspirikporētatsa zeka Deus zikwy piwatawyky. Ana humo hi ma tsimy — Sesus niy.

<sup>41</sup>Iwaze kytsa harahare zipetuhiknaha. Sesus Deus bo nipamykysoko:

— O kazo kaharere tsiwabyikik. Iwatahi “Ikia tsamysapyrēta” mykara.

<sup>42</sup>Kaharere tsiwabyikik. Anahi kahyrinymyrēta. Kytsa kapauk bazektsa okze abo mopamykysoko. Iwatsahi kahumo sispirikporētsa moziknaha. Ikia hi tsikpeha ana humo hi sihyrinymyrētsa — niy.

<sup>43</sup>Sesus tazo bo nipamykysobaze opykani huahua niy:

— Rasaru pany puketyny — niy. <sup>44</sup>Rasaru nihyrikosokdata tu atsoko

izoihik. Panu ty takwarawytuk tu zizoi. Sesus ispe niy:

— Iakwarawy tsipararanahaktsa iwaze pitaba! — niy.



(Soão 11.44)

**Sudeutsa taparaktsa: — Hawa sa Sesus tabeze — nikaranaha.**

<sup>45</sup>Iwaze mektsaktsa Sudeutsa Maria bo inakozorenaha Sesus humo sispirikporëtsa moziknaha. Asahi Rasaru inahyrikizkpo naha zinyanaha Sesus humo sispirikporëtsa. <sup>46</sup>Utsa kytsa ihumo batu sispirikpo. Asahi Pariseutsa bo nitsasokonaha. Ispe niaha:

— O Sesus nihyrikosokdata Rasaru zihyrikizkpowy — niaha. Iwa Pariseutsa bo nikaranaha.

<sup>47</sup>Iwaze Pariseutsa, taparaktsa ziknapamykysokonahatsa iwatsa izumubanaha. Asa zuba Sesus soho ty nipamykysokonaha:

— Hawa sa Sesus ty tsimaha. Atakta tazikwy myzubaha bo ziwatawyky. Hawa sa Sesus ty tsimaha <sup>48</sup>Ata tazikwy piwatawykik zeka kytsa sizubarëtsa ihumo sispirikporëtsa moziknaha. Situktsa moziknaha. Sesus ispehatsa mozik zeka Homa taparaktsa Sesa sodadutsa mymyoktyhyryk mysipeha Deus wahoro zubata pipaparabanaha. Mytyryktsa mokbabanaha. Myhyrytsa nihyrikosokdata Moises harere ty ba ziksihyrinymyrynaha — iwa asa zuba nipamykysokonaha.

<sup>49</sup>Iwaze taparaktsa ziknapamykysokota Kajapas inarokota ispe niy:

— Ikiahatsa batu ahahyrynymyry niy. <sup>50</sup>Sesus tsipibezenaha zeka Homa sodadutsa mytyryktsa ba ziksibanaha. Iwatsahi katsa Sesus tsipibezenaha zeka wasani my. Kaharere ahahumo tsihokdaharëna iwa zeka Homa sodadutsa mytyryktsa ba ziksibanaha — Kajapas niy.

<sup>51</sup>Deus tapara tihi:

— Sesus kytsa sapyzky mohyrikosokda — niy. Ana hi Kajapas batu hyrinymyry. Nitsasokoze:

— Katsa Sesus tsipibezenaha zeka wasani my — niy. Deus harere soho batu ihyrinymyry. Ihyrinymyrybyita tu Deus harere bo yhy niy. Hawa mytsaty nikara batu tyso. Sesus Sudeutsa tyryktsa sapyzky mohyrikosokda Deus botu nitsasoko. <sup>52</sup>Utsa kytsa bipyritsa sapyzky kino niwatihi mohyrikosokda. Iwatsahi sizubarëtsa Deus tyryktsa sakurëtsa moziknaha. Iharere bo hy mykaranaha. Iwatahi Sesus mohyrikosokda Deus niy.

<sup>53</sup>Iwa zeka Sudeutsa taparaktsa asa zuba nipamykysokonaha:

— Hawa sa Sesus tabeze — nikaranaha. <sup>54</sup>Iwatahi Sesus Sudeutsa pokso mekybotu niparak. Eparã bo niy. Eparã jerukbara bo tasapy. Anaeze Sesus tuk zinymyrykynahatsa tuk niapykyryk.

<sup>55</sup>Sudeutsa kytsa sizubarëtsa Serusarëhe bo niukurunaha. Sudeutsa myikaha bo Serusarëhe bo pororo ziknakaranaha. Paskoa mokymyze anaeze Deus taparaktsa nisitsumuëhiki ana bo mytsaty ziknakaranaha. Sizubarëtsa Serusarëhe bo niukurunaha. Tapara simyikaha kymybyitu tahasopyk tyty nikaranaha.


— Katsa meky watu tsimoziknaha zeka Deus okzeka wasani tsimaha — nisisopykyknaha.

<sup>56-57</sup>Iwaze sizubarẽtsa Sesus ziperykynaha. Asahi Deus wahoro zubata sturupe eze ziberikinaha. Asahi:

— Mymyikaha bo ja mozumu — nikaranaha. Asa zuba ziperykynahaze nipamykysokonaha. Pariseutsa, taparaktsa Deus wahoro zubata eze ziknapamykysokonahatsa iwatsa aparakbaha nisipehaka. — Aty Sesus piny zeka mybo tytsaso! — niaha. Iwa nitsasokonaha Sesus tsipa humo ziocky tshihiknaha hỹ.

### Sesus Betanija eze.

**12** <sup>1</sup>Kyze Sesus Rasaru bo zumu. Atahi zihyrizikpowyta ibo zumu. Rasaru Betanija Ezekta niy. Tapara Sudeutsa myikaha Paskoa inarokoha zumubahanize. Iwaze hi zuba simyikaha nakymy. Iwaze Sesus tuk zinymyrykynahatsa tuk Rasaru bo zumunaha. <sup>2</sup>Anaeze Marata sidisahawy humo bu nikara. Rasaru zinymyrykynahatsa tuk tadisahanaha. <sup>3</sup>Maria jokmorẽnikia zebykyk niy. Jokmorẽnikia ty tsasuk tisapyrẽna eze narado inarokoha ipokzitsanikia. Atatsa jokmorẽnikia tsizubarẽna ty zibykyryk niy. Iwatatsahi Sesus zipyrytsa harasusuku. Iwaze atatsa taharadi tyty zipyrywiki niy. Iwahoro tsiokmorẽna niypykyryk. Atatsa Sesus humo tsimpokzitsiarẽtatsa iwatatsahi Sesus zipyrytsa harasusuku. Iwa Maria nikara.



(Suão 12.3)

<sup>4</sup>Sudas Iskariotses Sesus tuk zinymyrykyta tisakparẽta mozik. Atakta Sesus humo tsharerewabymybarẽta, sisukyrytsitsa bo myzioktyhyrykta. Atahi zibetsakak ipe nikara:

<sup>5</sup>— Amy skaraba jokmorẽnikia ty batu ity huak. Tspihuak zeka okyryrsaro tsizubarẽna tsmaha. Iwaze okyryrsaro sinamybyitsa bo nyny tsmaha zeka wasani my — niy.

<sup>6</sup>Sudas Iskariotses zinymyrykynahatsa okyryrsaro suk zikziperyky. Utsa papatu okyryrsaro zikziakseke. Tatsyhyryze hi okyryrsaro ziaakseke utsa papatu ziknakara. Nitsasokoze — Amy skaraba jokmorẽnikia ty batu ity huak — okyryrsaro humo niy. Ata kino okyryrsaro ziaakse tshihikik.

Imypokzitsiukbyita tu okyrysaro ziaксе tsihikik. Batu sinamybyitsa bo nyny ziky.

7— O awatu betsak betsak byity! — Sesus niy. — Atatsa hi jokmorënikia ty zipyryktsa harasusuku. Atatsa hi kaokzeka tsimysapyrëtatsa jokmorënikia ty pikarasusuku my niy. <sup>8</sup> Sinamybyitsa bo nyny tsimykaranaha zeka wasani my. Utakta ahatuk batu mopykyryk kabo ka ba nyny zikaha. Jokboha kyritoktok ahatuk mopykyryk. Aba kabo ty nyny tsimaha zeka wasani my — niy.

**Sudeutsa taparaktsa kino niwatihi nikaranaha: — O  
Rasaru niwatihi tabezekta! — nikaranaha.**

<sup>9-18</sup> Kyze Sudeutsa sizubarëtsa Sesus bo zumunaha. Sesus Betanija eze niapykyryksykyk. Ana ziwabynahaze Sesus Rasaru ahatsa bo niukurunaha sibo inakozorenaha. Atahi Sesus zihyryzikpozota bo inakozorenaha. Sudeutsa sizubarëtsa taparaktsa Deus wahoro eze ziknapamykysokonahatsa ihumo batu sispirikpo. Rasaru inahyryzikpoze kytsa Sesus humo sispirikporëtsa. Iwaze taparaktsa Deus wahoro eze ziknapamykysokonahatsa nitsasokonaha:

— O Rasaru niwatihi tabezehikta kytsa — nikaranaha. Kyze aparakbaha Sesus bo iktsa nikaranaha. Sesus Rasaru zihyryzikpozoze ziwabykynaha. Hawa ipe niy:

— Rasaru pany — niy. Iwaze Rasaru harahare ioke ikny zoihik.

Iwaze Sesus Serusarëhe bo niukuruze pikuzza bete tadyhyhyk. Tubabatu Deus harere papeu humo tubabatu ziwatahaka atsatu Sesus nikara. Iwatahi pikuzza bete tadyhyhyk. Deus harere papeu humo tihi:

— O Serusarëhe ezektsa ahasukatsihik byihuja! — niy. —

Ahapehatsa mozumuze pikuzza bete tadyhy — niy.

Iwa tubabatu Deus harere papeu humo ziwatahaka. Iwatahi Sesus pikuzza bete tadyhyky. Iwa Serusarëhe bo niy.

**Sesus Serusarëhe bo zumuku.**

Kyze kytsa sizubarëtsa Serusarëhe bo niukurunaha tahamyikaha bo asahi Sesus bo niaha. Ziwabykynahaze:

— O Sesus mozumuku — nikaranaha. Iwaze ibo niukurunaha.

— O Sesus tazikwy ty mybo tsipiwatawyky — nikaranaha. Tazikwy ziwatawykyze Rasaru zihyryzikpowy niy. Anahi ziwabykynaha. Iwatsahi Sesus haraze niukurunaha. Iwaze tsarakzapatsa nasibykyknaha ske buruk nisipaparkanaha. Sizubarëtsa nikaranaha. Sesus ispehatsa wata humo.

— Sesus Deus tuk niapykyryk. Mywata niyzik. Deus tukta katsa mybo inasik.

Atakta mypehakatsa my, katsa Isareu tsekokatsa ikia hi mypehakatsa.

Atakta Deus ihumo mymysapywyky hỹ. “O mykurẽtsa”

— nikaranaha.

Sesus Serusarẽhe bo niy. Pikuza bete tadyhyhyk iwa Serusarẽhe bo zumuku. Hawa tubabatu Deus harere papeu humo ziwatahaka atsatu Serusarẽhe bo zumu. Wasani niy. Sesus Serusarẽhe bo niyze hawa tubabatu ziwatahaka. Ana humo hi zinymyrykynahatsa batu sihyrinymyry tsihokdaharẽna. Anaharere batu siwabyhy. Aiba zuba mytsaty nikaranaha. Sesus bijoikpe bo nidoze tahapetu sisopyk:

— O Sesus Serusarẽhe bo zumuze Deus papeu humo botu ziwatahaka tawata hawa tubabatu ziwatahaka atsatu niyze Serusarẽhe bo zumu — iwa Sesus soho bo mytsaty nikaranaha. <sup>19</sup>Kyze Pariseutsa asa zuba nipamykysokonaha:

— Kytsa sizubarẽtsa ihumo sispirikporẽtsa nikaranaha. Kytsa myharere bo batu yhỹ zikaha. Katsa tsimytsasokonaha zeka “ihumo batu ahaspirikpo” kytsa “ihumo sispirikporẽtsa” — nikaranaha. Asa zuba Pariseutsa nipamykysokonaha.

#### **Kerokotsa Sesus bo mynakozore tsihikiknaha.**

<sup>20</sup>Kyze Kerokotsa Sesus bo mokozorenaha. Asahi usts tyryktsa meky ezektsa tu niaha. Asahi Serusarẽhe myikaha bo niukurunaha. Sudeutsa tuk Deus bo nipamykysokonaha:

— O ikia zuba tsamysapyrẽta. Deus zuba atahi tsipunihikrẽta bijoikpe eze my tsimaha — nikaranaha. <sup>21</sup>Piripi bo nikaranaha. Atahi Betesaida ezekta. Betesaida Karireja eze ky. Ata bo hi niukurunaha. Ipe niaha:

— O Sesus bo tsimynakozore tsihikiknaha — nikaranaha.

<sup>22</sup>Iwaze Piripi Ådere pe niy atahi Peduru tsy ipe niy:

— O Kerekotsa Sesus bo mynakozore tsihikiknaha — niy. Kyze Piripi Ådere ahatsa Sesus pe niaha. Asahi:

— O Kerekotsa abo mynakozore tsihikiknaha — mykaranaha. Iwa Sesus bo nitsasokonaha. <sup>23</sup>Sesus ispe niy:

— Utakta iknasikta maku babata ahawata ikyzik. Aibani mohyrikosokda. Mohyrikosokdaze kytsa piksohonaha! Atakta tsimysapyrẽta tsizikwyrẽta my — mykaranaha.

<sup>24</sup>— Wabytoktotaha niy. Katsaktsa tapara riktsa tsimysipariknaha. Tsimysipariknahaze wytyk bo pokpok tsimykaranaha. Estubaze zuba wytyk eze my, ata hi taypykze riktsa tsiriktsazubarẽta mozik. Hawa riktsa mysiubara iwata tabezewy ziwatawyky. (Iwa nitsasokoze tabezewy soho ziwatawyky.) Tapara mohyrikosokda bykyze mynahyryzikpo my. Iwaze kytsa sizubarẽtsa kahumo sispirikporẽtsa. Rik soho iktsasokoze hawa rik mysiubara iwa tabezewy soho ziwatawyky — niy.

<sup>25</sup>— Aty Deus harere bo yhỹ ahabyizeka mohyrikosokdaze Deus tuk ba zikapykyk. Aty Deus harere bo hyỹ mykara zeka mohyrikosokdaze



(Suão 12.24)

tawahi Deus tuk mynapykyryk. <sup>26</sup> Aty katukta mozik zeka kaharere bo hyÿ mykara. Kaharere bo zuba hyÿ mykara, katuk tawahi mynapykyryk. Kazo ihumo mykara: O atakta tsimysapyrêta mykara — niy.

#### Sesus tabzewy soho nitsasoko.

<sup>27</sup> Sesus tihi:

— Abaka paikpa mytsaty mykara. Hawa ha ty ja Deus bo mopamykysoko “O kazo kabezetsihikbyita mykara” my. Iwa Deus bo batu tyso. Utakta mybarawy eze sinini mykara naha humo tsimyzihikik zeka yhy my. Iwa ibo mopamykysoko — my. <sup>28</sup> Kyze Deus bo mopamykysozo:

— O kazo kytsa bo tysisapywyky. Iwatsahi asoho motsasokonaha “O Deus tsamysapyrêta. Azikwyrênikita tu tsimypokzitsiukrêta” nikaranaha — iwa asoho motsasokonaha. Iwa babatu iaksoho bijoikpe ikny iwaby. Deus tihi:

— Botu kasoho ziwatawyky. Aparakbaha botu kahumo piksohokonaha “O Deus tsamysapyrêta, azikwyrênikita tu tsimypokzitsiukrêta”. Ikia hi myhyrizikwanikita kasoho piwatawykyzo. Kytsa sizubarêtsa kasoho tihi: “O Deus tsamysapyrêta, azikwyrênikita tu tsimypokzitsiukrêta” mykaranaha — Deus niy.

<sup>29</sup> Kytsa sizubarêtsa Sesus baze niriktotohokonaha iaksoho ziwabynahaze. Wastuhu kytsa nikaranaha.

— O nitotokoro — nikaranaha. Utsa kytsa batu.

— Bijoikpe iknyktsa Deus tsumuêhîtsa ibo nitsaso — nikaranaha.

<sup>30</sup> Kyze Sesus ispe niy:

— Iaksoho tsiwabynahaze bijoikpe ikny ahatsyhyryze niy. Batu kahumo ka. Ikiahatsa bohi Deus harere tsiwabykynaha — niy.

<sup>31</sup> Abadisihi Deus kahumo sispirikpobyitsa bo motsaso ispe my:

— O ikiahatsa batu ahamysapy tsimykaranaha. Sesus humo tsimyspirikpobyrikinaha zeka batu ahamysapy tsimykaranaha.

Ahapehatsa Sesus humo mypunihikbyinaha. Batu aty tohi ityryk zikyzyk. Sesus zuba ipunihikanikita my — niy.

<sup>32</sup>— Sizubarêtsa kahumo batu siakparawy. Iwatsahi pikbezenaha. Iharapatawyhyta humo pikyryziknaha iwa mohyrikosokda. Iharapatawyhyta pitseknahaze pikbezenaha. Iwa mohyrikosokdaze kytsa nanabyitaba kahumo sispirikporêtsa moziknaha — nikara.

<sup>33</sup>Sesus tasokoze niy iwaze iharapatawyhyta humo pihyryziknaha. Hawa mohyrikosokda mysihyrinymyryky niy.

<sup>34</sup>Sizubarêtsa ipe niaha:

— Tubabatu Deus harere papeu humo Kiristu soho ziwatahaka. Tubabatu nihyrikosokdata Moises ziwatahaka. Kiristu, Deus zipehata ba zihyrikosokda. Tawahi mynapykyryk — niy. — Ikiã “Utakta iknasikta maku babata ahawata ikyzyk” tsimy. Atahi inasikta maku babata mywata mohyrikosokda bykyze mynahyryzikpo tsimy. Atakta ja Deus zipehata niwatihi atsatu sa — nikaranaha.

<sup>35</sup>Sesus ispe niy:

— Utakta Deus harere myzubaha bo mysihyrinymyryky. Aba mysihyrinymyryky. Aibani mohyrikosokda iwatsahi kahumo ahaspirikporêtsa tsimoziknaha. Abaka kahumo ahaspirikporêtsa zeka wasani my. Kahumo ahaspirikpo ahabyizeka sinini ykarawy bo tsimaha. Kytsa unata eze batu pão maha. Hana bo mykaranaha miwa humo batu sihyrinymyry. Iwa kytsa kahumo batu sispirikpo miwa ezektsa watsa mykaranaha. Asahi sinini ykarawy tahasapy humo hi batu sihyrinymyry. Kytsa miwa haburuk tu mokurunahatsa watsa.

<sup>36</sup>Utakta ahatukze kahumo ahaspirikporêtsaktsa! Iwaze katyryktsa tsimoziknaha. Ahamysapyrêtsa tsimoziknaha. Mekywatu tsimoziknaha. Kytsa iwororoha buruk pitabakanahaze ana bo hi pinynaha ikiahatsa siwatsa tsimoziknaha — niy. Iwaze nitsasobaze niparak. Kytsa sizubarêtsa papatu niparak.

### **Sudeutsa Sesus humo batu sispirikpo.**

<sup>37</sup>Kyze Sesus zikwy myzubaha bo ziwatawyky. Asahi ihumo batu sispirikpo. Iwaze iwatawy bo iktsa nikaranahaze ihumo batu sispirikpo.

<sup>38</sup>— Tubabatu Deus sohotsa Isaijas botu ziwatahaka:

“O mypehakatsa aharere ty kytsa sizubarêtsa bo iktsasoko. Kytsa aharere humo batu sispirikpo.

Ikiã azikwy soho humo batu sihyrinymyry.

Ikiã azikwy soho sihumo tsihokdaharêna” niy.

Iwa nihyrikosokdata Isaijas kasoho ziwatahaka. Iwaha humo hi kytsa batu kahumo sispirikpo mahaze Isaijas harere wasani my nikaranaha. Isaijas papeu humo ziwatahaka — niy. Asa watsa nikaranaha.

<sup>39</sup>Sudeutsa Sesus humo batu sispirikpo. Hawa Isaijas tubabatu ziwatahaka nikaranaha. Isaijas nihyrikosokdata:

40 — Deus hawa kytsa mytsaty mykaranaha tsihyrinymyrëta ihumo paikpa mytsaty mykaranaha. Deus zikwy humo batu sispirikpo. Izikwy bo iktsa nikaranahaze batu ihumo sispirikpo. Deus harere ziwabynahaze batu ihumo sispirikpo. Ihumo sispirikpobyritsa tu simysapybyitsa nikaranaha Deus batu mysiokzo.

Simysapybyritsa situk niapykyknaha.

Batu ihumo sispirikpo iwatsahi simysapybyitsa nikaranaha Deus ba zisiokzo — niy.

Iwa tubabatu Deus sohokotsa Isaijas ziwatahaka.

41 Tubabatu ziwatahaka iwatsa tu Sesus harere ty kytsa batu siwabyhy, ana humo hi tsihyrinymyrëta. Iwatahi ziwatahakaze Sesus soho ziwatahaka. Aibani zuba aparakbaha ana humo hi sihyrinymyrëtsa.

42 Sudeutsa taparaktsa sizubarëtsa ihumo sispirikporëtsa. Batu tyso:

— Katsaktsa Sesus humo myspirikporëtsa tsimoziknaha. Ana ty hi batu tyso. Pariseutsa pokso sipybyrëtsa ba ziktsasonaha. Sudeutsa wahoro tozeka ja kytsa ispe nabo päotaha. Iwaze ba ziknapupunaha ana pokso sipybyrëtsa iwatsahi batu tyso “Sesus humo myspirikporëtsa” — mykaranaha. 43 Pariseutsa harere bo mytsatyziu nikaranaha. Kytsa harere humo zuba sakurëtsa. Deus humo ka batu. Deus harere humo tsikaeni zuba sihyrinymyrëtsa nikaranaha.

**Sesus harere tsimysapyrëna baba. Izumuze kytsa  
Deus bo nasioktyhyrk humo iwatahi izumu.**

44 Sesus sizubarëtsa opykani nisihuahua:

— Kytsa kahumo mynakaranaha zeka kahumo sispirikporëtsa. Ata humo zikpehaka sispirikporëtsa niwatihi — niy. 45 — Aty pikny zeka kazo kino piny. “O atakta Deus tse” my zeka Deus zikpehaka niwatihi yhy my — Sesus niy.

46 — Uta mybarawy bo ikzumu. Deus harere ty pahahyrinymyry iwatahi ikzumu. Kytsa kahumo sispirikporëtsa iwatsahi simysapyrëtsa moziknaha. Kytsa iwororo ha buruk pitabakanahatsa watsa pinynaha siwatsa moziknaha. Hawa wasani mykaranaha sihyrinymyrëtsa, meky watu moziknaha. Simysapyrëtsa hi.

47 Aty kaharere piwabykyze iwaze batu yhy my. Uta kino batu tyso: “O ikia Deus okzeka batu amysapy tsimy” iwa batu tyso. Utakta mybarawy bo ikzumu kytsa sizubarëtsa bo my. Sizubarëtsa simysapybyitsa nikaranaha kahumo meky watu moziknaha zeka Deus bo mysioktyhyk. Iwatahi ikzumu.

48 Asaktsa kahumo batu sispirikpo. Kaharere bo batu yhy mykaranaha. Usta ispe: “Ikiahatsa Deus okzeka batu ahamysapy tsimykaranaha” my. Deus aparakbaha mynasihyrizikpoze ispe my: “Ikiahatsa Deus okzeka

batu ahamysapy tsimykaranaha”. Utakta ahasoho ty batu tyso. Usta iwa motsasoko. Kytza kaharere bo batu yhỹ mykaranaha zeka iwa ispe my.

<sup>49</sup>Hawa motsasoko kazo harere my. Iharere hi ahabo motsasokoro. Hawa pahahyrinymyryky iharere zuba mykara. Usta harere ty ka batu tyso. Kazo harere zuba motsasoko. <sup>50</sup>Iharere bo hyỹ tsimaha zeka meky watu tsimoziknaha. Ahamysapyrẽtsa tsimoziknaha. Tsimyhyrikosokdanahaze Deus tuk ahawahi tsimynapykyryknaha. Ana humo hi kahyrinymyrẽta. Iwatahi iharere zuba motsasoko — Sesus niy.

### Sesus tuk zinymyrykynahatsa nisipyrypikik.

**13** <sup>1</sup>Byriri Paskoa maha taeze mykaha nakymy. Sesus zinymyrykynahatsa tuk tadisahaka. Sesus sihumo tsimypokzitsiarẽta. Abahi mohyrikosokda naha humo tsihyrinymyrẽta. Tazo bo piksizo ana humo hi tsihyrinymyrẽta. Iwatahi tahadisahanahaze hawa sihumo tsimypokzitsiarẽta mysiwatawyky. Sihumo tsimypokzitsiarẽta nikara.

<sup>2</sup>Zinymyrynahatsa tuk tadisahaka. Sudas Iskariotses Sesus sukyrytsitsa bo pioktyhyryk. Sesus soho sukyrytsitsa bo motsasoko. Sudas Iskariotses Simotse my. Hyrikoso sapybara pehakatsa Satanas humo Sudas Iskariotses Sesus isukyrytsitsa bo pioktyhyryk isopyksapybyita nikara.

<sup>3</sup>Sesus ana humo hi tsihyrinymyrẽta nikara. Atahi:

— O Deus tazikwy ty kabo nynyty niy. Deus kazo zikpeha. Aba Deus bo piksizo — niy. Ana humo kino Sesus tsihyrinymyrẽta.

<sup>4</sup>Kyik niyze takpyzazawy ty zukata niy. Iwaze takwiwy ty okok niy. Tazikuoik humo haĩ niy. <sup>5</sup>Iwaze pihik ty mypewy bo zisusuku niy. Maraksu maraksu nikara. Zinymyrykynahatsa nisipyrytsapikik. Tapara zipyrypikik iwaze zipyrywiki. Usta bo zipyrypikik iwaze zipyrywiki. Siwatu nisipyrytsapikik. <sup>6</sup>Iwaze Simaõ Peduru bo zumuze. Peduru:

— O hawa sa tsimy tsipikpyrytsapik sa — niy.

<sup>7</sup>— Yhỹ my. Aba nawa humo papyrytsapikik batu ahyrinymyry. Aibani zuba tsipinymyry amy humo papyrytsapik iwatahi aibani zuba tsipinymyry — Sesus niy.

<sup>8</sup>— O batu ba niy. Ikiakta ba zikpyrytsapik — Peduru niy. Sesus ipe niy: — Aty pyrytsapik ahabyizeka batu katuktsa tsimy — niy.

<sup>9</sup>— Tsipikpyrytsapik zuba taziwazy. Katsyhyrypetsa tuk tu iwaze kaharek tuk tu tsimy hỹ — niy.

<sup>10</sup>— Tsinamurukunahaze batu ahakpiaktsĩ. Tshabarazarẽtsa. Deus ahasopyksapybyitsa tu tsikykarannahaze pahaokzohik iokzeka nimuruku tawata tsimoziknaha. Deus botu ahamysapybara ty tsikykarannahaze iwatahu pahaokzo iwatahi inamuruhuknahatsa watsa tsimoziknaha. Estuba zuba ahatuk imysopyksapybyita tu nikara ba ziozko. Imysopyksapybyita tu nikara tsiaktsiarẽta wata niy.

<sup>11</sup>Estuba sisukyrytsitsa bo moparak isopyksapybyita mykara ana humo hi tsihyrinymyrêta iwatahi “Estuba ahatuk imysopyksapybyita tu mykara ba ziocko” — niy.

<sup>12</sup>Nisipyrytsapikbaze takpyzazawy ty korobykzo niy. Hwibihi mydisahakawy bo zinymyrinahatsa tuk tadyhyzo niy. Ispe niy:

— Ahapyrytsa pikbaze ahahumo ka sa tsihokdarêna niy. <sup>13</sup>Ikiahatsa kape tsimykaranaha:

“Mypehakatsa myhyrinymyrykytsa” tsimykaranaha. Wasani tsimykaranaha. Ahapehakatsa. Ahahyrinymyrytsa my. <sup>14</sup>Iwaze pahatsumuêhîki iwatsahi ikiahatsa kino niwatihi utsa kytsa tysitsumuêhînahaktsa! <sup>15</sup>Ikiahatsa kawatu tynakaranahaktsa! Ahapyrytsa pikiknaha wa. Ikiahatsa utsa tysitsumuêhînahaktsa! Utakta batu tyso:

“O uta sipehakatsa my. Iwatahi batu isty tsumuêhî.” Utakta ahatsumuêhîki. Ikiahatsa kawatu ahamytsumuêhîhuktsa! Tyharape tsumuêhînahaktsa tsimykaranaha. <sup>16</sup>Kaharere tsiwabyziukunahaktsa! Sitsumuêhîtsa pehatsa wa sukni ahabyita my. Zipehata tohi zipehaka harapewa sukni ahabyita my — niy.

<sup>17</sup>— Abaka ahahyrinymyrêtsa tsimaha. Kaharere bo tsimykaranaha zeka ahakurêtsa tsimoziknaha hÿ.

<sup>18</sup>Ikiahatsa bo motsasoko. Asahi nisiwatawyhik. Estuba ahatuk kasukyrytsitsa bo pikoktyhyryk. Imyspihikbatanikita iwatsahi pikbezenaha ana humo hi kahyrinymyrêta. Hawa ha ty Deus papeu humo tubabatu ziwatahaka atsatu my:

“Estuba maku katukta isopyksapybyita mykara. Atakta kadisahawy ty katuk hauk my ata hi isopyksapybyita my” niy. <sup>19</sup>Byri puêtsik kytsa pikbezenaha ana kino ahabo motsasoko. Iwaze pikbezenahaze kaharere humo tsimyspirikonaha.

<sup>20</sup>Kaharere tsiwabyziunahaktsa! Atakta pipehahik ihumo tsikspirikpokoze kahumo tsaspirikporêta hÿ. Atahi kahumo tsikspirikpoze atakta zikpehahik niwatihi ihumo tispirikporêta hÿ — niy.

**Sesus ispe niyzo: — Estuba maku ahatukta  
kasukyrytsitsa bo pikoktyhyryk — niy.**

<sup>21</sup>Iwa nitsasoze tsukatsihikrêta niy. Zinymyrykynahatsa pe mypubaraty niyzik.

— Tsiwabyziukunahaktsa! Estuba maku ahatukta kasukyrytsitsa bo pikoktyhyryk. Imyspihikbatanikita — iwa sizubarêtsa bo nitsasoko.

<sup>22</sup>Iwaze ziwabynaha tsahi paikpa mytsaty nikaranaha. Asa zuba nipamykysokonaha:

— O aty skaraba. Aty sisukyrytsitsa bo sa pioktyhyryk — nikaranaha.

<sup>23</sup>Zinymyrykyta hi Sesus ihumo tsimypokzitsiarêta. Atakta ibaze

tu nidyhyky. <sup>24</sup>Iwaze Simaõ Peduru tatsyhyrype ty pawyk niy, zinymyrykyta pe niy.

— “Aty skaraba asukyrytsitsa bo paoktyhyryk” iwa Sesus pe tsimy — niy.

<sup>25</sup>Iwaze zinymyrykyta hi Sesus bo okmymy niy. Akbyibatu ipe niy:

— Aty skaraba asukyrytsitsa bo paoktyhyryk — niy. Sesus:

<sup>26</sup>— Estuba katuk tamihi ty tumy bo sok my tahi kasukyrytsitsa bo pikoktyhyryk atsatu tsakyhy ty ibo nyny my — niy.

Iwaze atsikara ty okok niy. Zitsakze tumy bo sok niy. Iwaze atsikara tsakyhy ty Sudas Iskariotses bo nyny niy.

<sup>27-29</sup>Sudas atsikara tsakyhy zioke Sesus ekze niparak. Satanas harere bo hyõ niy. Iwatahi hyrikoso sapybara ituk mynapykyryknaha. Sesus ipe niy:

— Aidytykta! Hawa tsimyzeka aidytykta — niy.

Sudas zinymyrykynahatsa okyrysaro zikziperykyta. Iwaze wastuhu kytsa mytsaty ahabyitsa nikaranaha.

— O mydisahawy bo ja — nikaranaha. Utsa kytsa:

— O sinamybyikitsa bo okyrysaro ty nyny my. Ana humo hi Sesus ipe niy: “Aidytykta”. — mytsaty ahabyitsa nikaranaha.

Batu aty tohi Sesus harere bo siwabyhy. Sihyrinymyrybyitsa tu Sudas niparak. Amy humo nitsaso — Aidytykta! Hawa tsimyzeka aidytykta — niy. Anahi nitsasoze zinymyrykynahatsa batu sihyrinymyry. Iharere sihumo tsihokdaharëna.

<sup>30</sup>Sudas atsikara tsakyhy zioke eze zoihik. Zunubaze niparak.

**Kaharere ezytyk ahape: — Tyharape pokzitsinahaktsa kytsa! — niy.**

<sup>31</sup>Iwaze Sudas niparakze Sesus ispe niy:

— Utakta ikzumuta maku babata ahawata ikyzik. Abahi mohyrikosokda. Aba kazo piwatawyky “Ikia azikwyrënikita tu tsamypokzitsiukrëta tsamysapyrëta awa suknihabyyita” mykara. Kytsa sizubarëtsa kahyrikosokzawy humo Deus bo mosakibazikiknaha. “O Deus azikwyrënikita tu tsimypokzitsiukrëta. Tsamysapyrëta” mykaranaha. <sup>32</sup>Mytsasokoze “O Deus azikwyrënikita tu tsimypokzitsiukrëta tsimysapyrëta”. Deus kino niwatihi kasoho motsasoko “Katse zikwyrënikita tu tsimypokzitsiukrëta tsimysapyrëta”. Abahi iwa piwatawyky — niy.

<sup>33</sup>— O kahyrytsa watsa bykyhyze ahatuk zikurubyita tu. Abahi tsikpikberinahaze ba zik zikahanaha. Hana bo my ikahatsa kapik ba zik zikahanaha tsimaha. Iwa botu Sudeutsa bo iktsaso. Atsatu ahabo motsasoko — niy.

<sup>34</sup>Puëtsik pahahyrinymyryky — Nawa ahahumo kamypokzitsiarëta ikiahatsa niwathiktsa. Pahasapywyky ziknakara. Ikiahatsa niwathiktsa.

Utsa bo tsisapywykynaha tyharape pokzitsikinahaktsa! — niy.  
<sup>35</sup>— Tsinaharape pokzitsikinaha zeka kytsa tihi: “O Sesus tyryktsa”  
 mykaranaha — Sesus niy.

**Sesus Peduru nizukpeheze — O batu Sesus kanyhy tsimy — niy.**

<sup>36</sup>Iwaze Simaõ Peduru ipe niy:

— Hana bo sa ikia tsimykuru — niy.

— Aba hana bo my ikiakta ba kapik zikyкта. Ikiakta pyktohityкта  
 kapik tynao — niy.

<sup>37</sup>Peduru Sesus pe niyzo:

— Hawata sa uta batu apik my. Abaka ikia apik my. Hawa ikia apik  
 batu yhy tsimykara. Uta kino atuk tu apokzi mohyrikosokda — niy.

<sup>38</sup>— Paze! kapokzi tsimyhyrikosokda ja niy. Kaharere bo mytsatytyкта!  
 Kokuaro ipobyize harakykbyi “Batu Sesus kanyhy” mybarapetu tsimykara  
 — Sesus niy.

**Sesus humo hi Deus hyrytsa tsimoziknaha, atahi myske wata.**

**14** <sup>1</sup>Sesus tuk zinymyrykynahatsa pe niy.

— O mytsaty mytsaty byijataha. Ahasukatsihikbyihu ja  
 tynakaranaha! Ikiahatsa Deus humo ahaspirikporëtsa. Kahumo kino  
 niwatihi ahaspirikporëtsaktsa kytsa! <sup>2</sup>Wahoro zuba kazo baze my.  
 Ikiahatsa tsyhyryze wahoro tsizubarëna. Wahoro ahabyizeka ikiahatsa  
 bo ba ziktsaso. Abaka ahatsyhyryze pahawanusapy. Ba ahabyizeka  
 ahape ziky. <sup>3</sup>Aba piksi. Ahawanu sapy pikymy zeka ahabo myziksizo.  
 Pahaoktyhyryk. Iwaze katuk tsinapykyryknaha. Ahawahi katuk  
 tsinapykyryknaha. Katuk tu tsipahasapynaha. <sup>4</sup>Ske tsinybanaha. Hana bo  
 mokuru naha bo hi tsinymyrykynaha hy — niy.

<sup>5</sup>Tome:

— Hana bo sa tsimykara katsaktsa batu myhyrinymyry. Asapy  
 sa haneze katsaktsa batu myhyrinymyry. Iwatsahi hawa sa nabo  
 tsimykurunaha ana humo hi batu myhyrinymyry hy — niy.

<sup>6</sup>Sesus ispe niy:

— Uta hiba ahaske wata buruk kazo sapy bo pahaoktyhyryk. Utakta  
 Deus harere baba ty pahahyrinymyryky kahumo zuba meky watu  
 tsimoziknaha. Ahamysapyrëtsa kahumo tsimoziknaha. Ikiahatsa  
 kahumo zuba Deus bo tsipomonaha. <sup>7</sup>Abaka ikiahatsa botu tsiknynaha  
 hy iwatsahi kazo kino niwatihi tsinynaha. Hawa ikykara naha bo iktsa  
 tsikykaranaha zeka anawa hi kazo mykara ahahyrinymyrëtsa hy — Sesus  
 niy.

<sup>8</sup>Piripi Sesus pe niy:

— Azo ty mybo tsiwatawyкта! Azo bo iktsa tsimaha zeka mykurëtsa  
 tsimaha — niy.

<sup>9</sup>— O Piripi tubabatu ahatuk ziknapykyryk. Iwatatu sa batu katyny. Ahatuk tu ziknapykyrykta tu batu katyny niy. Aty pikny zeka ata kino niwatihi kazo ziny. Iwatahi amo humo sa tsimytsasoko. “Azo ty mybo tsiwatawykta! tsimy” — niy.

<sup>10</sup>— Uta kazo wata anatyhi yhỹ tsimaha katsa harapewatsa tu. Batu kaharere zuba ahawabyhy. Kazo harere kino ahabo motsasoko. Hawa kazo nitsasoko naha hi motsasoko. <sup>11</sup>Uta kazo wata. Harapewatsatu tsimaha. Kaharere bo tsikaeni zuba yhỹ tsimaha zeka iwaze kazikwy humo tsimyspirikpotohinaha — niy.

<sup>12</sup>— O wabyziutahaktsa kytsa. Katuktsa kahumo sispirikporëtsa kawa tu sisopyk. Uta kazo bo piksize izikwy piwatawy. Hawa kytsa bo kazikwy humo iwatawy katuktsa kino niwatihi kazikwy humo kytsa bo piwatawynaha. Kazo bo piksize iwatsahi katuktsa kazikwy tsizubarëna kytsa bo piwatawykynaha. <sup>13</sup>Kabo tsinapamykysokonaha zeka “Hawa ha ty tsimyzehikiknaha ana hi tsinazapykykynaha” tsimykaranaha. Iwaze hawa ha tsinazapykykynaha anatyhi ahabo nyny mynakara. Kytsa tihi: “O Deus amysapyrënikita” mykaranaha. Hawa ha ty tsikzapykykynaha ty ahabo nyny myze kytsa Deus soho “imysapyrënikita” — mykaranaha. <sup>14</sup>Ikiahatsa kabo tsimypamykysokonaha zeka:

— Hawa ha tsimyzehikiknaha ty zuba tsimykaranaha. Iwaze anahi tsimyzapykykynaha atsatu ahabo nyny mynakara. Tsizubarëna ty ahabo nyny mynakara — niy.

**Sesus tazo pe: — O kazo usta atsumuëhïtsa  
kawata katuktsa bo tyzipehahikta — niy.**

<sup>15</sup>Sesus tihi:

— Ikiahatsa kahumo ahamypokzitsi zeka kaharere bo hỹ tsinakaranaha — my. <sup>16</sup>Kazo pe my zeka:

— O kazo usta tsumuëhïtsa katuktsa bo myzipeha. Usta tsumuëhïtsa kawata tyzipehakta my. Iwaze ihyrikoso myzipeha. Pahahyrinymyry, tawahi ahatuk mynapykyryk. <sup>17</sup>Kytsa kahumo batu sispirikpo asahi iharere bo batu yhỹ zikaha. Iharere sihumo sihokdaharëna. Iharere humo ka batu sihyrinymyry. Ikiahatsaktsa tsahyrinymyrëtsa. Iharere kino ikiahatsa humo batu ihokzaha — niy.

<sup>18</sup>— Bakta kawahi paharekta ziwazy. Ahabo myziksizo. <sup>19</sup>Aba nurübabatu kytsa kahumo sispirikpobyitsa ba ziknyzonaha. Ikiahatsa iwatsa tu tsipiknyzonaha. Ikiahatsa niwatihi tsimynahyrikiziponaha. Iknahyrikiziponaha humo ahamysapyrëtsa tsimoziknaha. <sup>20</sup>Uta kazo harere bo hỹ mynakara. Ikiahatsa kaharere bo hỹ tsinakaranaha. Uta kino niwatihi ikiahatsa tuk yhỹ mykara. Iwa mysopyk tsimykaranaha. Bykyze ana hi tsipinymyrykynaha.

<sup>21</sup>Aty kaharere bo hỹ my zeka atahi kahumo tsimypokzitsiarëta mykara. Atahi kazo mozipokzitsiki. Uta niwatihi mozipokzitsiki. Kasoho humo pinymyryky. Kasoho humo tsihyrinymyryrëta mozik — niy.

<sup>22</sup> Sudas Tadeu tihi:

— Hawa skaraba mybo zuba asoho tsipiwatawyky Asaktsa ahumo sispirikpo ahabyizeka asoho batu tsipiwatawy. Hawa tsimy — niy. Iwa Sudas nitsaso. Atakta batu Sudas Iskariotses. Uta Sudas Tadeu inarokota.

<sup>23</sup> Sesus nitsasokozo:

— Asaktsa kahumo simypokzitsirëtsa kaharere bo hyÿ mykaranaha. Kazo sihumo tsimypokzitsiukrëta, iwatahi situk mynapykyryk. Kazo situk mynapykyryk. Uta niwatihi katsa situk mywahi tsinapykyryknaha.

<sup>24</sup> Sispirikpobyitsaktsa kaharere bo batu yhyÿ zikaha. Kaharere kazo botu nitsasoko ana kino tsipiwabynaha. Kazo zikpeha iharere hi motsasoko.

<sup>25</sup> Ikiahatsa tuk tihi motsasoko. <sup>26</sup> Kyze kazo hyrikoso ahabo pipehahik. Kaharere humo tahyrikoso ahabo myzipeha. Atahi ahatsumuëhïtsa mozik. Pahahyrinymyry. Uta ahahyrinymyryky ana humo hi batu ahaspiriktokdahu. Kaharere ty pahaspirikpoziuku. Deus hyrikoso tsimysapyrëta hyÿ.

<sup>27</sup> Kytsa kahumo batu sispirikpo paikpa mytsaty mykaranaha. Katuktsa batu sispirikpobyitsa watsa. Utakta batu paikpa mytsaty mykara. Iwatahi ikiahatsa kawata mytsaty mytsaty byitaha. Ahakurëtsa tsimaha. Kahumo ahapyby byihu ja. Kahumo ka ahasukatsihik byihuja. Kahumo tspirikpokonahaktsa iwatsahi tsahapunihikrëtsa tsimoziknaha — niy.

<sup>28</sup> Botu tsiwabykynaha:

— Utakta piksi. Bykyze myziksizoze ahatuk mynapykyryk. Anahi motsasokoze tsiwabykynaha. Uta kazo bo. Kaharere bo ma tahaktsa. Kazokta abazubata my. Iwatsahi ahakurëtsa tsimahaktsa kytsa! Kazo humo ahamypokzitsirëtsa. Tspikpokzitsikinaha zeka ahakurëtsa tsimoziknaha. <sup>29</sup> Aba motsasoko kyze piksi.

“Piksi zeka kahumo ahaspirikporëtsa” — mytsaty mykara. — Aba piksi hawa ahabo iktsasoko, ana humo hi ahaspirikporëtsa.

<sup>30</sup> Aba Satanas harere humo kytsa kahumo batu sispirikpo ispehatsa atahi kabo mozumu. Iwatahi ahabo tsikaeni zuba motsaso. Atahi batu kakzotsabyita. Iharere bo yhyÿhabyita ziknakara — niy.

<sup>31</sup> — Uta kazo harere bo zuba hyÿ mynakara. Kazo humo kamypokzitsiarëta mykara. Iwatahi iharere bo zuba hyÿ mykara. Kytsa kahumo batu sispirikpo asa bo hi piwatawyky. Utakta Deus harere bo zuba hyÿ mynakara anabo hi mysiwatawyky — niy.

— Kyikyitahaktsa. Tupaktsa kytsa! — niy.

### Sesus hi duabohotsa sa wata.

**15** <sup>1</sup> Kyze Sesus:

— Uta hi duaboho taypykze mytahara tawata my. Kazo waratok tsihitsa wata my. Waratok eze duabohozatsa nisiparikik.

<sup>2</sup> Katukytsa duabohotsa sakatsa watsa maha. Asahi kazo harere bo batu zikahabyitsa sisakatsa watsa, asaktsa ziktaharanaha ahabyizeka

tahasazykykwynaha. Utsaktsa siharahoktsa tsihitsu duaboho taypykze sisupesapy mysisakakare zeka iwatsahi nataharasukbabyinaha. Iwa kazo tihi mykara. Katuktsa iharere bo batu yhỹ mysisakakareke tawata. Kazo katuktsa situk mynapamykysoko iwatsahi simysapybyitsa nikaranaha pimoewynaha iwa mysitsumuēhīkī. Hawa sibo mykara wasani my ana humo hi simysapyrētsa tohi mykaranaha hỹ.

<sup>3</sup>Kazo ahamysapybyitsa tsikykaranaha botu zahaokzohik. Kaharere bo hỹ tsimykaranaha zeka ahamysapybara ty botu zahaokzohik.

<sup>4</sup>Kaharere bo hỹ tynakaranahaktsa kytsa! Kaharere bo hỹ tsimaha zeka uta ahatur mynapykyryk. Atsa botu mytsaty tsimykaranaha. Mykurētsa tsimoziknaha. Duabohotsa sa ypyk ahabyizeka ba ziktaharanaha. Ikiyahatsa niwatihi. Kaharere bo yhỹ ahabyi zeka kazo tuk kino niwatihi batu yhỹ tsimaha. Hawa kazo mozhikik batu ahahyrinomyry — Sesus niy.

<sup>5</sup>— Uta duabohotsa sa taypyknahaze mytaharanahaze tawata. Ikiyahatsa duabohotsa sa watsa tsimaha. Kaharere bo hỹ tsimaha zeka Deus okzeka ahamysapyrētsa tsimaha. Uta kino niwatihi ahatur yhỹ mykara. Katsa mykurētsa hi. Ikiyahatsa kaharere bo batu yhỹ ahabyizeka hawa tsimaha Deus okzeka batu ahamysapy. Hawa tsimaha Deus okzeka mahani tsimaha — niy.



(Suão 15.3)

<sup>6</sup>— Asaktsa kaharere bo yhỹ ahabyi zeka siparahatsa watsa. Waratok tsihitsu siharabyitsa nisizykyk izo bo nisiwezohik. Mynaparanahaze izo bo piwezona. Ikiyahatsa niwatihi katuk tsimynapykyryknaha ahabyizeka ahakubyitsa tsimaha — niy.

<sup>7</sup>Iwatsahi kaharere bo hỹ tynakaranahaktsa katuk tsimykaranaha, katuk tsinapykyryknaha zeka amy ty Deus bo tsinazapykyknaha atsatu ahabo nyny my. <sup>8</sup>Ikiyahatsa kazo harere bo hỹ tsimykaranaha zeka kytsa kazo pe maha:

— O ikia tsamysapyrēta — mykaranaha. Iharere humo hỹ tsimykaranaha zeka kytsa ahasoho motsasokonaha:

— O asahi Sesus tuktsa maha — mykaranaha.

<sup>9</sup>— Uta ikiyahatsa humo kamypokzitsiarēta. Kazo wata atahi kahumo tsimypokzitsiukrēta my. Ahakuhuktsa kytsa! Sesus myhumo

tsimypokzitsiukrêta. Iwatsahi ahakurêtsa. <sup>10</sup>Kazo harere bo hyÿ mynakara. Iwatahi kazo kahumo tsimypokzitsiukrêta. Iwaha bo hi mytsaty mykara zeka kakurêta hi. Ikiyahatsa kino niwatihi kaharere bo hyÿ tsimykaranaha zeka ahakurêtsa tsimoziknaha. Sesus katsa myhumo tsimypokzitsiukrêta. Iwaha bo hi mytsaty tsimykaranaha zeka ahakurêtsa tsimoziknaha — niy.

<sup>11</sup>— Iwa motsasoko iwaze kahumo ahakurêtsa tsimoziknaha. Uta kakurêta hÿ. Ikiyahatsa tsikaeni zuba ahaku zeka batu myzehikik. Ikiyahatsa ahakurêtsa babatsa tsimoziknaha zeka iwa hi myzehikik. Kawatsa tsimaha. Kakurêta hi — Sesus niy.

<sup>12</sup>Ahape mykara:

— Tynaharape pokzitsikinaha! Ahakyri byihuja. Uta pahapokzitsiki ikiahatsa kawa tih tynakaranahaktsa. <sup>13</sup>Aty tatuktsa pokzi mohyrikosokda zeka kytsa mykaranaha:

“O atakta itukta humo tsimypokzitsiarêta”. Myhyrikosokdaze iwa itukta humo tsimypokzitsiukrêta hiba — nikaranaha.

<sup>14</sup>— Ikiyahatsa kaharere bo hyÿ tsimykaranaha zeka ikiahatsa katuktsa babatsa — my. <sup>15</sup>Ahasoho ty batu tyso — O asahi katsumuêhÿtsitsa mykaranaha. Hawa tsihÿtsa mykara tatsumuêhÿtsitsa bo batu tyso. Ahahumo meky watu kasopyk. Ikiyahatsa kaharereziuwÿtsa tsimoziknaha. Nawa kazo kabo nitsasoko atsatu ahabo motsasoko. Iharere ahabo botu iktsasoba.

<sup>16</sup>Ikiyahatsa humo ka batu kawatawyhy “O katsaktsa atuktsa tsimoziknaha” tsikaha. — Iwa batu tyso. Uta hi ahawatawyhik.

— Asahi katuktsa moziknaha — iky. Iwa motsasoko.

— Utsa bo pahapehahik iwatsahi kahumo sispirikporêtsa ahaharere humo. Asahi kahumo sispirikporêtsa hi. Amy ty Deus kazo bo tsinazapykykynaha zeka kaharere humo iwatsa tu ahabo nyny my.

<sup>17</sup>Ahatuk napykyknahaze tynaharape pokzitsikinaha — iwa mykarazo.

### **Kytsa Sesus humo sispirikpobyitsa hi iwatsahi Sesus tuktsa nasisukyrykynaha.**

<sup>18</sup>Sesus nipamykysokozo:

— Kytsa kaharere bo yÿ ahabyi zeka asahi kahumo tahakyrikinaha iwatsahi ahabo kino niwatihi batu siakparawy. Pahamyijakanaha. Pahasukyrykynaha. Taparaka batu kahumo siakparawy ana bo hi mytsatyziutahaktsa kytsa — niy. <sup>19</sup>Ikiyahatsa mekywatsa tu tsimoziknaha. Asahi Deus humo batu siakparawy siwatsa batu tsimykaranaha. Uta hiba ahawatawyhik katyryktsa tsimoziknaha iwatsahi kytsa ahahumo batu simypokzitsiu. Iwatsahi tahakyrikinaha. Pahamyijakanaha. Pahasukyrykynaha. Ikiyahatsa siwatsa tsimyzurukunaha zeka ahahumo siakparawy.

<sup>20</sup>Kaharere bo wabyziutaha! Ahatuk tu ka tysosobyijataha:

— O kapehatsa zisukyrykynaha. Katsaktsa batu. Batu myty myija  
— mytsaty ahabyitsa tsimykarana. — Kytsa kahumo batu sispirikpo  
zikapikiknaha. Iwatsahi aha humo kino niwatihi pahapikiknaha.  
Kaharere bo ma ahabyitsa ziknakarana ahaharere bo niwatihi batu ma  
zikaha — niy.

<sup>21</sup>— Kapokzi ikiahatsa sinini tsimykarana. Kytsa kaharere bo yhy  
ahabyizeka pahasukyrykynaha. Deus zipehata humo batu sispirikpo  
iwatsahi pahasukyrykynaha. <sup>22</sup>Uta sibo zuk ahabyi zeka Deus okzeka  
wasani mykarana tsawatsa. Deus harere ty sibo tyso ahabyizeka Deus  
okzeka wasani mykarana tsawatsa. Uta ikzumutawy. Kaharere bo  
batu yhy mykarana iwatsahi Deus okzeka batu simysapy mykarana  
— niy.

<sup>23</sup>— Kytsa kahumo batu siakparawy. Kahumo tahakyrikinaha kazo  
humo kino niwatihi tahakyrikinaha. Asahi ihumo tahakyrikinaha iwatsahi  
batu siakparawy. <sup>24</sup>Kazikwy tsizubarēna bo iwatawyky. Utsa zikwy  
tsikaeni zuba. Utakta kazikwy tsizubarēna. Batu aty tohi zikwykyta.  
Kazikwy ty tyny ahabyizeka wasani mykarana. Kazikwy zynynaha.  
Zynynahatsa tu kahumo batu sispirikpo. Iwatsahi Deus okzeka batu  
simysapy mykarana. Batu wasani mykarana kazo batu siakparawy.  
Uta kahumo kino niwatihi batu siakparawy mykarana — niy.

<sup>25</sup>Deus papeu humo sisoho botu ziwatahaka:

— Batu isty myi. Batu aty tohi humo ykyrisukni. Iwatsa tu kahumo  
ziknatakyrikinaha — niy.

<sup>26</sup>Kazo bo piksizoze ipe my:

— O kazo ahyrikoso tsipehahikta. Katuktsa bo tsipeha — my.

— Iwaze ikiahatsa bo pipeha. Atahi pahatsumuēhikī. Hawa wasani  
atsatu pahahyrinymyryky. Kasoho ty pahahyrinymyryky. <sup>27</sup>Ikiahatsa  
kino niwatihi. Kasoho humo kytsa tsihyrinymyrykynaha. Ikiahatsa  
katuk tapara tu tsikapykyryknaha. Iwatsahi kasoho humo kytsa ty  
tsihyrinymyrykynaha — niy.

**16** <sup>1</sup>Sesus:

— Kyze iwa ababo tsizubarēna iksasoko. Bykyze kytsa ahape  
mykarana:

“O Sesus harere bo batu yhy tsimaha! Ihumo niwazuba tsimahaktsa!”  
mykarana. Iwaze kaharere bo mytsaty tykaranahaktsa. Iwatahi  
tsizubarēna ababo motsasoko. <sup>2</sup>Kytsa ahahumo tahakyrikinaha. Asahi  
ahape: “Sudeutsa wahoro bo ba zikpupuzonaha” mykarana. Pahaba  
tsihikiknaha. Pahabanahaze iwa mytsaty mykarana. “O Deus okzeka  
wasani tsimykarana” mybarapetu mykarana.

<sup>3</sup>Zahasukyrykynahaze kazo humo batu sispirikpo. Kahumo niwatihi batu  
sispirikpo iwatsahi pahasukyrykynaha. <sup>4</sup>Iwatahi ababo motsaso. Aibani

kaharere bo mytsaty tsimykarana. Pahasukyrykynaha zeka ahatuk zuba tsimypamykysokonaha “O tapara mypehatsa iksibyize mybo botu nitsaso. Kytsa mymysukyrykynaha anahi botu nitsaso tsimaha” — niy.

### Deus hyrikoso pahatsumuẽhĩ.

<sup>5</sup>Sesus nitsasokoze:

— Abaka zikpehata bo piksizo. Batu aty tohi kape ziky hana bo sa tsimy. Iwa batu tyso. <sup>6</sup>Piksizo zeka ana humo hi ahasukatsihikrẽtsa. Iwa motsasoko ahasukatsihikrẽtsa. <sup>7</sup>Hawa tisapyrẽna motsasoko. Erete ahabyizeka Deus hyrikoso ba ziknasik. Ahatsumuẽhĩtsa ba zikzumu. Piksi zeka ahabo myzipeha. Iwatsahi ahakurẽtsakta kytsa. Kazo bo piksizo ana humo hi ahakurẽtsa tsimoziknaha — niy. Atsatu tsinakaranaha. Iwatahi taparaka ahape ziknakara.

<sup>8</sup>Myzumuze kytsa kaharere humo batu sispirikpo atahi ispe my:

— Kytsa kahumo batu sispirikpo Deus okze batu simysapy mykarana. Deus zuba kytsa humo nasisapywyky. Ihumo zuba simysapyrẽtsa moziknaha. Kytsa simysopyksapybyitsa nikaranaha humo pisininiwyky iwa Deus hyrikoso mynasikze motsaso.

<sup>9</sup>Kytsa kahumo batu sispirikpo iwatsahi Deus okze batu simysapy mykarana ziknaharapesapybyrikinaha. Kahumo batu sispirikpo iwatsahi simysapybyitsa mykarana. Kaharere bo batu yhỹ zikaha iwatsahi ziknaharape sapybyrikinaha batu simysapy mykarana.

<sup>10</sup>Kazo bo piksizoze ba ziknywyzo. Jobo kazo bo myzo ba ziknywyzo. Deus hyrikoso kytsa pe: “Sesus tisopyksapyrẽta wasani isopyk” — mykara. <sup>11</sup>Deus botu nitsaso. Taparakta kytsa Sesus harere bo batu yhỹ niy Satanas inarokota sininiwy mykara. Iwatahi Deus hyrikoso kytsa pe simysapybyitsa nikaranaha asahi Deus mysisininiwyky.

<sup>12</sup>Ahabo motsaso tsihikik tsizubarẽna my. Abaka ba ziktsasozo. Ahasukatsihikrẽtsa iwatahi ahabo ba ziktsaso.

<sup>13</sup>Hawa wasani Deus hyrikoso pahahyrinymyryky. Myzumuze hawa wasani motsasoko. Taharere ka ba ziktsaso. Tapara botu ziwaby ana kino ahabo motsasoko. Hawa aiba tohi mykara ana humo kino pahahyrinymyryky. <sup>14</sup>Pahahyrinymyryze Sesus tisopyksapyrẽta wasani mykara iwa kytsa ihumo motsasokonaha. Wasaniha ty zuba ahabo motsasoko.

<sup>15</sup>Kazo mykara naha ty uta kino niwatihi mynakara. — Deus hyrikoso harere ahabo motsasoko — niy.

**Ahasukatsihikrẽtsa tsimoziknaha. Bykyze ahakurẽtsa tsimozikzonaha.**

<sup>16</sup>Sesus nitsasokoze:

— Abanurybabatu piksi, kabo ba ziknynaha. Aiba zuba kabo tsipiknyzonaha — Sesus niy.

<sup>17</sup>Zinymyrykynahatsa asa zuba nikaranaha:

— Hawa skaraba mykara. “Abanurybabatu piksi. Kyze kabo ba ziknynaha. Utakta kazo bo my niy.” Hawaha skaraba mybo nitsasoko. Iharere tsihokdaharēna. <sup>18</sup>Amy humo “aiba zuba tsipiknyzonaha”. Iharere myhumo tsihokdaharēna — nikaranaha.

<sup>19</sup>Sesus amo zinymyrykynahatsa mytsaty nikaranaha ana humo kino tsihyrinymyrēta. Iwaze ispe niy:

— Ahabo motsasokoze “abanurybabatu piksi. Kabo ba ziknyzonaha. Aiba zuba kabo tsipiknyzonaha hỹ”. Ana hi ja tsimytsasokonaha — niy. <sup>20</sup>Ikiahatsa bo motsasoziuku:

— Mohyrikosokdaze tsimopuziukunaha. Kytsa kahumo batu sispihik asahi batu sisukatsihik ikiahatsa zuba ahasukatsihikrētsa tsmoziknaha. Iwaze puētsik zuba ikiahatsa tsmysukatsihikbyrinaha. Tsahakurētsa tsmoziknaha.

<sup>21</sup>Wytyk ibykyhy natapyrize tisukatsihikrētatsa. Itsapyri humo tisukatsihikrētatsa. Ibykyhy mopurukze myitsapyripykze tsakurētatsa. Iwatatsahi tabykyhy humo tsakurētatsa iwatatsahi itsapyri humo nispiriktsokda. <sup>22</sup>Ikiahatsa atatsa watsa tsmaha. Abaka ahasukatsihikrētsa. Utakta piksiki ana humo hi ahasukatsihikrētsa. Aiba ababo myzumuze, ahakurētsa tsmozikzonaha. Batu aty tohi isukatsihik. Ahawahi ahakurētsa tsmoziknaha.

<sup>23</sup>Deus hyrikoso mozumuze pahahyrinymyryky. Iwatsahi kabo batu tyso “katsa mymyhyrinymyry”. Kaharere ba zikokza my. Deus hyrikoso kaharere pahahyrinymyry. Wabyziutaha! Amy ty Deus bo tsimyzapykykynaha zeka kaharere humo, ana ty hi ababo nyny my. Deus bo tsimyzapykykynaha zeka kaharere humo wasani my ana humo hi ababo nyny my.

<sup>24</sup>Deus bo batu tysapykyk kaharere humo yhỹ tsmaha my. Tyzapykynahaktsa! Hawa ha ty Deus myzehikik ana hi tsimyzapykykynahaze ana ty hi ababo nyny my. Kazo ababo nyny my zeka ahakurētsa tsmoziknaha. Ahakurētsa hỹ.

**Sesus Satanas zikwy zipyk iwatsahi tsikahapunihiknahaktsa kytsa!.**

<sup>25</sup>— Taparaka kaharere tsihokdaharēna. Iktsasokoze kaharere tsihokdaharēna. Kaharere iokpitsihĩ hawa ziknaukuru. Aibani zuba kazo harere ababo motsasoze, mahani ihokdaha. Kazo harere motsasokoze batu ihokdaha. <sup>26</sup>Mytsasokoze iokpitsihibara wa mozik. Kazo bo hawa kaharere bo yhỹ my ana hi tsimyzapykykynaha. Utakta kazo bo batu ahatsyhyryze ba zikzapyky ikiahatsa tu kazo bo tsimyzapykykynaha hỹ.

<sup>27</sup>Ikiahatsa hi tsimyzapykykynaha. Kazo ahaharere piwaby hỹ. Ikiahatsa humo tsimypokzitsiukrēta iwatahi pahawaby. Ikiahatsa kahumo ahamypokzitsirētsa iwatahi kazo ahahumo tsimypokzitsiukrēta my.

Tsimytsasokonaha zeka “O Deus Sesus tsikzipeha tisapyrãna” tsimaha. Iwatahi ahahumo tsimypokzitsiukrãta.

<sup>28</sup>Kazo ikny ikzumu. Mybarawy bo iknasik. Mybarawy ezeiksa bo ikzumu. Mohyrikosokdaze kazo bo piksizo — niy.

<sup>29</sup>Zinymyrykynahatsa ipe niaha:

— Abaka tsiwabyziukunaha. Aharere mahani ihokdaha. Abaka ipitsĩhibara ty tsimytsasoko. <sup>30</sup>Ikiahi tsihyrinymyrãta. Tsiubarãna humo tsahyrinymyrãta hỹ. Amy bo mytsaty tsimykarannahaze anahumo hi tsahyrinymyrãta. Iwatsahi “Hawa tsimykara” batu tyso, amy ty tsinymyrykynaha ana hi mybo tsimytsasoko. Iwatsahi “Deus zipehata babata tsimy” — tsimytsasokonaha.

<sup>31</sup>— Abaka ja kahumo ahaspirikporãta — Sesus niy.

<sup>32</sup>— Aba nanabyitaba tsimopaparahanaha. Kasukyrytsitsa pokso paikpa mytsaty tsimykarannaha. Ahapybyrãta. Kytsa pahabezenaha pokso iwatsahi tsimywakbaiknaha. Ahapybyrãta hỹ. Uta zuba motare. Tsiplikarekbanaha zeka uta zuba motare. Iwaze kazo zuba katuk. Kazo zuba ba zikare — niy.

<sup>33</sup>— Iwa motsasoko iwatsahi mytsaty mytsaty byitahaktsa kytsa kahumo ahaspirikporãta. Kytsa kahumo batu sispirikpo asahi pahasukyrykynaha. Utakta sispirikpobyitsa pehatsa zikwy pepykbaik. Iwatsahi ahapunihikrãta tsmoziknaha — Sesus niy.

### Sesus tazo bo nipamykysoko.

**17** <sup>1</sup>Kyze Sesus bijoikpe bo iktsa niy, tazo bo nipamykysoko: — O kazo utakta atse babata my. Nawa ty botu tsiktsasoko kasoho ana hi myzubaha bo iky uta kamysapyrãnikita kapunihikrãnikita tsiky ana hi tsiwatawyky. Uta kino niwatihi my. Myzubaha bo iky “O Deus kazo imysapyrãnikita ipunihikrãnikita iwa iksiwatawy”.

<sup>2</sup>— O Deus azikwy ty botu kabo nyny tsiky iwatsahi kytsa kahumo sispirikporãta. Iwatsahi kytsa meky watu moziknaha. Kahumo simysapyrãta moziknaha. <sup>3</sup>Ikia zuba Deus babata. Utakta atse babata. Ikia tsikpeha. Mybarawy bo tsikpeha. Utakta Sesus Kiristu, mybarawy bo iknasik. Kytsa kaharere bo hỹ mahaze simysapyrãta moziknaha. Kytsa ahumo mospirikponahaze simysapyrãta moziknaha. Myhumo sispirikporãta. Myhumo simysapyrãta moziknaha.

<sup>4</sup>Ikia aharere botu kabo tsiktsaso, ana kino myzubaha bo iktsasoko. “Deus imysapyrãnikita ipunihikrãnikita” ana kino myzubaha bo iktsasoko. Abaka kahyrikzitsokzawy nepykba.

<sup>5</sup>— O kazo tapara ikia tukze bijoikpe iknyktsa atsumuẽhĩtsitsa kasoho ziknatsasokonaha:

“O Sesus imysapyrãnikita ipunihikrãnikita” ziknakaranaha. Tapara ikia bijoikpe mybarawy aha tsikzukni bijoikpe iknyktsitsa atsumuẽhĩtsitsa

kasoho humo. “O atakta imysapyrēnikita” ziknakaranaha. Abaka abo piksizoze iwa motsasozonaha hỹ — niy.

<sup>6</sup>Iwaze zinymyrynahatsa tsyhyryze tazo bo nipamykysoko:

— O kazo ikia wastuhu kytsa tsiksiakzoko. Asahi atyryktsa niyzikiknaha. Ikia kytsa tsiksiakzohikze iwaze ikia humo katyryktsa niyzikiknaha. Azikwy sibo iwatawyky. Aharere bo hỹ mykaranaha. <sup>7</sup>Sihyrinymyryrētsa mykaranaha. Hawa ha iktsasoko aharere zuba my, ana humo kino sihyrinymyryrētsa mykaranaha. <sup>8</sup>Hawa ha ty botu kabo tsiktsasoko kytsa kahumo sispirikporētsa atsatu iktsasoko. Aharere humo wasani mykaranaha. Ikia tsikpeha ana hi zinymyrykynaha. Ikia tsikpeha ana humo hi wasape mykaranaha.

<sup>9</sup>— O kazo kakzohotsa tsyhyryze abo mopamykysoko. Utsa kytsa kahumo batu sispirikpo batu tyso. Asahi katyryktsabyitsa tu. Kakzohotsa iksihyrinymyryky sitsyhyryze zuba abo mopamykysoko.

<sup>10</sup>Kytsa kahumo sispirikporētsa atyryktsa moziknaha. Iwatsahi katyryktsa kino niwatihi moziknaha. Mytyryktsa moziknaha — Sesus niy.

— Kaharere humo simysapyrētsa niyziknaha. Iwatsahi ustsá kytsa kahumo sispirikpobyitsa pe maha: “O atakta imysapyrēnikita ipunihkrēnikita my ityryktsa simysapyrētsa humo maha” mykaranaha. Iwa motsasokonaha.

<sup>11</sup>— O kazo ikia zuba wasani tsinakara. Azikwy ty botu kabo nyny tsiky. Iwatahi azikwy hi kazikwy mozik. Abaka abo piksizo. Mybarawy eze ka ba mynapykyryk. Ikia bozo my. Katuktsa mybarawy eze mynapykyryknaha tysipokzitsiki. O kazo tysipokzitsikikta. Uta atukze atsabotu mytsaty tsimykaranaha abaka asa kino niwatihi atsa botu mytsaty mykaranaha kazo — my.

<sup>12</sup>— Uta situk ziknakaraze kytsa kaharere bo hỹ ziknakaranaha. Uta ziknasipokzitsiki iwatsahi kahumo sispirikporētsa. Myzubaha abo mysioktyhyryk. Estuba zuba katuk ba zioqty atakta batu isopyksapy. Atakta batu imysapy nikara iwatahi ba zioqty. Botu apapeu humo ziwatahaka niy. Nawa batu isopyksapy nikara, botu papeu humo ziwatahaka atsatu nikara.

<sup>13</sup>Abatu abo piksizo. Zinymyrykynahatsa situk abo mynapamykysoko. Kaharere humo sakurētsa moziknaha. Uta kakurēta asa kino niwatihi kawatsa sakurētsa moziknaha. Sakurētsa babatsa mysitsihikik!

<sup>14</sup>Aharere botu sibo iktsasoko. Kasopyk humo sispirikpobyitsa meky watu sisopyk. Katuktsa niwatihi. Asahi sispirikpobyitsa sopyk humo meky watu mykaranaha. Iwatsahi sispirikpobyitsa katuktsa humo tahakyrikinaha. Mekywatsa humo sispirikpobyitsa tahakyrikinaha.

<sup>15</sup>— O kazo “katuktsa mybarawy ekze ka ba ziksiokty” Katuktsa mybarawy eze ktsa humo tysipokzitsikikta kazo! Hyrikoso sapybara

pehatsa Satanas inarokota katuktsa ipokso sipybyrëtsa iwatahi tysipokzitsikikta, katuktsa ikia hi tysipokzitsiki.

<sup>16</sup>Kasopyk humo ka batu sispirikpobyitsa watsa. Katuktsa kino niwatihi. Nawa katuktsa sopyk humo batu sispirikpobyitsa watsa maha. Meky watu mykaranaha. Kahumo simysapyrëtsa moziknaha. <sup>17</sup>Aharerebaba wasani my. Aharere tisapyrëna. Aharere piwabykynahaze ahumo hyÿ mykaranaha. Iki harere bo zuba hyÿ mykaranaha.

<sup>18</sup>Iki tsikpeha mybarawy ezektsa bo tsiky. Tsikzipkehaze mybarawy ezektsa iksihyrinymyryky iwatahi zikpeha. Uta kino niwatihi, katuktsa zinymyrykynahatsa mysipeha. Utsa bo mysipeha. Iwaze mysihyrinymyrynaha. Aharere baba myzubaha bo mysihyrinymyrynaha iwatahi mysipehaka.

<sup>19</sup>Abaka katuktsa sapyzky mohyrikosokda. Kytsa pikbezenaha zeka yÿ my. Katuktsa pokzi yÿ my. Mohyrikosokdaze abo hyÿ maha niwatihi. Mohyrikosokda humo katuktsa kino niwatihi aharere bo hyÿ mykaranaha.

<sup>20</sup>Zinymyrykynahatsa soho abo motsasoko. Abaka usts kytza zinymyrykynahatsa harere piwabykynahaze kahumo sispirikporëtsa, sitsyhyryze abo niwatihi mopamykysoko.

<sup>21</sup>O kazo tsimysitumuëhize sakurëtsa moziknaha mytsaty mytsaty byijataha iwatsahi atsa botu mytsaty mykaranaha. Mywatsa sisopyk. Mywatsa sisopyk zeka sispirikpobyitsa tihi:

— Deus Sesus zipeha — mykaranaha. <sup>22</sup>Kazo tapara azikwy ty kabo nyny tsiky. Iki wata uta kino kazikwy katuktsa bo nyny iky. Asahi kahumo sispirikporëtsa iwaze kazikwy ty sibo nyny iky. Iwaze mywatsa moziknaha, asa zuba sakurëtsa mykaranaha mywatsa kazo.

<sup>23</sup>Utakta situk yÿ my. Iki katuk yÿ tsimy. Iwatsahi sisopyk mywatsa mykaranaha. Mywatsa sisopyk zeka sispirikpobyitsa pe maha:

— Deus kino Sesus zipeha — mykaranaha. Hawa Deus Sesus humo tsimypokzitsiarëta. Deus Sesus tuktsa kino niwatihi tsimypokzitsiarëta iwa motsasokonaha. Mywatsa sisopyk zeka iwa motsasokonaha.

<sup>24</sup>O kazo ikia nanabyri izuknihybyize ikia zikzipokzitsiki. Tapara mybarawy nizukni kape tsiky:

— Kazikwy ty abo nyny my — tsiky. Abaka zinymyrykynahatsa kaharere piwabykynaha:

— Kazikwy ty abo nyny my — tsimy. Iwa piwabykynaha mytukze mynapykyryknaha.

<sup>25</sup>O kazo ikia zuba wasani tsimykara. Tisopyksapyrëta amysapyrënikita iwatahi kamysapyrënikita tsimy. Kytsa sispirikpobyitsa tu ikia humo batu sihyrinymyry. Uta zuba any, zinymyrykynahatsa kasoho humo sihyrinymyrëtsa. Iki tsikpehahik tahi kahumo sihyrinymyrëtsa. <sup>26</sup>Botu sibo iktsasoko:

— Kazo ikia kahumo tsikpokzitsiki nawa tihi asa bo kino niwatihi tsimy. Asa zuba simypokzitsirêtsa tyharape pokzitsikinaha. Iwa sisopyk. Katsa mywata ahasopyk uta situk kasopyk mytsaty mytsaty byijataha atsa botu mytsaty mykaranaha — Sesus niy.

Iwa Sesus nipamykysoko tsizubarêna tazo tuk zinymyrykynahatsa tsyhyryze nikara. Iwa.

### Sesus tahurukwy.

**18** <sup>1</sup>Kyze Sesus tazo bo nipamykysobaze niparak. Zinymyrykynahatsa tuk itsipa tsibik Kederõ inarokota zitsikzakanaha. Ana hwitsa sazik ziparikiknaha ana bo zumukunaha. <sup>2</sup>Ana hi zinymyrykynahatsa zinyaha. Ana bo hi Sesus zinymyrykynahatsa tuk pororo ziknakara. Sudas kino ziny. Isopyksapybyita isukyrytsitsa mysioktyhyryk.

<sup>3</sup>Atakta Sesus bo niy. Kederõ tisaziksapyrêna ibo niy. Sodadutsa, Deus wahoro perytsitsa kino niwatihi Sudas nisioktyhyryk. Taparakta Deus wahoro eze ziknapamykysokonahatsitsa, Pariseutsa niwatihi sodadutsa Sesus bo nisipehakanaha. Sudas isopyksapybyita iwatahi sodadutsa Deus wahoro perytsitsa kino niwatihi ibo nisioktyhyryk. Sodadutsa tahatanoratsa tahabototsa iwa inasibykyknaha. Rika izo tupyrii humo hopok nikaranaha niwatihi zibykyknaha. Sesus bo sizubarêtsa izumukunaha.

<sup>4</sup>Sesus hawa mykaranaha botu tsihyrinymyrêta. Iwatahi kytsa nisihobykze ispe niy:

— Aty sa tsipiberikinaha — niy.

<sup>5</sup>— Sesus tsipiberikinaha. Nasare ezekta — nikaranaha.

— Uta hiba Sesus — niy. Sudas imyspihikbatanikita sisukyrytsitsa tuk niriktohoko. <sup>6</sup>Nitsasokoze — Uta hiba Sesus — niyze sodadutsa. Iharere ziwabynahaze wytyk bo natsubaiknaha. <sup>7</sup>Iwaze Sesus ispezo niy.

— Aty sa tsipiberikinaha — niy.

— Sesus Nasare ezekta — niaha.

<sup>8</sup>— Batu kawabyhy botu iktsaso uta hiba Sesus — niy. — Tspikberi tsihikiknaha zeka katuktsa ty ka paik paik byitaha iwaze piksinaha — niy.

<sup>9</sup>Iwa nitsasoko. Nawa botu nitsaso tazo bo:

— Uta iksipokzitsiki asahi kahumo sispirikporêtsa — niy.

Iharere wasani atsatu nikara. Iwaze kytsa Sudas tuktsa tihi — O zinymyrykynahatsa ty ka paik paik byitaha — niaha.

<sup>10</sup>Iwaze Simaõ Peduru tasakorotsapu tsizezerêta zibokik.

Ziknapamykysokota Deus wahoro zubata tsumuêhîtsa zispizykik. Ispipyryburuk niy. Marakos inarokota. <sup>11</sup>Iwaze Sesus Peduru pe niy:

— Asokorotsapu ty ipesuk bo koroktykta! — niy.

— Niwazubakta katy pokzitsi pokzitsi byity. Uta sinini mynakara. Tubabatu Deus papeu humo ziwatahaka iwa sinini mynakara. Iwa Deus kazo botu nitsaso iwa sinini mynakara — niy.

**Sesus Anas bo zioқтыhyryknaha.**

<sup>12</sup>Iwaze kytsa Sudas tuktsa Sesus tsipa humo zioқтыhyryknaha. Sodadutsa pehatsaktsa Deus wahoro zubata perytsitsa sizubarêtsa iwatsa itsipa humo zioқтыhyryknaha. Zipawarakanaha. <sup>13</sup>Niahatsahi Anas taparakta bo zioқтыhyryknaha. Anas Kajapas tsere niy. Kajapas Deus wahoro zubata eze ziknapamykysokonahatsa taparakta my. <sup>14</sup>Atakta botu nitsaso Sudeutsa pe niy.

— Estuba zuba tsipibezenaha zeka wasani maha. Iwatsahi mytyryktsa ba zik mymybanaha estuba zubata tsipibezenaha zeka wasani my — niy.

**Peduru Sesus soho: — Batu kanyhy — mybarapetu nikara.**

<sup>15</sup>Kyze Simaõ Peduru Sesus hapik niukuru. Usta zinymyrykyta Peduru tuk Sesus hapik niukurunaha. Taparakta ziknapamykysokota ziny. Atahi iwahoro pe zumu Sesus hapik wahoro isturupeze zumu. <sup>16</sup>Peduru batu paku ape baze tu hokbowy baze niriktohoko. Iwaze usta izoizo. Wytyk hokbowy perytsata pe niy:

— Katukta tynatsukta! tsimy — niy.

Yhỹ niy.

— Anaetze paku tsimy — perytsata Peduru pe niy. Iwaze nitsuk.

<sup>17</sup>Inatsukze atatsa ipe niy:

— O ikia sa niwatihi Sesus tukta — niy.

— Batu kanyhy — mybarapetu niy.

<sup>18</sup>Tsiwarikrêna. Kytsa sodadutsa tsumuêhĩtsitsa niwatihi izo zipokoknaha. Kytsa izo baze niakpyzazakaranaha. Peduru situk niriktohoko niakpyzazaka.

**Sesus taparakta ziknapamykysokonahatsa bo zioқтыhyryknaha.**

<sup>19-21</sup>Iwaze taparakta ziknapamykysokonahatsa Sesus bo nipamykysoko:

— Hawa sa zinymyrykynahatsa mykaranaha Hawa ha ty sa tsiksihyrinymyryky — niy. Sesus:

— Amy humo sa kaspirikpowy soho tsimy kara Zikwabykynahatsa sihyrinymyrêtsa. Uta iksihyrinymyryky iwatsahi ispetaha. Iktsasokoze aparakbaha kaharere ziwabykynaha, anatyhi iksihyrinymyryky. Batu okpitsĩ. Sudeutsa wahoro eze ziknasihyrinymyryky, Deus wahoro zubata eze ziknasihyrinymyryky. Batu amy tohi ty okpitsĩ. Iwahatu kaharere soho zikwabykynahatsitsa bo tsimy — niy.

<sup>22</sup>Anas nitsasohoze estuba maku Deus wahoro perytsa ibaze niriktohokota tatsyhyrype ty zioкpykik. Ipe niy:

— Iwa taparakta ziknapamykysokonahatsa bo batu tyso. Batu wasani my — niy.

<sup>23</sup>Sesus:

— Kaharere ty wasani ahabyizeka kytsa bo tsimytsasoko. Kaharere wasani my zeka amy skaraba tsikokpykik — niy.

<sup>24</sup>Anas Sesus Kajapas bo zioқтыhyryknaha. Itsipatsa waraha tatu ibo zioқтыhyryknaha.

**Peduru Sesus soho: — Batu kanyhy — mybarapetu nikarazo.**

<sup>25</sup>Iwaze Peduru izo baze niakpyzazaka kytsa baze nidyhykyze wytyk ipe niy:

— O ikia niwatihi Sesus tukta sa — niy.

— O batu. Batu kanyhy — niy.

<sup>26</sup>Iwaze usta Peduru pe niy. Atahi taparakta tsumuëhïtsa. Atahi Peduru zispizykikta tsy. Atahi ipe niy:

— Uta tisaziksapyrëna eze ikozo tawata. Sesus tukta sa ikia bo ikozo — niy.

<sup>27</sup>Peduru:

— Batu ba. Batu kanyhy. Aty skaraba Sesus — niy.

Iwa niyze hi kokuaro nipo.

**Kytsa Sesus ispehatsa Piratus bo zioқтыhyryknaha.**

<sup>28</sup>Iwaze Kajapas Sesus tuk nipamykysobaze ispehatsakta wahoro bo zioқтыhyryknaha. Sipehatsa Piratus inarokota iwahoro bo miwa botu zioқтыhyryknaha. Sudeutsa Piratus wahoro bo batu paku zikaha. Mynapupunaha zeka Paskoa eze Sudeutsa ba zik tahadisahanaha. Iwaze hi — Deus okzeka batu simysapy tsimykaranaha — nikaranaha. Maku Sudeutsa byitatu wahoro bo ba zikpupunaha sihumo batu simysapy maha. Paskoa myikaha batu tahadisahanaha mykaranaha. Iwatsahi Piratus wahoro bo ka batu paku zikaha.

<sup>29</sup>Iwaze Piratus sibo zoihik. Ape baze tu ispe niy:

— Amy humo sa Sesus kabo tsikzioқтыhyryknaha. Atakta sa batu imysapy tsimykaranaha — niy.

<sup>30</sup>Yhÿ nikaranaha.

— Atahi batu imysapy mytsaty tsimykaranaha. Moises harere bo batu yhÿ niy, iwatahi ikia kino ity tsipibeze tsimykaranaha — nikaranaha.

<sup>31</sup>Piratus:

— Ikiahatsa zuba isoho tsimytsasokonaha. Hawa Moises harere bo batu yhÿ niy ahahyrinymyrëtsa iwatsahi isoho tsimytsasokonaha — niy.

— Batu. Katsazuba ziky iharapatawyhyta humo ba zibezenaha. Katsakta iharapatawyhyta humo ba zihyriziknaha. Batu tybeze. Ikia zuba tsipibeze katsakta batu — nikaranaha.

<sup>32</sup>Iwa nipamykysokonaha. Sesus botu nitsaso:

— Kytsa iharapatawyhyta humo pihyrizik tshikhnaha iwa pikbezenaha — niy. Sudeutsa iharere humo batu sihyrinomyry iwa Piratus bo nipamykysokonaha. Sesus harere atsatu nipamykysokonaha.

<sup>33</sup>Iwaze Piratus tawahoro bo pakuzo niy. Kytsa pe niy:

— Sesus kabo tyzioktyhyknaha — niy. Zioktyhyryknahaze ipe niy:

— Ikia hi ja Sudeutsa pehatsa — niy.

<sup>34</sup>Sesus:

— Aharere pe sa tsimykara. Mekta harere pe tu sa tsimykara — niy.

<sup>35</sup>Piratus tihi:

— Hawa ha usta mytsaty mykara motsasoko. Utakta Sudeutsa byitatu. Sudeutsa taparaktsa hi ikia kabo zaoktyhyryknaha. Hawa amysapybyita tu tsimykara. Ikia Sudeutsa pehatsa ja hawa tsimy — Piratus niy.

<sup>36</sup>Sesus:

— Hawa ikia kytsa tysipeha utakta batu. Hawa apehatsa Sesa inarokota kytsa mysipeha utakta batu. Utakta pipeha zeka ikia wata katyryktsa takyrikinaha, iwaze kasukyrytsitsa mowatsorokonaha iwaze Sudeutsa ba zikoktynaha. Katyryktsaktsa mekywatsa tu maha. Batu Homa tyryktsa byitsawatsa tu — niy.

<sup>37</sup>Piratus:

— Ikia hi sa ispehatsa — niy.

— Yhÿ uta hi ispehatsa. Mybarawy ezektsa bo wasania ty mysihyrinomyryky. Asahi ana ty hi hyÿ mykaranaha zeka asahi kaharere bo kino niwatihi hyÿ mykaranaha — niy.

<sup>38</sup>— Amy sa wasape — Piratus niy.

**Kytsa tihi: — Sesus tabezekta! Iharapatawyhyta humo tabezekta! — nikaranaha.**

Iwaze nipamykysobaze Piratus tawahoro ikny zoizo. Sudeutsa pe niy:

— Atakta batu amy tohi ziky iwatahi ba zibeze — niy. <sup>39</sup>Tubabatu tahamyikahakanahaze maku estuba myzuke ziknakara iwa sisopyk. Kytsa sizubarëtsa sakyriukrënikitsa hurukwy eze tu mykaranaha. Iwaze ispe niy:

— Aty sa myzuke, Sudeutsa pehakatsa Sesus za myzuke — niy.

<sup>40</sup>— Batu ba — kazi nikaranaha.

— Atakta batu myzuke — Opykani kaziu nikaranaha.

— Bahabas tyzukekta — nikaranaha.

— Bahabas sakyriukrënikitsa hurukwy ezektsa tyzukehikta tsimy tawata hÿ — nikaranaha. Bahabas kytsa bakatsa niy.

**19** <sup>1</sup>Iwaze Piratus sodadutsa pe niy:

— Sesus tytsakihikhaktsa. Sirara hwyk tsarikihi tsizezerëna ty tytsakinaha — niy.

Yh̄y niaha. Isukpetara buruk nitsakikinaha. <sup>2</sup>Iwaze sodadutsa inisaha ty zitsorikeknaha. Ziky my nahaze iharek humo pu niaha. Iwa nikaranaha. Ispehatsa mekywa tu sitorsik Sesus zimyijakanaha. Isuk tsahirita ty zuba korobyk ispehatsa hyritywata nikaranaha. <sup>3</sup>Iwaze ibo ibaba botu ipe niaha:

— O Sudeutsa pehatsa ja tsimy — zimyijakanaha. Ziokpykyknaha.

<sup>4</sup>Iwaze Piratus zoizo. Kytza pe niy:

— Iktsa tahaktsa. Ikiahatsa boktahi myzioktyhyryk. Atakta batu amy tohi nikara batu ziky — niy.

<sup>5</sup>Iwaze Sesus puke niy. Zoize inisaha ty zitsorikknaha Isuk tsazirita tsizezerëta niy. Iwa kytza sizubarëtsa bo ziooktyhyryk. Piratus ispe niy:

— Iktsa tahaktsa kytza! Tahi ihumo batu ahamypokzitsiuk — niy.

<sup>6</sup>Ibo iktsa niahaze kazi nikaranaha:

— Tabezekta! Iharapatawyhyta humo tabezekta! — nikaranaha.

Taparaktsa Deus wahoro eze ziknapamykysokonahatsa, Deus wahoro perytsitsa kino niwatihi opykani kazi nikaranaha.

— Tabezehikta tybezehik tsimaha — nikaranaha. Piratus tihi:

— Ikiahatsa kino kabo tsikziooktyhyryknaha. Ikiahatsa hi tsipibezenaha. Atakta wasani mytsaty mykara. Iwatahi batu pibeze. Tsimysapyrëta hi batu pibeze — niy.

<sup>7</sup>— Katsa tabeze zeka wasani h̄y. Iharere batu imysapy my. “Utakta Deus tse” botu nitsasoko iwatsahi tabeze zeka wasani my. Moises harere humo wasani my — nikaranaha.

<sup>8</sup>Nitsasokonahaze:

— Atakta Deus tse — Piratus ana ziwabyze iharere pokso tsipybyrëta.

<sup>9</sup>Iwaze tawahoro bo pakuzo niy. Iwaze Piratus Sesus pe niy:

— Hana iknykta sa ikia — niy. Sesus batu harere.

<sup>10</sup>— Amo skaraba batu harere ziky — niy.

— Hawa motsasoko kytza kaharere bo hȳy mykaranaha. Mysipeha zeka kytza pasukenaha atsipatsa warawy ty satsuk maha niy. Mysipeha zeka “Tabezekta”. Kytza iharapatawyhyta humo pahyryziknaha iwa pabezenaha. Ana humo hi tsihyrinymyrëta — Piratus niy.

<sup>11</sup>Sesus:

— Amy ty tsimytsasoko kytza aharere bo hȳy mykaranaha. Aharere wasani my. Deus humo kytza aharere bo hȳy mykaranaha. Deus abo



(Suão 19.2)

yh̃y ahabyi zeka aharere bo kytsa batu ma zikaha. Batu kabo tsimy. Tspikbezenaha zeka Deus okze ka batu amysapy tsimy. Kytsa asahi abo zikoktyhyryknaha Deus okzeka simysapybyitsa babatsa mykaranaha — niy.

<sup>12</sup>Ana ziwabykyze nizuke tsihikik. Sudeutsa taparaktsa kazi nikaranaha.

— Sesus tsimyzuke zeka Sesa pehatsa harere bo batu yh̃y tsimy, Sesa pehatsa nanabyitaba zipeha. Aparakbaha motsasokonahaze “Ikia mypehatsa”, Sesa Homa ezektisa pehatsa takyri, iwatahi Sesus tsimyzuke zeka Sesa pehatsa harere humo batu yh̃y. Tsimyzuke zeka Homa pehatsa ikia humo takyri — nikaranaha.

<sup>13</sup>Siharere ziwabyze Sesus ape bo zioqtyhyrykzo. Myzubaha bo zoizo. Iwaze Piratus kytsa harerewabykywy bo niy anaeze tadyhywy bete nidyhyky. Anaka Kabata Sudeutsa harere inarokoha. <sup>14</sup>Tokbaha niyzikze sesta-peira eze niy. Sudeutsa myikaha nakymysohoze niy. Iwaze Piratus tihi:

— Atakta ahapehatsa — niy. Iwa Piratus Sudeutsa pe niy.

<sup>15</sup>— Batu, tabezehik nikaranaha. Ihumo tahakyrikinaha “Tabezekta” kazi nikaranaha. Iharapatawyhyta humo tabezekta! — nikaranaha.

— Ahapehatsa iharapatawyhyta humo pihyrizikik iwa pibezenaha. Iwa sa tsimyzehikiknaha — niy.

— Yh̃y. Katsa mypehatsa estuba zuba. Sesa zuba mypehatsa — nikaranaha.

<sup>16</sup>Iwatahi Piratus sodadutsa pe niy — Sesus iharapatawyhyta humo tspibezenaha — niy. Iwaze zioqtyhyrykzonaha.

**Sodadutsa Sesus iharapatawyhyta humo zihyriziknaha iwa zibezenaha.**

<sup>17</sup>Myzubaha pauk baze hara bo zioqtyhyryknaha. Hara iharekpokoso inarokota Sudeutsa harere kokokta my. Sesus iharapatawyhyta tasukara bete zibykyryk. Hara bo zumunaha.

<sup>18</sup>Anabo izumunahaze iharapatawyhyta humo itsyhyry soik eze zihyriziknaha. Ipyrytsa humo niwatihi zihyrizikiknaha iwa niaha. Zikymynahaze iharapatawyhyta zitseknaha. Ituk makutsa petoktsa nisibanaha. Siharapatawyhytsa humo nisibanaha. Nataba natabaha.

<sup>19-20</sup>Kyze Piratus usta pe:

— Tsiwatahakt! niy. SESUS NASARE EZEKTA SUDEUTSA PEHATSA — niy. Anahi Sudeutsa harere hi ziwatahaka. Kereko harere niwatihi ziwatahaka. Ratĩ harere kino niwatihi ziwatahaka. Ziwatabaze iharapatawyhyta Sesus harapu bete zihyrizik. Ana parakbaha pinynaha. Iharapatawyhyta Serusarēhe pauk baze parakbaha iwataha zinykynaha. Siharere ziwatahaka — Sesus Nasare ezekta Sudeutsa pehatsa — niy.

<sup>21</sup>Iwaze taparaktsa Deus wahoro zubata eze ziknapamykysokonahatsa Piratus pe niaha:

— “Sudeutsa pehatsa” tsiwatahakanaha batu mykparawy tsimaha. Tsiwataha zeka. “Atakta botu nitsaso Sudeutsa pehatsa niy” iwa zeka yh̃ tsimaha — niaha.

<sup>22</sup>Piratus:

— Batu. Hawa botu iwataha nahaka niwatihi — niy.

<sup>23</sup>Kyze sodadutsa Sesus iharapatawyhyta humo zihyrikibnahaze isuk botu zibokiknahaze ziaksenaha. Jokboha zisykyryknaha napetok napetok niaha. Estuba isuk tisapyrêta ana hi sodadutsa nizihikiknaha.

<sup>24</sup>Iwatsahi asa zuba nipamykysokonaha:

— Na ty ka syk syk byitaha! Harahareziptyryktsa tahapaparanahaktsa kytsa, aty ja isuk piakse tsahi mybo piwatawy — iwa asa zuba nipamykysokonaha. Asahi yh̃ nikaranaha. Iwaze harahareziptyryktsa nisipaparanahaze estuba zuba isuk tisapyrêta ziaксе. Tubabatu Deus harere papeu humo botu ziwataha:

— Kasuk ty metutu nikaranaha.

Estuba kasuk ty harahareziptyryktsa mysipaparanaha — niy. Iwa tubabatu ziwatahaka, aba atsatu sodadutsa niaha.

<sup>25</sup>Iwaze kykyryk iharapatawyhyta pauk baze niriktotohokonaha Sesusje, atatsa taeky tuk. Karapas oke Maria inarokotatsa niwatihi. Maria Madarena niwatihi situk niriktotohoko. Sizubarêza iharapatawyhyta pauk eze niriktotohokonaha.

<sup>26</sup>Sesus taje bo iktsa niy. Zinymyrykyta atahi Sesus ihumo tsimypokzitsiarêta atatsa baze niriktotohoko. Iwaze Sesus taje pe niy:

— Atahi atse mozik. Atahi taje zipokzitsiki nahawahi papokzitsi h̃ — niy.

<sup>27</sup>Iwaze zinymyrykyta pe niy:

— O atatsa aje. Ikia aje baba tatsa wa tsipokzitsi — iwa niy. Sesus nihyrikosokdaze zinymyrykyta Sesusje tawahoro bo zioқтырык. Iwahoro eze ziknapykyryk, ije watatsa niyzik.

### Sesus nihyrikosokda.

<sup>28</sup>Kyze Sesus tahyrikzitsokzawy zepkybaze ana humo hi tsihyrinymyrêta. Iwaze hawa tubabatu Deus papeu humo isoho ziwatahaka, atsatu nitsasoko:

— Karapukrêta — niy.

<sup>29</sup>Anaeze duabohotsa tsik itsârâkbara ty morosuk eze ky ty tsikok niy. Kytsa mazori waha ty humo duabohotsa tsik bo tsikuk tsikuk niaha. Iwaze mazori hyritywaha ty hwi humo zitsihibunaha iwaze zidokonaha. Iparikiha sazik ty isope inarokoha. Iwaze jobo Sesus sak bo tsyk tsyk nikara. <sup>30</sup>Iwa duabohotsa tsik itsârâkbara tu ziku. Iwaze nitsaso.

— Aba pomozaka. Kahyrikzitsokzawy zipykba. Deus kape nikara naha zipykba. O Deus mohyrikosokdaze wasani my ikia kahumo tsamypokzitsiarêta — niy.

Iwaze taharek ty tyk bo harapusiri niy. Iwa nihyrikosokda.

**Sodadu tanora hyritywata ty ipektsa baze ziskoik.**

<sup>31</sup>Kyze taparaktsa Sudeutsa Piratus pe niaha:

— Kytsa asahi siharapatawyhytsa humo nisihyryzikiknahaze mybyrykywy pomoze ba zik sereknaha siharapatawyhytsa humo mysereknaha zeka batu isapy mytsaty tsimykaranaha. Iwatahi sodadutsa pe tsimy. “Asahi siharapatawyhytsa humo tsikyryzikiknaha tyseksaharakiknaha” iwaze atsoko ziakbanaha. Iwa byiri sabado siharapatawyhytsa humoktsa mahani. Sinurytsa ty mysibykyknaha mybyrykywy sabado sukmoityu — nikaranaha. Iwa nitsasokonaha sesta-peira eze. Byriri sabado zumuze tabyrykywy Sudeutsa mykahakawy zumu. Iwatsahi asahi siharapatawyhy humoktsa nasispik tsihikiknaha sabado sukmoityu my.

<sup>32</sup>Iwatsahi sodadutsa siharapatawyhy humoktsa bo niukurunaha. Sibozumunahaze tapara estuba maku zeksaharakiknaha. Usta ty kino niwatihi zeksaharakiknaha. <sup>33-37</sup>Iwaze Sesus bo zumunahaze. Botu zumuza.

— Atakta botu zumuza — asa zuba nipamykysokonaha. Iwatsahi batu tyeksaharak. Tubabatu Sesus soho Deus harere papeu humo ziwatahaka:

— Batu typoiktsa harak. Estuba zuba batu typoiktsa harak — niy.

Iwa tubabatu ziwatahaka. Hawa ha ty botu ziwatahaka atsatu sodadutsa nikaranaha. Iwaze sodadu tanora ty ipektsa baze ziskoik. Ziskoikze ispu zipoko niy. Pihik tuk tu zipoko niy. Tubabatu Sesus soho Deus harere papeu humo ziwatahaka:

— Kytsa iskohokta bo iktsa mykaranaha — niy.

Iwa ziwatahaka. Sodadutsa ziskoiknahaze ana soho humo hi batu sihyrinymyry iwatsa tu Deus harere bo hyÿ nikaranaha.

Utakta Sesus nihyrikosokdaze ibo iktsa iky. Ana hi pykyhytu iktsasoko. Wasani niy. Ikiahatsa bo nihyrikosokdata soho iktsasoko iwahatu ikiahatsa kino niwatihi ihumo ahaspirikporëtsa. Ana hi iktsasoko wasani hiba. Kahyrynymyryëta hÿ.

**Sose, Nikodemus ahatsa Sesus nury nitsahoroknaha.**

<sup>38</sup>Kyze Sose Arimeteja ezekta Piratus bo zumu. Sose Sesus humo tispirikporëta zinymyrykyta. Batu tyso. — Utakta Sesus harere bo hyÿ ikykara ihumo kaspirikporëta — Sudeutsa pokso batu tyso. Tsipybyrëta. Atahi Sesus zispirikpoko. Atahi Piratus pe niy:

— O Sesus nury ty uta kabokta! — niy.

— Yhÿ. Inury tynazipikta — niy. Kyze inury inazipikze iytyk bo zibykyknaha.

<sup>39</sup>Nikodemus Sose tuk, atahi jokmorënikia tsizubarëna zebykyryk. Tirïta sïko kiros jokmorënikia zebykyryk. Jokmorënikia mira hwi sopro

iwaze aroes wihara soporo itsakykyha. Tsokmorëna. Anahi zibykyknaha. Tubabatu Nikodemus Sesus bo nipamykysoko. Sesus atazuba tabo unata eze inakozoreze.

<sup>40</sup>Sesus nury nazipiknahaze panu ty ziakwarakanaha. Inury bo jokmorënikia ty ziharasusunaha. Iwa Sudeutsa sopykwy.

<sup>41</sup>Sesus iharapatawyhyta humo zihyrizikiknaha eze hwitsa sisaziksapyrëtsa my. Anaeze iytyk ezytyk niy. Batu aty tohi humo iwihihukbara. <sup>42</sup>Nubaze sesta-peira Sudeutsa tahadisahawy humo nikaranaha sabado sukmo byitu nikaranaha. Sabado eze ka tahabyri nepykyryknaha. Byri ziktahabyryknaha. Iwaze iytyk ezytyk tykarawa tu anaeze nitsahukarenaha. Sesus iytyk bo zihhoekarenaha.

### Sesus ytyk tsarawybara niapykyryk.

**20** <sup>1</sup>Kyze zokorobyitu Maria Madarena iytyk bo niukuru. Miwa botu domiko eze atatsa iytyk bo zumuku. Zumuze harahare ihokbowy hana bo ja, sukyhy zikare niy.

— O aty sa inury zibykyk — mytsaty nikara. <sup>2</sup>Iwatatsahi atsoko Peduru bo ziksizo. Utakta Sesus zinymyrykyta kahumo tsimypokzitsiarëta kabo niwatihi ziksizo. Ziksizoze. Atatsa:

— Kytsa Sesus nury zibykyryknaha. Hana bo ja. Iytyk batu tsarawyky niy. Hana bo sa zebykyryknaha — niy. Iwa makutsa petoktsa bo nitsasoko.

<sup>3</sup>Iwaze Peduru itukta iwa atsoko iytyk bo nitururuknaha. <sup>4</sup>Petoktsa iytyk bo nitururuknaha. Uta hi Peduru haraze ikpapakak. Tapara iytyk bo ikumu. <sup>5</sup>Ikumuze iytyk bo iktsa iky, okmymy ikyze panu iakwarawy zuba nizozohoko ana bo zuba iktsa iky. Utakta batu paku. <sup>6</sup>Iwaze Simaõ Peduru iytyk bo zumuze. Atsoko iytyk bo zekeba. Panu bo iktsa niy. <sup>7</sup>Usa panu bo iktsa niy. Panu nihyrikosokdata iharekwarawy bo iktsa niy. Usa panu ka meky botu niapykyryk. Inury ykwarawy ka bara botu niapykyryk. Inury hana bo ja niy. <sup>8</sup>Utakta tapara iytyk bo ikumu. Iwaze uta kino niwatihi iktsuk. Ikozoze:

— Inury hana bo ja Sesus inahyrizikpo — atatuke iky. Iwatahi Sesus humo kaspirikporëta.

<sup>9</sup>Tubabatu Deus harere papeu humo botu ziwatahaka:

— Sesus siakbatsa tukze Deus zihyrizikpowy — niy.

Zinymyryknahatsa anaharere humo tsihokdahaarëna niy. <sup>10</sup>Kyze katsa zinymyryknahatsa bo tsiksizonaha.

### Sesus Maria Madarena bo natakaha.

<sup>11</sup>Kyze Maria Madarena iytyk bo niukuruzo. Atatsa iytyk baze nipuziuku. Nipuziukutatsa tu iytyk bo ziktsutsu niy. <sup>12</sup>Bijoikpe iknyktsa Deus tsumuëhïtsa petoktsa bo iktsa niy. Sisukbarazarëtsa. Sesus nury

sapy eze nidyhydyhykynaha. Estuba iharek sapy taba nidyhyky. Usta ipyrytsa sapy taba nidyhyky.

<sup>13</sup>Ipe niaha:

— Amo skaraba tsimopuziuku — niaha. — Kapehatsa nihyrikosokdata nury zibykyknaha. Hana bo ja zibykyknaha — niy. Iwatatsahi pipokzitsiki.

<sup>14</sup>Iwa nitsasokoze tasukpe bo uwok niy. Sesus ibaze niriktohoko. Ibo iktsa niy. Ihyritsik humo inyhybyitawa nio. Sesus batu inyhy. <sup>15</sup>Atahi ipe niy:

— Amo skaraba tsimopuziuku. Aty sa tsipiberiki — niy. Atatsa kino isazikperytsa ja niy. Iwatatsahi ipe niy:

— O aty sa zibykyk tsibykyryk zeka ikza kabo ky. Ikza mekybotu piytykzo — niy.

<sup>16</sup>— O Maria — niy.

Iwaze zinyziu.

— Raboni — niy. Sudeutsa harere ka. — Kapokzitsitsa — piwatawyky.

<sup>17</sup>Sesus ipe niy:

— Katy paik paik byityktsa! Kazo bo ka batu kado. Katuktsa bo tynakozorektsa! “Sesus jobo modo. Kazo bo modo.” Kazo Deus ikiahatsa kino niwatihi ahazo Deus tihi “Myzo Deus”. Iwa katuktsa bo tsimy — niy. Yhÿ niy.

<sup>18</sup>Iwaze Maria Madarena niparak. Zinymyrykynahatsa bo zumuze ispe niy:

— O Sesus iny. Inahyritziko. Abahi jo bo Deus bo modo. Ata hi ipokzitsihi. Katsa kino niwatihi Deus myhumo tsimypokzitsiukrëta — niy.

### Sesus tuk zinymyrykynahatsa bo natakaha.

<sup>19</sup>Zunubakaze Sesus tatuktsa bo. Domiko eze sibo zumu. Asahi wahoro bo inakypykbanahaze. Tahahokbowy zitsykykiknaha. Sudeutsa taparaktsa pokso sipybyrëtsa nikaranaha. Iwaze Sesus sibo natakaha ispe niy:

— Ahapybybyihuktsa. Ahapunihikuktsa kytsa! — niy.

<sup>20</sup>Tapapepe humo ky ziwatawyky. Tapektsa humo ky ziwatawyky. Zinymyrykynahatsa sakurëtsa nikaranaha. Tahapehakatsa bo nikozonehaze sakurëtsa niyziknaha. <sup>21</sup>Ispezo niy:

— Ahapunihikuktsa ahapyby byihu ja kytsa! Tapara kazo mybarawy eze ktsa bo zikpeha. Uta kino niwatihi, utakta myzahapehaka. Myzubaha bo kasoho tsimytsasonaha iwatahi myzahapehaka — niy.

<sup>22</sup>Iwaze Sesus sibo huhu nikara. Ispe niy:

— Deus hyrikoso ikiahatsa tuk mynapykyryk.

<sup>23</sup>Tsimytsasonaha zeka sizubarëtsa pe: “Ahamysapybyri Deus pahaokzohik” tsimykarana. Deus simysapybyri siokzohik. Tsimytsasonaha zeka kytsa pe:

“Deus ahamysapybyri batu pahaokzo” tsimykarana. Deus simysapybyri ba ziksiokzo. Deus simysapybyitsa tu ba zikspiriktsokda my — niy.

### Sesus Tome iwa.

<sup>24</sup>Iwaze zinymyrykyta Tome inarokota niy. Usta inarokota beketsa niy. Atahi Sesus batu inyhy. Sesus zinymyrykynahatsa bo izumuze Tome batu situk dyhy niy. Sesus inahyryzikpoze Tome batu inyhy. <sup>25</sup>Iwatsahi ustsá ipe niy:

— O Tome katsaktsa mypehakatsa tsinyaha — niaha.

— Batu ma. Ipapepehyrizikwy sapy bo kasyhyry ty kuruk ahabyizeka ba ma ziky. Nataba tanora sapy bo kasyhyry ty kuruk ahabyizeka ba ma ziky — iwa ustsá zinymyrykynahatsa bo Tome nitsaso.

<sup>26</sup>Kyze mytsyhyrytsa wa zuruze Sesus tuktsa wahoro bo izumubazonaha. Tome situk niapykyryk. Wahoro tahahokbowy zitsykykiknaha. Atsoko Sesus sibo natakaha. Sesus zinymyrykynahatsa pe:

— Ahapunihiktsa kytsa. Ahapybybyihuktsa! — niy.

<sup>27</sup>Iwaze Tome pe niy:

— Pany! Kasyhyrype bo iktsa tykta. Na kasyhyrype hyrizikwy sapy bo atsyhyry ty kuruktykta. Na kaskowy tanora sapy bo atsyhyry ty kuruktykta. “Sesus nihyrikosokdata ba ziknahyryzikpo” ana ty hi sosobyity tsimy. Kahumo aspirikpokta! — niy.

<sup>28</sup>Tome:

— Ikia kino kapehatsa tsimy. Ikia humo kaspirikporêta hÿ. Ikia hi Deus babata — niy.

<sup>29</sup>Sesus ipe niy:

— Tsikny taowy kahumo aspirikporêta. Wasani my. Ustsá kytsa katy nyahabyitsatu kahumo sispirikporêtsa. Asa hi sakurêtsa babatsa — niy.

### Abaka pepykbaka.

<sup>30</sup>Sesus tazikwy ziwatawyky. Zinymyrykynahatsa izikwy bo iktsa nikaranaha. Izororohotsa bo iktsa nikaranaha. Anasoho ba ziwataha. Papeu humo sisoho ty batu tywataha. <sup>31</sup>Hawa Sesus zikwy zororotsa soho tsikaeni zuba ziwatahaka. Anasoho ziwatahaka iwatahi pahaspirikpoko Sesus Deus tse. Deus Sesus zipehata pahaspirikpoko. Ana humo hi ahaspirikporêtsa zeka mekywatsa tu tsimoziknaha. Ihumo ahamysapyrêtsa tsimoziknaha. Ihumo ahaspirikporêtsa zeka tsimyhyrikosokdanahaze tsinahyryzikponaha. Iwaze Deus tuk ahawahi tsimynapykyryknaha.

### Sesus sete zinymyrykynahatsa bo natakaha.

**21** <sup>1</sup>Kyze Sesus tuk zinymyrykynahatsa bo inatakahazo. Pihikzotsabyri baze sibo izumu. Pihikzotsabyri Tiberiades inarokoha. Anaeze sete ahatsa ituktsa zitsikparakanaha.

<sup>2</sup>Peduru, Tome, Natanieu, Suão, Tsiaku, ustsá petoktsa iwatsa situk nikaranaha. <sup>3</sup>Peduru ispe niy:

— Pihik pitsikpapara — niy.

— Yh̄y! Katsa ikia hapik — niaha. Haramwe zunubakaze kokokorohyk. Turi turi turi niaha. Zitsikpaparakanaha. Batu istyzo.

<sup>4</sup>Kyze zokorobyitu Sesus pihik sak eze niriktohoko. Tsaraha bytykarawa tu niy, Sesus pihik sak eze niriktohoko. Zinymyrykynahatsa nikozonehaze:

— O aty skaraba.

O batu mynyhy — nikaranaha. <sup>5</sup>Iwaze Sesus huahua niy:

— Tsiknasizokonaha sa kytsa! — niy.

Batu niaha.

<sup>6</sup>— Tõhõryk ty nataba tsioktsokzonahaktsa! Abaka tsinasizonaha ty — niy.

Iwaze tõhõryk ziooktsoknaha. Abaka tõhõryk piknutsa tsakyrik humo, ba zikzizonaha. <sup>7</sup>Iwaze uta inymyrykya Sesus kahumo tsimypokzitsiarêta Peduru pe iky:

— O mypehakatsa Sesus — iky. Peduru ziwabyta takpyzazawy ty korobyk niy. Tahyriziktsokzawy humo awani nikarata iwaze takpyzazawy zikorobykze pihik bo nioktsok. Sesus bo atsoko uruk uruk nikara.

<sup>8</sup>Utsaktsa mahani. Tõhõryk zikyrikinaha. Titsakyrikrêna. Tsaraha imyrazata bytykara wata nowêta meteros zuba niy. Nakpo bybybyu niaha. Tahatsaraha piknutsa ty nasihareknaha. <sup>9</sup>Nakpo tsaraha ekze nizuknahaze izo bo nikozonehaha. Sesus izo bete piknutsa nisizoko sizubabyitsa tu. Atsikara niwatihi.

<sup>10</sup>Sesus tihi:



(Suão 21.9)

— O piknutsa ty puëtsik kabo wabehyryk tynaha — niy.  
Yhỹ Peduru niy.

<sup>11</sup>Iwaze Peduru tsaraha bo takoro, piknutsa tōhōryk eze inasikyriki:

— O inahareknaha — niy. Piknutsa sizubarētsa nasizokonaha. Sēto sīkuēta teres piknutsa sizubarētsa nikaranaha. Inahareknahatsa tu tōhōryk batu tuzu. <sup>12</sup>Sesus:

— Parany! tyzahadisahanaha kytsa! — niy.

Yhỹ niaha. Zinymyrykynahatsa batu — Aty sa — niaha. <sup>13</sup>Mynyhy tihi Sesus atsikara ty sibo nyny niy. Piknutsa ty kino niwatihi. Tahadisahakanaha.

<sup>14</sup>Abaka Sesus tuk zinymyrykynahatsa bo harakykbyi inahyrizikpota inatakaha.

### Sesus Peduru ahatsa.

<sup>15</sup>Kyze Sesus Simaō Peduru pe niy, atahi Suão tse iwaze Sesus ipe niy:

— Simaō ikia sa kahumo tsamypokzitsiarēta — niy.

— Yhỹ. Uta atukta babata my — niy.

— Kaharere ty katuktsa tsihyrinymyrykta. Hawa hozipyrykzatsa tsihitsa siraratsa tsysipokzitsiki iwa ikia katuktsa humo tynasipokzitsiki.

<sup>16</sup>Sesus ipe niyzo:

— Simaō kahumo sa tsamypokzitsiarēta babata tsimy — niy.

— Yhỹ utakta atukta babata my — niy.

— Kaharere katukytsa bo tsihyrinymyrykta! Hawa hozipyrykzatsa tsihitsa siraratsa tsysipokzitsiki iwa katukytsa humo tsysipokzitsi — niy.

<sup>17</sup>Sesus ipe niyzo:

— Simaō ikia sa kahumo tsamypokzitsiarēta babata tsimy — niy.

Iwaze Sesus nitsasokoze — Iki sa kahumo tsamypokzitsiarēta — atsa tyty harakykbyi Peduru pe niyze tisukatsihikrēta niyzik. Peduru:

— O kapehakatsa tsahyrinymyrēta hiza. Ikiakta tsiknyba hỹ. Utakta ahumo kamypokzitsiarēta. Ana humo hi ahyrinymyrēta — niy. Sesus:

— Kaharere ty za katukytsa tsihyrinymyrykta! Hawa hozipyrykzatsa tsihitsa siraratsa tsysipokzitsiki ikia iwa katukytsa humo hi tsysipokzitsiki hỹ. <sup>18</sup>Wabyziutykta. Simaō mykyryburukta zikzurukuze asuk ty korobykyk ziknakaraze paikpa ziknakara hỹ. Iki tsimytsaikbaze usta atsipatsa mysakwara. Akparawy bara bo paoktyhyryknaha — niy.

<sup>19</sup>Iwa Peduru pe niy. Peduru mora naha soho nitsasoko. Ipe niy:

— Tsimyhyrikosokdaze kytsa sizubarētsa motsasokonaha “Deus hi Peduru zipunihikwyky hỹ. Iwatahi mohyrikosokdaze batu ipyby. Deus imysapyrēta hỹ” mykaranaha — niy. Hawa Peduru mohyrikosokda naha soho botu ibo nitsasoko.

Iwaze ipe niyzo:

— Kaharere bo hyỹ tsimykta! Kapik tynao — niy.

**Hawa Sesus kasoho nitsasoko.**

<sup>20</sup>Kyze Peduru uwok niyze kabo iktsa niy. Utakta zinymyrykyta Sesus kahumo tsimypokzitsiarēta. Uta Peduru sukpe baze ikziktohoko. Tapara Sesus nihyrikosokda katsa ituk amyikaha eze tuze uta zuba ipe iky:

— Aty skaraba asukyrytsitsa bo paoktyhyryk — ikykara. Aba Peduru kabo iktsa niyze ta tihi:

<sup>21</sup>— Hawa sa ipe tsimy — niy.

<sup>22</sup>Sesus:

— Batu ityso. “Hawa sa ipe tsimy”. “Uta sa Deus harere bo zuba yhy my” tsimy. Iwa tsimy hy — niy. — Utakta motsasoko zeka “Atakta ba zikyrikosokda, atahi myziksizoze motare”. Wasani my. Iki kina kaharere bo zuba hy tsimykara. Utsa soho bo batu paikpa mytsaty tsimykara. Kaharere bo zuba hy tsimykara. Iki humo wasani tsimyzeka kaharere bo zuba hy tsimykara.

<sup>23</sup>Kyze Sesus tuktsa asa zuba nipamykysokonaha:

— Atakta ba zikyrikosokda, Sesus myziksizoze ispitu my — nikaranaha.

Iwa Sesus batu tyso. — “Atakta ba zikyrikosokda” tapara nitsaso “motsaso zeka atakta ba zikyrikosokda atahi myziksizoze motare” — iwa nitsaso. Batu siwabyziuhu.

<sup>24</sup>Zinymyrykyta Sesus kahumo tsimypokzitsiarēta piwatahaka. Hawa ha ty piwatahaka naha wasani my. Utakta Sesus harere ahabo motsasoko.

**Abaka nepyk.**

<sup>25</sup>Sesus tsizubarēna ty nikara. Iokboha zuba papeu humo ziwataha. Nanabyi soho ziwataha zeka abazuba papeu humo ba zikpyk. Ziwatahaba zeka papeu zikpykba. Niwazuba. Suão.